

תהלים

1

1 אשרי האיש אשר לא הלך בעצת רשעים ובדרך חטאים לא עמד ובמושב לצים לא ישב: 2 כי אם בתורת יהוה חפצו ובתורתו יהגה יומם ולילה: 3 והיה כעץ שתול על פלגי מים אשר פריו יתן בעתו ועלהו לא יבול וכל אשר יעשה יצליח: 4 לא כן הרשעים כי אם כמץ אשר תדפנו רוח: 5 על כן לא יקמו רשעים במשפט וחטאים בעדת צדיקים: 6 כי יודע יהוה דרך צדיקים ודרך רשעים תאבד:

2

1 למה רגשו גוים ולאמים יהגו ריק: 2 יתיצבו מלכי ארץ ורוזנים נוסדו יחד על יהוה ועל משיחו: 3 ננתקה את מוסרותימו ונשליכה ממנו עבתימו: 4 יושב בשמים ישחק אדני ילעג למו: 5 אז ידבר אלימו באפו ובחרונו יבהלמו: 6 ואני נסכתי מלכי על ציון הר קדשי: 7 אספרה אל חק יהוה אמר אלי בני אתה אני היום ילדתיך: 8 שאל ממני ואתנה גוים נחלתך ואחזתך אפסי ארץ: 9 תרעם בשבט ברזל ככלי יוצר תנפצם: 10 ועתה מלכים השכילו הוסרו שפטי ארץ: 11 עבדו את יהוה ביראה וגילו ברעדה: 12 נשקו בר פן יאנף ותאבדו דרך כי יבער כמעט אפו אשרי כל חוסי בו:

3

1 מזמור לדוד בברחו מפני אבשלום בנו יהוה מה רבו צרי רבים קמים עלי: 2 רבים אמרים לנפשי אין ישועתה לו באלהים סלה: 3 ואתה יהוה מגן בעדי כבודי ומרים ראשי: 4 קולי אל יהוה אקרא ויענני מהר קדשו סלה: 5 אני שכבתי ואישנה הקיצותי כי יהוה יסמכני: 6 לא אירא מרבבות עם אשר סביב שתו עלי: 7 קומה יהוה הושיעני אלהי כי הכית את כל איבי לחי שני רשעים שברת: 8 ליהוה הישועה על עמך ברכתך סלה:

4

1 למנצח בנינות מזמור לדוד בקראי ענני אלהי צדקי בצר הרחבת לי חנני ושמע תפלת: 2 בני איש עד מה כבודי לכלמה תאהבון ריק תבקשו כזב סלה: 3 ודעו כי הפלה יהוה חסיד לו יהוה ישמע בקראי אליו: 4 רגזו ואל תחטאו אמרו בלבבכם על משכבכם ודמו סלה: 5 זבחו זבחי צדק ובטחו אל יהוה: 6 רבים אמרים מי יראנו טוב נסה עלינו אור פניך יהוה: 7 נתתה שמחה בלבי מעת דגנם ותירושם רבו: 8 בשלום יחדו אשכבה ואישן כי אתה יהוה לבדך לבטח תושיבני:

5

1 למנצח אל הנחילות מזמור לדוד אמרי האזינה יהוה בינה הגיגי: 2 הקשיבה לקול שועי מלכי ואלהי כי אליך אתפלל: 3 יהוה בקר תשמע קולי בקר אערך לך ואצפה: 4 כי לא אל חפץ רשע אתה לא יגרך רע: 5 לא יתיצבו הוללים לנגד עיניך שנאת כל פעלי און: 6 תאבד

דברי כזב איש דמים ומרמה יתעב יהוה: ⁷ ואני ברב חסדך אבוא ביתך אשתחווה אל היכל קדשך ביראתך: ⁸ יהוה נחני בצדקתך למען שוררי הושר לפני דרכך: ⁹ כי אין בפיהו נכונה קרבם הוות קבר פתוח גרונם לשונם יחליקון: ¹⁰ האשימם אלהים יפלו ממעצותיהם ברב פשעיהם הדיחמו כי מרו בך: ¹¹ וישמחו כל חוסי בך לעולם ירננו ותסך עלימו ויעלצו בך אהבי שמך: ¹² כי אתה תברך צדיק יהוה כצנה רצון תעטרנו:

6

¹ למנצח בנגינות על השמינית מזמור לדוד יהוה אל באפך תוכיחני ואל בחמתך תיסרני: ² חנני יהוה כי אמלל אני רפאני יהוה כי נבהלו עצמי: ³ ונפשי נבהלה מאד ואת יהוה עד מתי: ⁴ שובה יהוה חלצה נפשי הושיעני למען חסדך: ⁵ כי אין במות זכרך בשאול מי יודה לך: ⁶ יגעתי באנחתי אשחה בכל לילה מטתי בדמעתי ערשי אמסה: ⁷ עששה מכעס עיני עתקה בכל צוררי: ⁸ סורו ממני כל פעלי און כי שמע יהוה קול בכיי: ⁹ שמע יהוה תחנתי יהוה תפלתתי יקח: ¹⁰ יבשו ויבהלו מאד כל איבי ישבו יבשו רגע:

7

¹ שגיון לדוד אשר שר ליהוה על דברי כוש בן ימיני יהוה אלהי בך חסיתי הושיעני מכל רדפי והצילני: ² פן יטרף כאריה נפשי פרק ואין מציל: ³ יהוה אלהי אם עשיתי זאת אם יש עול בכפי: ⁴ אם גמלתי שולמי רע ואחלצה צוררי ריקם: ⁵ ירדף אויב נפשי וישג וירמס

לארץ חיי וכבודי לעפר ישכן סלה: ⁶ קומה יהוה באפך הנשא בעברות צוררי ועורה אלי משפט צוית: ⁷ ועדת לאמים תסובבך ועליה למרום שובה: ⁸ יהוה ידין עמים שפטני יהוה כצדקי וכתמי עלי: ⁹ יגמר נא רע רשעים ותכונן צדיק ובחן לבות וכליות אלהים צדיק: ¹⁰ מגני על אלהים מושיע ישרי לב: ¹¹ אלהים שופט צדיק ואל זעם בכל יום: ¹² אם לא ישוב חרבו ילטוש קשתו דרך ויכוננה: ¹³ ולו הכין כלי מות חציו לדלקים יפעל: ¹⁴ הגה יחבל און והרה עמל וילד שקר: ¹⁵ בור כרה ויחפרהו ויפל בשחת יפעל: ¹⁶ ישוב עמלו בראשו ועל קדקדו חמסו ירד: ¹⁷ אודה יהוה כצדקו ואזמרה שם יהוה עליון:

8

¹ למנצח על הגתית מזמור לדוד יהוה אדנינו מה אדיר שמך בכל הארץ אשר תנה הודך על השמים: ² מפי עוללים וינקים יסדת עז למען צורריך להשבית אויב ומתנקם: ³ כי אראה שמך מעשי אצבעתיך ירח וכוכבים אשר כוננתה: ⁴ מה אנוש כי תזכרנו ובן אדם כי תפקדנו: ⁵ ותחסרהו מעט מאלהים וכבוד והדר תעטרהו: ⁶ תמשילהו במעשי ידיך כל שתה תחת רגליו: ⁷ צנה ואלפים כלם וגם בהמות שדי: ⁸ צפור שמים ודגי הים עבר ארחות ימים: ⁹ יהוה אדנינו מה אדיר שמך בכל הארץ:

9

¹ למנצח עלמות לבן מזמור לדוד אודה יהוה בכל

לבי אספרה כל נפלאותיך: ² אשמחה ואעלצה בך
 אזמרה שמך עליון: ³ בשוב אויבי אחור יכשלו ויאבדו
 מפניך: ⁴ כי עשית משפטי ודיני ישבת לכסא שופט
 צדק: ⁵ גערת גוים אבדת רשע שמם מחית לעולם ועד:
⁶ האויב תמו חרבות לנצח וערים נתשת אבד זכרם
 המה: ⁷ ויהוה לעולם ישב כונן למשפט כסאו: ⁸ והוא
 ישפט תבל בצדק ידין לאמים במישרים: ⁹ ויהי יהוה
 משגב לדרך משגב לעתות בצרה: ¹⁰ ויבטחו בך יודעי
 שמך כי לא עזבת דרשיך יהוה: ¹¹ זמרו ליהוה ישב ציון
 הגידו בעמים עלילותיו: ¹² כי דרש דמים אותם זכר
 לא שכח צעקת עניים: ¹³ חננני יהוה ראה עניי משנאי
 מרוממי משערי מות: ¹⁴ למען אספרה כל תהלתך
 בשערי בת ציון אגילה בישועתך: ¹⁵ טבעו גוים בשחת
 עשו ברשת זו טמנו נלכדה רגלם: ¹⁶ נודע יהוה משפט
 עשה בפעל כפיו נוקש רשע הגיון סלה: ¹⁷ ישובו רשעים
 לשאולה כל גוים שכחי אלהים: ¹⁸ כי לא לנצח ישכח
 אביון תקות ענוים תאבד לעד: ¹⁹ קומה יהוה אל יעז
 אנוש ישפטו גוים על פניך: ²⁰ שיתה יהוה מורה להם
 ידעו גוים אנוש המה סלה:

10

¹ למה יהוה תעמד ברחוק תעלים לעתות בצרה:
² בגאות רשע ידלק עני יתפשו במזמות זו חשבו: ³ כי
 הלל רשע על תאות נפשו ובצע ברך נאץ יהוה: ⁴ רשע
 כגבה אפו בל ידרש אין אלהים כל מזמותיו: ⁵ יחילו
 דרכו בכל עת מרום משפטיך מנגדו כל צורריו יפיח

בהם: ⁶ אמר בלבו בל אמוש לדר ודר אשר לא ברע:
⁷ אלה פיהו מלא ומרמות ותך תחת לשונו עמל ואון:
⁸ ישב במארב חצרים במסתרים יהרג נקי עיניו לחלכה
⁹ יצפנו: ⁹ יארב במסתר כאריה בסכה יארב לחטוף עני
¹⁰ יחטף עני במשכו ברשתו: ¹⁰ ודכה ישח ונפל בעצומו
¹¹ חלכאים: ¹¹ אמר בלבו שכח אל הסתיר פניו בל ראה
¹² לנצח: ¹² קומה יהוה אל נשא ירך אל תשכח עניים:
¹³ על מה נאץ רשע אלהים אמר בלבו לא תדרש:
¹⁴ ראתה כי אתה עמל וכעס תביט לתת בידך עליך
¹⁵ יעזב חלכה יתום אתה היית עוזר: ¹⁵ שבר זרוע רשע
¹⁶ ורע תדרוש רשעו בל תמצא: ¹⁶ יהוה מלך עולם ועד
¹⁷ אבדו גוים מארצו: ¹⁷ תאות ענוים שמעת יהוה תכין לבם
¹⁸ תקשיב אזנך: ¹⁸ לשפט יתום ורך בל יוסיף עוד לערץ
אנוש מן הארץ:

11

¹ למנצח לדוד ביהוה חסיתי איך תאמרו לנפשי נודו
הרכם צפור: ² כי הנה הרשעים ידרכון קשת כוננו חצם
על יתר לירות במו אפל לישרי לב: ³ כי השתות יהרסון
צדיק מה פעל: ⁴ יהוה בהיכל קדשו יהוה בשמים כסאו
עיניו יחזו עפעפיו יבחנו בני אדם: ⁵ יהוה צדיק יבחן
ורשע ואהב חמס שנאה נפשו: ⁶ ימטר על רשעים פחים
אש וגפרית ורוח זלעפות מגת כוסם: ⁷ כי צדיק יהוה
צדקות אהב ישר יחזו פנימו:

12

¹ למנצח על השמינית מזמור לדוד הושיעה יהוה כי

גמר חסיד כי פסו אמונים מבני אדם: ² שוא ידברו איש את רעהו שפת חלקות בלב ולב ידברו: ³ יכרת יהוה כל שפתי חלקות לשון מדברת גדלות: ⁴ אשר אמרו ללשנו נגביר שפתינו אתנו מי אדון לנו: ⁵ משד עניים מאנקת אביונים עתה אקום יאמר יהוה אשית בישע יפיה לו: ⁶ אמרות יהוה אמרות שהרות כסף צרוף בעליל לארץ מזקק שבעתים: ⁷ אתה יהוה תשמרם תצרנו מן הדור זו לעולם: ⁸ סביב רשעים יתהלכון כרם זלות לבני אדם:

13

¹ למנצח מזמור לדוד עד אנה יהוה תשכחני נצח עד אנה תסתיר את פניך ממני: ² עד אנה אשית עצות בנפשי יגון בלבבי יומם עד אנה ירום איבי עלי: ³ הביטה ענני יהוה אלהי האירה עיני פן אישן המות: ⁴ פן יאמר איבי יכלתיו צרי יגילו כי אמוט: ⁵ ואני בחסדך בטחתי יגל לבי בישועתך: ⁶ אשירה ליהוה כי גמל עלי:

14

¹ למנצח לדוד אמר נבל בלבו אין אלהים השחיתו התעיבו עלילה אין עשה טוב: ² יהוה משמים השקיף על בני אדם לראות היש משכיל דרש את אלהים: ³ הכל סר יחדו נאלחו אין עשה טוב אין גם אחד: ⁴ הלא ידעו כל פעלי און אכלי עמי אכלו לחם יהוה לא קראו: ⁵ שם פחדו פחד כי אלהים בדור צדיק: ⁶ עצת עני תבישו כי יהוה מחסהו: ⁷ מי יתן מציון ישועת ישראל בשוב יהוה שבות עמו יגל יעקב ישמח ישראל:

15

1 מזמור לדוד יהוה מי יגור באהלך מי ישכן בהר
 קדשך: 2 הולך תמים ופעל צדק ודבר אמת בלבבו:
 3 לא רגל על לשנו לא עשה לרעהו רעה וחרפה לא
 נשא על קרבו: 4 נבזה בעיניו נמאס ואת יראי יהוה יכבד
 נשבע להרע ולא ימר: 5 כספו לא נתן בנשך ושחד על
 נקי לא לקח עשה אלה לא ימוט לעולם:

16

1 מכתם לדוד שמרני אל כי חסיתי בך: 2 אמרת
 ליהוה אדני אתה טובתי בל עליך: 3 לקדושים אשר
 בארץ המה ואדירי כל חפצי במ: 4 ירבו עצבותם אחר
 מהרו בל אסיך נסכיהם מדם ובל אשא את שמותם
 על שפתי: 5 יהוה מנת חלקי וכוסי אתה תומוך גורלי:
 6 חבלים נפלו לי בנעמים אף נחלת שפרה עלי: 7 אברך
 את יהוה אשר יעצני אף לילות יסרוני כליותי: 8 שויתי
 יהוה לנגדי תמיד כי מימיני בל אמוט: 9 לכן שמח לבי
 ויגל כבודי אף בשרי ישכן לבטח: 10 כי לא תעזב נפשי
 לשאול לא תתן חסידך לראות שחת: 11 תודיעני ארח
 חיים שבע שמחות את פניך נעמות בימינך נצח:

17

1 תפלה לדוד שמעה יהוה צדק הקשיבה רנתי
 האזינה תפלתי בלא שפתי מרמה: 2 מלפניך משפטי
 יצא עיניך תחזינה מישרים: 3 בחנת לבי פקדת לילה
 צרפתי בל תמצא זמתי בל יעבר פי: 4 לפעלות אדם
 בדבר שפתיך אני שמרתי ארחות פריץ: 5 תמך אשרי

במעגלותיך בל נמוטו פעמי: ⁶ אני קראתיך כי תענני
 אל הט אונך לי שמע אמרתי: ⁷ הפלה חסדיך מושיע
 חוסים ממתקוממים בימינך: ⁸ שמרני כאישון בת עין
 בצל כנפיך תסתירני: ⁹ מפני רשעים זו שדוני איבי
 בנפש יקיפו עלי: ¹⁰ חלבמו סגרו פימו דברו בגאות:
¹¹ אשרינו עתה סבבוני עיניהם ישיתו לנשות בארץ:
¹² דמינו כאריה יכסוף לטרוף וככפיר ישב במסתרים:
¹³ קומה יהוה קדמה פניו הכריעהו פלטה נפשי מרשע
 חרבך: ¹⁴ ממתים ידך יהוה ממתים מחלד חלקם
 בחיים וצפינך תמלא בטנם ישבעו בנים והניחו יתרם
 לעולליהם: ¹⁵ אני בצדק אחזה פניך אשבעה בהקיץ
 תמונתך:

18

¹ למנצח לעבד יהוה לדוד אשר דבר ליהוה את
 דברי השירה הזאת ביום הציל יהוה אותו מכף כל
 איביו ומיד שאול ויאמר ארחמך יהוה חזקי: ² יהוה
 סלעי ומצודתי ומפלטי אלי צורי אחסה בו מגני וקרן
 ישעי משנבי: ³ מהלל אקרא יהוה ומן איבי אושע:
⁴ אפפוני חבלי מות ונחלי בליעל יבעתוני: ⁵ חבלי
 שאול סבבוני קדמוני מוקשי מות: ⁶ בצר לי אקרא
 יהוה ואל אלהי אשוע ישמע מהיכלו קולי ושועתי לפניו
 תבוא באזניו: ⁷ ותגעש ותרעש הארץ ומוסדי הרים ירגזו
 ויתגעשו כי חרה לו: ⁸ עלה עשן באפו ואש מפיו תאכל
 נחלים בערו ממנו: ⁹ ויט שמים וירד וערפל תחת רגליו:
¹⁰ וירכב על כרוב ויעף וידא על כנפי רוח: ¹¹ ישת חשך

סתרו סביבותיו סכתו חשכת מים עבי שחקים: 12 מנגה
 נגדו עביו עברו ברד וגחלי אש: 13 וירעם בשמים יהוה
 ועליון יתן קלו ברד וגחלי אש: 14 וישלח חציו ופיצם
 וברקים רב ויהמם: 15 ויראו אפיקי מים ויגלו מוסדות
 תבל מגערתך יהוה מנשמת רוח אפך: 16 ישלח ממרום
 יקחני ימשני ממים רבים: 17 יצילני מאיבי עז ומשנאי
 כי אמצו ממני: 18 יקדמוני ביום אידי ויהי יהוה למשען
 לי: 19 ויוציאני למרחב יחלצני כי חפץ בי: 20 יגמלני
 יהוה כצדקי כבר ידי ישיב לי: 21 כי שמרתי דרכי יהוה
 ולא רשעתי מאלהי: 22 כי כל משפטיו לנגדי וחקתיו לא
 אסיר מני: 23 ואהי תמים עמו ואשתמר מעוני: 24 וישב
 יהוה לי כצדקי כבר ידי לנגד עיניו: 25 עם חסיד
 תתחסד עם גבר תמים תתמם: 26 עם נבר תתברר ועם
 עקש תתפתל: 27 כי אתה עם עני תושיע ועינים רמות
 תשפיל: 28 כי אתה תאיר נרי יהוה אלהי יגיה חשכי:
 29 כי בכך ארץ גדוד ובאלהי אדלג שור: 30 האל תמים
 דרכו אמרת יהוה צרופה מגן הוא לכל החסים בו:
 31 כי מי אלוה מבלעדי יהוה ומי צור זולתי אלהינו:
 32 האל המאזרני חיל ויתן תמים דרכי: 33 משוה רגלי
 כאילות ועל במתי יעמידני: 34 מלמד ידי למלחמה
 ונחתה קשת נחושה זרועתי: 35 ותתן לי מגן ישעך וימינך
 תסעדני וענותך תרבני: 36 תרחיב צעדי תחתי ולא
 מעדו קרסלי: 37 ארדוף אויבי ואשיגם ולא אשוב עד
 כלותם: 38 אמחצם ולא יכלו קום יפלו תחת רגלי:
 39 ותאזרני חיל למלחמה תכריע קמי תחתי: 40 ואיבי

נתתה לי ערף ומשנאי אצמיתם: 41 ישועו ואין מושיע על יהוה ולא ענם: 42 ואשחקם כעפר על פני רוח כשיט חוצות אריקם: 43 תפלטני מריבי עם תשימני לראש גוים עם לא ידעתי יעבדוני: 44 לשמע און ישמעו לי בני נכר יכחשו לי: 45 בני נכר יבלו ויחרגו ממסגרותיהם: 46 חי יהוה וברוך צורי וירום אלוהי ישעי: 47 האל הנותן נקמות לי וידבר עמים תחתי: 48 מפלטי מאיבי אף מן קמי תרוממני מאיש חמס תצילני: 49 על כן אודך בגוים יהוה ולשמך אזמרה: 50 מגדל ישועות מלכו ועשה חסד למשיחו לדוד ולזרעו עד עולם:

19

1 למנצח מזמור לדוד השמים מספרים כבוד אל ומעשה ידיו מגיד הרקיע: 2 יום ליום יביע אמר ולילה ללילה יהוה דעת: 3 אין אמר ואין דברים בלי נשמע קולם: 4 בכל הארץ יצא קום ובקצה תבל מליהם לשמש שם אהל בהם: 5 והוא כחתן יצא מחפתו ישיש כגבור לרוץ ארח: 6 מקצה השמים מוצאו ותקופתו על קצותם ואין נסתר מחמתו: 7 תורת יהוה תמימה משיבת נפש עדות יהוה נאמנה מחכימת פתי: 8 פקודי יהוה ישרים משמחי לב מצות יהוה ברה מאירת עינים: 9 יראת יהוה טהורה עומדת לעד משפטי יהוה אמת צדקו יחדו: 10 הנחמדים מזהב ומפז רב ומתוקים מדבש ונפת צופים: 11 גם עבדך נזהר בהם בשמרם עקב רב: 12 שניאות מי יבין מנסתרות נקני: 13 גם מזדים חשך עבדך אל ימשלו בי אז איתם ונקיתי מפשע רב: 14 יהיו

לרצון אמרי פי והגיון לבי לפניך יהוה צורי וגאלי:

20

1 למנצח מזמור לדוד יענך יהוה ביום צרה ישנבך
 שם אלהי יעקב: 2 ישלח עזרך מקדש ומציון יסעדך:
 3 יזכר כל מנחתך ועולתך ידשנה סלה: 4 יתן לך
 כלבבך וכל עצתך ימלא: 5 נרננה בישועתך ובשם
 אלהינו נדגל ימלא יהוה כל משאלותיך: 6 עתה ידעתי
 כי הושיע יהוה משיחו יענהו משמי קדשו בגברות ישע
 ימינו: 7 אלה ברכב ואלה בסוסים ואנחנו בשם יהוה
 אלהינו נזכיר: 8 המה כרעו ונפלו ואנחנו קמנו ונתעורר:
 9 יהוה הושיעה המלך יעננו ביום קראנו:

21

1 למנצח מזמור לדוד יהוה בעזך ישמח מלך
 ובישועתך מה יגיל מאד: 2 תאות לבו נתתה לו וארשת
 שפתיו בל מנעת סלה: 3 כי תקדמנו ברכות טוב תשית
 לראשו עטרת פז: 4 חיים שאל ממך נתתה לו ארך ימים
 עולם ועד: 5 גדול כבודו בישועתך הוד והדר תשוה
 עליו: 6 כי תשיתהו ברכות לעד תחדהו בשמחה את
 פניך: 7 כי המלך בטח ביהוה ובחסד עליון בל ימוט:
 8 תמצא ירך לכל איביך ימינך תמצא שנאיך: 9 תשיתמו
 כתנור אש לעת פניך יהוה באפו יבלעם ותאכלם אש:
 10 פרימו מארץ תאבד וזרעם מבני אדם: 11 כי נטו
 עליך רעה חשבו מזמה בל יוכלו: 12 כי תשיתמו שכם
 במיתריך תכונן על פניהם: 13 רומה יהוה בעזך נשירה
 ונזמרה גבורתך:

22

1 למנצח על אילת השחר מזמור לדוד אלי אלי
 למה עזבתני רחוק מישועתי דברי שאנתי: 2 אלהי
 אקרא יומם ולא תענה ולילה ולא דומיה לי: 3 ואתה
 קדוש יושב תהלות ישראל: 4 בכך בטחו אבותינו בטחו
 ותפלטמו: 5 אליך זעקו ונמלטו בכך בטחו ולא בושו:
 6 ואנכי תולעת ולא איש חרפת אדם ובזוי עם: 7 כל
 ראי ילעגו לי יפטירו בשפה יניעו ראש: 8 גל אל יהוה
 יפלטוהו יצילהו כי חפץ בו: 9 כי אתה גחוי מבטן מבטיחי
 על שדי אמי: 10 עליך השלכתי מרחם מבטן אמי אלי
 אתה: 11 אל תרחק ממני כי צרה קרובה כי אין עוזר:
 12 סבבוני פרים רבים אבירי בשן כתרוני: 13 פצו עלי
 פיהם אריה טרף ושאג: 14 כמים נשפכתי והתפרדו כל
 עצמותי היה לבי כדונג נמס בתוך מעי: 15 יבש כחרש
 כחי ולשוני מדבק מלקוחי ולעפר מות תשפתני: 16 כי
 סבבוני כלבים עדת מרעים הקיפוני כארי ידי ורגלי:
 17 אספר כל עצמותי המה יביטו יראו בי: 18 יחלקו בגדי
 להם ועל לבושי יפילו גורל: 19 ואתה יהוה אל תרחק
 אילותי לעזרתי חושה: 20 הצילה מחרב נפשי מיד כלב
 יחידתי: 21 הושיעני מפי אריה ומקרני רמים עניתני:
 22 אספרה שמך לאחי בתוך קהל אהללך: 23 יראי
 יהוה הללוהו כל זרע יעקב כבדוהו וגורו ממנו כל זרע
 ישראל: 24 כי לא בזה ולא שקץ ענות עני ולא הסתיר
 פניו ממנו ובשועו אליו שמע: 25 מאתך תהלתי בקהל רב
 נדרי אשלם נגד יראיו: 26 יאכלו ענוים וישבעו יהללו

יהוה דרשיו יחי לבבכם לעד: ²⁷ יזכרו וישבו אל יהוה כל אפסי ארץ וישתחוו לפניך כל משפחות גוים: ²⁸ כי ליהוה המלוכה ומשל בגוים: ²⁹ אכלו וישתחוו כל דשני ארץ לפניו יכרעו כל יורדי עפר ונפשו לא חיה: ³⁰ זרע יעבדנו יספר לאדני לדור: ³¹ יבאו ויגידו צדקתו לעם נולד כי עשה:

23

¹ מזמור לדוד יהוה רעי לא אחסר: ² בנאות דשא ירביצני על מי מנחות ינהלני: ³ נפשי ישובב ינחני במעגלי צדק למען שמו: ⁴ גם כי אלך בגיא צלמות לא אירא רע כי אתה עמדי שבטך ומשענתך המה ינחמני: ⁵ תערך לפני שלחן נגד צררי דשנת בשמן ראשי כוסי רויה: ⁶ אך טוב וחסד ירדפוני כל ימי חיי ושבתני בבית יהוה לארץ ימים:

24

¹ לדוד מזמור ליהוה הארץ ומלואה תבל וישבי בה: ² כי הוא על ימים יסדה ועל נהרות יכוננה: ³ מי יעלה בהר יהוה ומי יקום במקום קדשו: ⁴ נקי כפים ובר לבב אשר לא נשא לשוא נפשי ולא נשבע למרמה: ⁵ ישא ברכה מאת יהוה וצדקה מאלהי ישעו: ⁶ זה דור דרשו מבקשי פניך יעקב סלה: ⁷ שאו שערים ראשיכם והנשאו פתחי עולם ויבוא מלך הכבוד: ⁸ מי זה מלך הכבוד יהוה עזוז וגבור יהוה גבור מלחמה: ⁹ שאו שערים ראשיכם ושאו פתחי עולם ויבא מלך הכבוד: ¹⁰ מי הוא זה מלך הכבוד יהוה צבאות הוא מלך הכבוד סלה:

25

1 לדוד אליך יהוה נפשי אשא: 2 אלהי בך בטחתי
 אל אבושה אל יעלצו איבי לי: 3 גם כל קויך לא יבשו
 יבשו הבוגדים ריקם: 4 דרכיך יהוה הודיעני ארחותיך
 למדני: 5 הדריכני באמתך ולמדני כי אתה אלהי ישעי
 אותך קויתי כל היום: 6 זכר רחמיך יהוה וחסדיך כי
 מעולם המה: 7 חטאות נעורי ופשעי אל תזכר כחסדך
 זכר לי אתה למען טובך יהוה: 8 טוב וישר יהוה על
 כן יורה חטאים בדרך: 9 ידרך עניים במשפט וילמד
 עניים דרכו: 10 כל ארחות יהוה חסד ואמת לנצרי
 בריתו ועדתיו: 11 למען שמך יהוה וסלחת לעוני כי
 רב הוא: 12 מי זה האיש ירא יהוה יורנו בדרך יבחר:
 13 נפשו בטוב תלין וזרעו יירש ארץ: 14 סוד יהוה
 ליראיו ובריתו להודיעם: 15 עיני תמיד אל יהוה כי הוא
 יוציא מרשת רגלי: 16 פנה אלי וחנני כי יחיד ועני אני:
 17 צרות לבבי הרחיבו ממצוקותי הוציאני: 18 ראה עניי
 ועמלי ושא לכל חטאותי: 19 ראה אויבי כי רבו ושנאת
 חמס שנאוני: 20 שמרה נפשי והצילני אל אבוש כי חסיתי
 בך: 21 תם וישר יצרוני כי קויתיך: 22 פדה אלהים את
 ישראל מכל צרותיו:

26

1 לדוד שפטני יהוה כי אני בתמי הלכתי וביהוה
 בטחתי לא אמער: 2 בחנני יהוה ונסני צרופה כליותי
 ולבי: 3 כי חסדך לנגד עיני והתהלכתי באמתך: 4 לא
 ישבתי עם מתי שוא ועם נעלמים לא אבוא: 5 שנאתי
 קהל מרעים ועם רשעים לא אשב: 6 ארחץ בנקיון

כפי ואסבבה את מזבחתך יהוה: ⁷ לשמע בקול תודה ולספר כל נפלאותיך: ⁸ יהוה אהבתי מעון ביתך ומקום משכן כבודך: ⁹ אל תאסף עם חטאים נפשי ועם אנשי דמים חיי: ¹⁰ אשר בידיהם זמה וימינם מלאה שחר: ¹¹ ואני בתמי אלך פדני וחסני: ¹² רגלי עמדה במישור במקהלים אברך יהוה:

27

¹ לדוד יהוה אורי וישעי ממי אירא יהוה מעוז חיי ממי אפחד: ² בקרב עלי מרעים לאכל את בשרי צרי ואיבי לי המה כשלו ונפלו: ³ אם תחנה עלי מחנה לא יירא לבי אם תקום עלי מלחמה בזאת אני בוטח: ⁴ אחת שאלתי מאת יהוה אותה אבקש שבתי בבית יהוה כל ימי חיי לחזות בנעם יהוה ולבקר בהיכלו: ⁵ כי יצפנני בסכה ביום רעה יסתרני בסתר אהלו בצור ירוממני: ⁶ ועתה ירום ראשי על איבי סביבותי ואזבחה באהלו זבחי תרועה אשירה ואזמרה ליהוה: ⁷ שמע יהוה קולי אקרא וחסני וענני: ⁸ לך אמר לבי בקשו פני את פניך יהוה אבקש: ⁹ אל תסתר פניך ממני אל תט באף עבדך עזרתי היית אל תשני ואל תעזבני אלהי ישעי: ¹⁰ כי אבי ואמי עזבוני ויהוה יאספני: ¹¹ הורני יהוה דרכך ונחני בארח מישור למען שוררי: ¹² אל תתנני בנפש צרי כי קמו בי עדי שקר ויפח חמס: ¹³ לולא האמנתי לראות בטוב יהוה בארץ חיים: ¹⁴ קוה אל יהוה חזק ויאמץ לבך וקוה אל יהוה:

28

1 לדוד אליך יהוה אקרא צורי אל תחרש ממני פן
 תחשה ממני ונמשלתי עם יורדי בור: 2 שמע קול תחנוני
 בשועי אליך בנשאי ידי אל דביר קדשך: 3 אל תמשכני
 עם רשעים ועם פעלי און דברי שלום עם רעיהם ורעה
 בלבבם: 4 תן להם כפעלם וכרע מעלליהם כמעשה
 ידיהם תן להם השב גמולם להם: 5 כי לא יבינו אל
 פעלת יהוה ואל מעשה ידיו יהרסם ולא יבנם: 6 ברוך
 יהוה כי שמע קול תחנוני: 7 יהוה עזי ומגני בו בטח
 לבי ונעזרתי ויעלז לבי ומשירי אהודנו: 8 יהוה עז למו
 ומעוז ישועות משיחו הוא: 9 הושיעה את עמך וברך את
 נחלתך ורעם ונשאם עד העולם:

29

1 מזמור לדוד הבו ליהוה בני אלים הבו ליהוה כבוד
 ועז: 2 הבו ליהוה כבוד שמו השתחוו ליהוה בהדרת
 קדש: 3 קול יהוה על המים אל הכבוד הרעים יהוה
 על מים רבים: 4 קול יהוה בכח קול יהוה בהדר:
 5 קול יהוה שבר ארזים וישבר יהוה את ארזי הלבנון:
 6 וירקידם כמו עגל לבנון ושרין כמו בן ראמים: 7 קול
 יהוה חצב להבות אש: 8 קול יהוה יחיל מדבר יחיל
 יהוה מדבר קדש: 9 קול יהוה יחולל אילות ויחשף
 יערות ובהיכלו כלו אמר כבוד: 10 יהוה למבול ישב
 וישב יהוה מלך לעולם: 11 יהוה עז לעמו יתן יהוה
 יברך את עמו בשלום:

30

1 מזמור שיר חנכת הבית לדוד ארוממך יהוה כי
 דליתני ולא שמחת איבי לי: 2 יהוה אלהי שועתי אליך
 ותרפאני: 3 יהוה העלית מן שאול נפשי חייתני מיורדי
 בור: 4 זמרו ליהוה חסידיו והודו לזכר קדשו: 5 כי
 רגע באפו חיים ברצונו בערב ילין בכי ולבקר רנה:
 6 ואני אמרתי בשלוי בל אמוט לעולם: 7 יהוה ברצונך
 העמדתה להררי עז הסתרת פניך הייתי נבהל: 8 אליך
 יהוה אקרא ואל אדני אתחנן: 9 מה בצע בדמי ברדתי
 אל שחת היודך עפר היגיד אמתך: 10 שמע יהוה וחנני
 יהוה היה עזר לי: 11 הפכת מספדי למחול לי פתחת
 שקי ותאזרני שמחה: 12 למען יזמרך כבוד ולא ידם
 יהוה אלהי לעולם אודך:

31

1 למנצח מזמור לדוד בכ יהוה חסיתי אל אבושה
 לעולם בצדקתך פלטני: 2 הטח אלי אונך מהרה
 הצילני היה לי לצור מעוז לבית מצודות להושיעני:
 3 כי סלעי ומצודתי אתה ולמען שמך תנחני ותנהלני:
 4 תוציאני מרשת זו טמנו לי כי אתה מעוזי: 5 בידך
 אפקיד רוחי פדיתה אותי יהוה אל אמת: 6 שנאתי
 השמרים הבלי שוא ואני אל יהוה בטחתי: 7 אגילה
 ואשמחה בחסדך אשר ראית את עניי ידעת בצרות
 נפשי: 8 ולא הסגרתני ביד אויב העמדת במרחב רגלי:
 9 חנני יהוה כי צר לי עששה בכעס עיני נפשי ובטני:
 10 כי כלו ביגון חיי ושנותי באנחה כשל בעוני כחי

ועצמי עששו: 11 מכל צררי הייתי חרפה ולשכני מאד
 ופחד למידעי ראי בחוץ נדרו ממני: 12 נשכחתי כמת
 מלב הייתי ככלי אבד: 13 כי שמעתי דבת רבים מגור
 מסביב בהוסדם יחד עלי לקחת נפשי זממו: 14 ואני
 עליך בטחתי יהוה אמרתי אלהי אתה: 15 בידך עתתי
 הצילני מיד אויבי ומרדפי: 16 האירה פניך על עבדך
 הושיעני בחסדך: 17 יהוה אל אבושה כי קראתיך יבשו
 רשעים ידמו לשאול: 18 תאלמנה שפתי שקר הדברות
 על צדיק עתק בגאווה ובוז: 19 מה רב טובך אשר צפנת
 ליראיך פעלת לחסים בך נגד בני אדם: 20 תסתירם
 בסתר פניך מרכסי איש תצפנם בסכה מריב לשנות:
 21 ברוך יהוה כי הפליא חסדו לי בעיר מצור: 22 ואני
 אמרתי בחפזי נגרותי מנגד עיניך אכן שמעת קול תחנוני
 בשועי אליך: 23 אהבו את יהוה כל חסידיו אמונים נצר
 יהוה ומשלם על יתר עשה גאווה: 24 חזקו ויאמץ לבבכם
 כל המיחלים ליהוה:

32

1 לרוד משכיל אשרי נשוי פשע כסוי חטאה: 2 אשרי
 אדם לא יחשב יהוה לו עון ואין ברוחו רמיה: 3 כי
 החרשתי בלו עצמי בשאנתי כל היום: 4 כי יומם ולילה
 תכבד עלי ידך נהפך לשדי בחרבני קיץ סלה: 5 חטאתי
 אודיעך ועוני לא כסיתי אמרתי אודה עלי פשעי ליהוה
 ואתה נשאת עון חטאתי סלה: 6 על זאת יתפלל כל חסיד
 אליך לעת מצא רק לשטף מים רבים אליו לא יגיעו:
 7 אתה סתר לי מצר תצרני רני פלט תסובבני סלה:

8 אשכילך ואורך בדרך זו תלך איעצה עליך עיני: 9 אל תהיו כסוס כפרד אין הבין במתג ורסן עדין לבלום בל קרב אליך: 10 רבים מכאובים לרשע והבוטח ביהוה חסד יסובבנו: 11 שמחו ביהוה וגילו צדיקים והרנינו כל ישרי לב:

33

1 רננו צדיקים ביהוה לישרים נאווה תהלה: 2 הודו ליהוה בכנור בנבל עשור זמרו לו: 3 שירו לו שיר חדש היטיבו נגן בתרועה: 4 כי ישר דבר יהוה וכל מעשהו באמונה: 5 אהב צדקה ומשפט חסד יהוה מלאה הארץ: 6 בדבר יהוה שמים נעשו וברוח פיו כל צבאם: 7 כנס כנר מי הים נתן באצרות תהומות: 8 ייראו מיהוה כל הארץ ממנו יגורו כל ישרי תבל: 9 כי הוא אמר ויהי הוא צוה ויעמד: 10 יהוה הפיר עצת גוים הניא מחשבות עמים: 11 עצת יהוה לעולם תעמד מחשבות לבו לדר ודר: 12 אשרי הגוי אשר יהוה אלהיו העם בחר לנחלה לו: 13 משמים הביט יהוה ראה את כל בני האדם: 14 ממכון שבתו השגיח אל כל ישרי הארץ: 15 היצר יחד לבם המבין אל כל מעשיהם: 16 אין המלך נושע ברב חיל גבור לא ינצל ברב כח: 17 שקר הסוס לתשועה וברב חילו לא ימלט: 18 הנה עין יהוה אל יראיו למיחלים לחסדו: 19 להציל ממות נפשם ולחיותם ברעב: 20 נפשנו חכתה ליהוה עזרנו ומגננו הוא: 21 כי בו ישמח לבנו כי בשם קדשו בטחנו: 22 יהי חסדך יהוה עלינו כאשר יחלנו לך:

34

1 לדוד בשנותו את טעמו לפני אבימלך ויגרשהו
 וילך אברכה את יהוה בכל עת תמיד תהלתו בפי:
 2 ביהוה תתהלל נפשי ישמעו עניים וישמחו: 3 גדלו
 ליהוה אתי ונרוממה שמו יחדו: 4 דרשתי את יהוה וענני
 ומכל מגורותי הצילני: 5 הביטו אליו ונהרו ופניהם אל
 יחפרו: 6 זה עני קרא ויהוה שמע ומכל צרותיו הושיעו:
 7 חנה מלאך יהוה סביב ליראיו ויחלצם: 8 טעמו וראו
 כי טוב יהוה אשרי הגבר יחסה בו: 9 יראו את יהוה
 קדשיו כי אין מחסור ליראיו: 10 כפירים רשו ורעבו
 ודרשי יהוה לא יחסרו כל טוב: 11 לכו בנים שמעו לי
 יראת יהוה אלמדכם: 12 מי האיש החפץ חיים אהב ימים
 לראות טוב: 13 נצר לשונך מרע ושפתיך מדבר מרמה:
 14 סור מרע ועשה טוב בקש שלום ורדפהו: 15 עיני
 יהוה אל צדיקים ואזניו אל שועתם: 16 פני יהוה בעשי
 רע להכרית מארץ זכרם: 17 צעקו ויהוה שמע ומכל
 צרותם הצילם: 18 קרוב יהוה לנשברי לב ואת דכאי
 רוח יושיע: 19 רבות רעות צדיק ומכלם יצילנו יהוה:
 20 שמר כל עצמותיו אחת מהנה לא נשברה: 21 תמותת
 רשע רעה ושנאי צדיק יאשמו: 22 פודה יהוה נפש עבדיו
 ולא יאשמו כל החסים בו:

35

1 לדוד ריבה יהוה את יריבי לחם את לחמי: 2 החזק
 מגן וצנה וקומה בעזרת: 3 והרק חנית וסגר לקראת
 רדפי אמר לנפשי ישעתך אני: 4 יבשו ויכלמו מבקשי
 נפשי יסגו אחור ויחפרו חשבי רעתי: 5 יהיו כמץ לפני

רוח ומלאך יהוה רוחה: 6 יהי דרכם חשך וחלקלקות ומלאך יהוה רדפם: 7 כי חנם טמנו לי שחת רשתם חנם חפרו לנפשי: 8 תבואהו שואה לא ידע ורשתו אשר טמן תלכדו בשואה יפל בה: 9 ונפשי תגיל ביהוה תשיש בישועתו: 10 כל עצמותי תאמרנה יהוה מי כמוך מציל עני מחזק ממנו ועני ואביון מגזלו: 11 יקומו עדי חמס אשר לא ידעתי ישאלוני: 12 ישלמוני רעה תחת טובה שכול לנפשי: 13 ואני בחלותם לבושי שק עניתי בצום נפשי ותפלתי על חיקי תשוב: 14 כרע כאח לי התהלכתי כאבל אם קדר שחיתי: 15 ובצלעי שמחו ונאספו נאספו עלי נכים ולא ידעתי קרעו ולא דמו: 16 בחנפי לעני מעוג חרק עלי שנימו: 17 אדני כמה תראה השיבה נפשי משאיהם מכפירים יחידתי: 18 אודך בקהל רב בעם עצום אהללך: 19 אל ישמחו לי איבי שקר שנאי חנם יקרצו עין: 20 כי לא שלום ידברו ועל רגעי ארץ דברי מרמות יחשבון: 21 וירחיבו עלי פיהם אמרו האח האח ראתה עינינו: 22 ראיתה יהוה אל תחרש אדני אל תרחק ממני: 23 העירה והקיצה למשפטי אלהי ואדני לריבי: 24 שפטני כצדקך יהוה אלהי ואל ישמחו לי: 25 אל יאמרו בלבם האח נפשנו אל יאמרו בלענוהו: 26 יבשו ויחפרו יחדו שמחי רעתי ילבשו בשת וכלמה המגדילים עלי: 27 ירנו וישמחו חפצי צדקי ויאמרו תמיד יגדל יהוה החפץ שלום עבדו: 28 ולשוני תהגה צדקך כל היום תהלתך:

36

1 למנצח לעבד יהוה לדוד נאם פשע לרשע בקרב לבי אין פחד אלהים לנגד עיניו: 2 כי החליק אליו בעיניו למצא עונו לשנא: 3 דברי פיו און ומרמה חדל להשכיל להיטיב: 4 און יחשב על משכבו יתיצב על דרך לא טוב רע לא ימאס: 5 יהוה בהשמים חסדך אמונתך עד שחקים: 6 צדקתך כהררי אל משפטך תהום רבה אדם ובהמה תושיע יהוה: 7 מה יקר חסדך אלהים ובני אדם בצל כנפיך יחסיון: 8 ירוין מדשן ביתך ונחל עדניך תשקם: 9 כי עמד מקור חיים באורך נראה אור: 10 משך חסדך לידעיך וצדקתך לישרי לב: 11 אל תבואני רגל גאווה ויד רשעים אל תנדני: 12 שם נפלו פעלי און דחו ולא יכלו קום:

37

1 לדוד אל תתחר במרעים אל תקנא בעשי עולה: 2 כי כחציר מהרה ימלו וכירק דשא יבולון: 3 בטח ביהוה ועשה טוב שכן ארץ ורעה אמונה: 4 והתענג על יהוה ויתן לך משאלת לבך: 5 גול על יהוה דרכך ובטח עליו והוא יעשה: 6 והוציא כאור צדקך ומשפטך כצהרים: 7 דום ליהוה והתחולל לו אל תתחר במצליח דרכו באיש עשה מזמות: 8 הרף מאף ועזב חמה אל תתחר אך להרע: 9 כי מרעים יכרתון וקוי יהוה חמה יירשו ארץ: 10 ועוד מעט ואין רשע והתבוננת על מקומו ואיננו: 11 ועניים יירשו ארץ והתענגו על רב שלום: 12 זמם

רשע לצדיק וחרק עליו שניו: 13 אדני ישחק לו כי
 ראה כי יבא יומו: 14 חרב פתחו רשעים ודרכו קשתם
 להפיל עני ואביון לטבוח ישרי דרך: 15 חרבם תבוא
 בלבם וקשתותם תשברנה: 16 טוב מעט לצדיק מהמון
 רשעים רבים: 17 כי זרועות רשעים תשברנה וסומך
 צדיקים יהוה: 18 יודע יהוה ימי תמימם ונחלתם לעולם
 תהיה: 19 לא יבשו בעת רעה ובימי רעבון ישבעו:
 20 כי רשעים יאבדו ואיבי יהוה כיקר כרים כלו בעשן
 כלו: 21 לזה רשע ולא ישלם וצדיק חונן ונותן: 22 כי
 מברכיו יירשו ארץ ומקלליו יכרתו: 23 מיהוה מצעדי
 גבר כוננו ודרכו יחפץ: 24 כי יפל לא יוטל כי יהוה
 סומך ידו: 25 נער הייתי גם זקנתי ולא ראיתי צדיק
 נעזב וזרעו מבקש לחם: 26 כל היום חונן ומלוה וזרעו
 לברכה: 27 סור מרע ועשה טוב ושכן לעולם: 28 כי
 יהוה אהב משפט ולא יעזב את חסידיו לעולם נשמרו
 וזרע רשעים נכרת: 29 צדיקים יירשו ארץ וישכנו לעד
 עליה: 30 פי צדיק יהנה חכמה ולשונו תדבר משפט:
 31 תורת אלהיו בלבו לא תמעד אשריו: 32 צופה רשע
 לצדיק ומבקש להמיתו: 33 יהוה לא יעזבנו בידו ולא
 ירשיענו בהשפטו: 34 קוה אל יהוה ושמר דרכו וירוממך
 לרשת ארץ בהכרת רשעים תראה: 35 ראיתי רשע עריץ
 ומתערה כאזרח רענן: 36 ויעבר והנה איננו ואבקשהו
 ולא נמצא: 37 שמר תם וראה ישר כי אחרית לאיש
 שלום: 38 ופשעים נשמדו יחדו אחרית רשעים נכרתה:
 39 ותשועת צדיקים מיהוה מעוזם בעת צרה: 40 ויעזרם

יהוה ויפלטם יפלטם מרשעים ויושיעם כי חסו בו:

38

1 מזמור לדוד להזכיר יהוה אל בקצפך תוכיחני
 ובחמתך תיסרני: 2 כי חציך נחתו בי ותנחת עלי ירך:
 3 אין מתם בבשרי מפני זעמך אין שלום בעצמי מפני
 חטאתי: 4 כי עונתי עברו ראשי כמשא כבד יכבדו ממני:
 5 הבאישו נמקו חבורתי מפני אולתי: 6 נעויתי שחתי עד
 מאד כל היום קדר הלכתי: 7 כי כסלי מלאו נקלה
 ואין מתם בבשרי: 8 נפונותי ונדכיתי עד מאד שאנתי
 מנהמת לבי: 9 אדני נגדך כל תאותי ואנחתני ממך לא
 נסתרה: 10 לבי סחרחר עזבני כחי ואור עיני גם הם
 אין אתי: 11 אהבי ורעי מנגד ננעי יעמדו וקרובי מרחק
 עמדו: 12 וינקשו מבקשי נפשי ודרשי רעתי דברו הוות
 ומרמות כל היום יהגו: 13 ואני כחרש לא אשמע וכאלם
 לא יפתח פיו: 14 ואהי כאיש אשר לא שמע ואין בפיו
 תוכחות: 15 כי לך יהוה הוחלתי אתה תענה אדני אלהי:
 16 כי אמרתי פן ישמחו לי במוט רגלי עלי הגדילו:
 17 כי אני לצלע נכון ומכאובי נגדי תמיד: 18 כי עוני
 אגיד אדאג מחטאתי: 19 ואיבי חיים עצמו ורבו שנאי
 שקר: 20 ומשלמי רעה תחת טובה ישטנוני תחת רדופי
 טוב: 21 אל תעזבני יהוה אלהי אל תרחק ממני: 22 חושה
 לעזרתי אדני תשועתי:

39

1 למנצח לידיתון מזמור לדוד אמרתי אשמרה דרכי
 מחטוא בלשוני אשמרה לפי מחסום בעד רשע לנגדי:
 2 נאלמתי דומיה החשיתי משוב וכאבי נעכר: 3 חם לבי

בקרבי בהגיגי תבער אש דברתי בלשוני: 4 הודיעני יהוה קצי ומדת ימי מה היא אדעה מה חדל אני: 5 הנה שפחות נתתה ימי וחלדי כאין נגדך אך כל הבל כל אדם נצב סלה: 6 אך בצלם יתהלך איש אך הבל יהמיון יצבר ולא ידע מי אספם: 7 ועתה מה קויתי אדני תוחלתי לך היא: 8 מכל פשעי הצילני חרפת נבל אל תשימני: 9 נאלמתי לא אפתח פי כי אתה עשית: 10 הסר מעלי נגעך מתגרת ירך אני כליתי: 11 בתוכחות על עון יסרת איש ותמס כעש חמודו אך הבל כל אדם סלה: 12 שמעה תפלתי יהוה ושועתי האזינה אל דמעתי אל תחרש כי גר אנכי עמך תושב ככל אבותי: 13 השע ממני ואבליגה בטרם אלך ואינני:

40

1 למנצח לדוד מזמור קוה קויתי יהוה ויט אלי וישמע שועתי: 2 ויעלני מבור שאון מטיט היון ויקם על סלע רגלי כונן אשרי: 3 ויתן בפי שיר חדש תהלה לאלהינו יראו רבים וייראו ויבטחו ביהוה: 4 אשרי הגבר אשר שם יהוה מבטחו ולא פנה אל רהבים ושטי כזב: 5 רבות עשית אתה יהוה אלהי נפלאותיך ומחשבתך אלינו אין ערך אליך אנידה ואדברה עצמו מספר: 6 זבח ומנחה לא חפצת אזנים כרית לי עולה וחטאה לא שאלת: 7 אז אמרתי הנה באתי במגלת ספר כתוב עלי: 8 לעשות רצונך אלהי חפצתי ותורתך בתוך מעי: 9 בשרתי צדק בקהל רב הנה שפתי לא אכלא יהוה אתה ידעת: 10 צדקתך לא כסיתי בתוך לבי אמונתך

ותשועתך אמרתי לא כחדתי חסדך ואמתך לקהל רב:
 11 אתה יהוה לא תכלא רחמיך ממני חסדך ואמתך
 תמיד יצרוני: 12 כי אפפו עלי רעות עד אין מספר
 השיגוני עונתי ולא יכלתי לראות עצמו משערות ראשי
 ולבי עזבני: 13 רצה יהוה להצילני יהוה לעזרתי חושה:
 14 יבשו ויחפרו יחד מבקשי נפשי לספותה יסגו אחור
 ויכלמו חפצי רעתי: 15 ישמו על עקב בשתם האמרים
 לי האח האח: 16 ישישו וישמחו בך כל מבקשיך יאמרו
 תמיד יגדל יהוה אהבי תשועתך: 17 ואני עני ואביון אדני
 יחשב לי עזרתי ומפלטי אתה אלהי אל תאחר:

41

1 למנצח מזמור לדוד אשרי משכיל אל דל ביום רעה
 ימלטהו יהוה: 2 יהוה ישמרהו ויחיהו יאשר בארץ ואל
 תתנהו בנפש איביו: 3 יהוה יסעדנו על ערש דוי כל
 משכבו הפכת בחליו: 4 אני אמרתי יהוה חנני רפאה
 נפשי כי חטאתי לך: 5 אויבי יאמרו רע לי מתי ימות
 ואבד שמו: 6 ואם בא לראות שוא ידבר לבו יקבץ
 און לו יצא לחוץ ידבר: 7 יחד עלי יתלחשו כל שנאי
 עלי יחשבו רעה לי: 8 דבר בליעל יצוק בו ואשר
 שכב לא יוסיף לקום: 9 גם איש שלומי אשר בטחתי
 בו אוכל לחמי הגדיל עלי עקב: 10 ואתה יהוה חנני
 והקימני ואשלמה להם: 11 בזאת ידעתי כי חפצת בי
 כי לא יריע איבי עלי: 12 ואני בתמי תמכת בי ותציבני
 לפניך לעולם: 13 ברוך יהוה אלהי ישראל מהעולם
 ועד העולם אמן ואמן:

42

1 למנצח משכיל לבני קרח כאיל תערג על אפיקי
 מים כן נפשי תערג אליך אלהים: 2 צמאה נפשי לאלהים
 לאל חי מתי אבוא ואראה פני אלהים: 3 היתה לי דמעתי
 לחם יומם ולילה באמר אלי כל היום איה אלהיך:
 4 אלה אזכרה ואשפכה עלי נפשי כי אעבר בסך אדרם
 עד בית אלהים בקול רנה ותודה המון חוגג: 5 מה
 תשתוחחי נפשי ותהמי עלי הוחילי לאלהים כי עוד
 אודנו ישועות פניו: 6 אלהי עלי נפשי תשתוחח על כן
 אזכרך מארץ ירדן וחרמונים מהר מצער: 7 תהום אל
 תהום קורא לקול צנוריד כל משבריד וגליך עלי עברו:
 8 יומם יצוה יהוה חסדו ובלילה שירה עמי תפלה לאל
 חי: 9 אומרה לאל סלעי למה שכחתני למה קדר אלך
 בלחץ אויב: 10 ברצח בעצמותי חרפוני צוררי באמרם
 אלי כל היום איה אלהיך: 11 מה תשתוחחי נפשי ומה
 תהמי עלי הוחילי לאלהים כי עוד אודנו ישועת פני
 ואלהי:

43

1 שפטני אלהים וריבה ריבי מגוי לא חסיד מאיש
 מרמה ועולה תפלטני: 2 כי אתה אלהי מעוזי למה
 זנחתני למה קדר אתהלך בלחץ אויב: 3 שלח אורך
 ואמתך המה ינחוני יביאוני אל הר קדשך ואל
 משכנותיך: 4 ואבואה אל מזבח אלהים אל אל שמחת
 גילי ואודך בכנור אלהים אלהי: 5 מה תשתוחחי נפשי
 ומה תהמי עלי הוחילי לאלהים כי עוד אודנו ישועת
 פני ואלהי:

44

1 למנצח לבני קרח משכיל אלהים באזנינו שמענו
 אבותינו ספרו לנו פעל פעלת בימיהם בימי קדם:
 2 אתה ירך גוים הורשת ותטעם תרע לאמים ותשלחם:
 3 כי לא בחרבם ירשו ארץ וזרועם לא הושיעה לנו כי
 ימינך וזרועך ואור פניך כי רציתם: 4 אתה הוא מלכי
 אלהים צוה ישועות יעקב: 5 בך צרינו נגח בשמך נבוס
 קמינו: 6 כי לא בקשתי אבטח וחרבי לא תושיעני: 7 כי
 הושעתנו מצרינו ומשנאינו הבישות: 8 באלהים הללנו
 כל היום ושמך לעולם נודה סלה: 9 אף זנחת ותכלימנו
 ולא תצא בצבאותינו: 10 תשיבנו אחר מני צר ומשנאינו
 שסו לנו: 11 תתננו כצאן מאכל ובגוים זריתנו: 12 תמכר
 עמך בלא הון ולא רבית במחיריהם: 13 תשימנו חרפה
 לשכנינו לעג וקלס לסביבותינו: 14 תשימנו משל בגוים
 מנוד ראש בל אמים: 15 כל היום כלמתי נגדי ובשת פני
 כסתני: 16 מקול מחרף ומגדף מפני אויב ומתנקם: 17 כל
 זאת באתנו ולא שכחנוך ולא שקרנו בבריתך: 18 לא נסוג
 אחר לבנו ותט אשרינו מני ארחך: 19 כי דכיתנו במקום
 תנים ותכס עלינו בצלמות: 20 אם שכחנו שם אלהינו
 ונפרש כפינו לאל זר: 21 הלא אלהים יחקר זאת כי הוא
 ידע תעלמות לב: 22 כי עליך הרגנו כל היום נחשבנו
 כצאן טבחה: 23 עורה למה תישן אדני הקיצה אל תזנח
 לנצח: 24 למה פניך תסתיר תשכח ענינו ולחצנו: 25 כי
 שחה לעפר נפשנו דבקה לארץ בטננו: 26 קומה עזרתה
 לנו ופדנו למען חסדך:

45

1 למנצח על ששנים לבני קרח משכיל שיר יודית
 רחש לבי דבר טוב אמר אני מעשי למלך לשוני עט
 סופר מהיר: 2 יפיית מבני אדם הוצק חן בשפתותיך
 על כן ברכך אלהים לעולם: 3 חגור חרבך על ירך
 גבור הודך והדרך: 4 והדרך צלח רכב על דבר
 אמת וענוה צדק ותורך נוראות ימינך: 5 חציך שנונים
 עמים תחתוך יפלו בלב אויבי המלך: 6 כסאך אלהים
 עולם ועד שבט מישר שבט מלכותך: 7 אהבת צדק
 ותשנא רשע על כן משחך אלהים אלהיך שמן ששון
 מחברריך: 8 מר ואהלות קציעות כל בגדתיך מן היכלי
 שן מני שמחוך: 9 בנות מלכים ביקרותיך נצבה שגל
 לימינך בכתם אופיר: 10 שמעי בת וראי והטי אזנך
 ושכחי עמך ובית אביך: 11 ויתאו המלך יפיך כי הוא
 אדניך והשתחוי לו: 12 ובת צר במנחה פניך יחלו
 עשירי עם: 13 כל כבודה בת מלך פנימה ממשבצות
 זהב לבושה: 14 לרקמות תובל למלך בתולות אחריה
 רעותיה מובאות לך: 15 תובלנה בשמחת וגיל תבאינה
 בהיכל מלך: 16 תחת אבתך יהיו בניך תשיתמו לשרים
 בכל הארץ: 17 אזכירה שמך בכל דר ודר על כן עמים
 יהודך לעלם ועד:

46

1 למנצח לבני קרח על עלמות שיר אלהים לנו מחסה
 ועז עזרה בצרות נמצא מאד: 2 על כן לא נירא בהמיר

ארץ ובמוט הרים בלב ימים: 3 יהמו יחמרו מימיו ירעשו הרים בגאותו סלה: 4 נהר פלגיו ישמחו עיר אלהים קדש משכני עליון: 5 אלהים בקרבה בל תמוט יעזרה אלהים לפנות בקר: 6 המו גוים מטו ממלכות נתן בקולו תמוג ארץ: 7 יהוה צבאות עמנו משגב לנו אלהי יעקב סלה: 8 לכו חזו מפעלות יהוה אשר שם שמות בארץ: 9 משבית מלחמות עד קצה הארץ קשת ישבר וקצץ חנית עגלות ישרף באש: 10 הרפו ודעו כי אנכי אלהים ארום בגוים ארום בארץ: 11 יהוה צבאות עמנו משגב לנו אלהי יעקב סלה:

47

1 למנצח לבני קרח מזמור כל העמים תקעו כף הריעו לאלהים בקול רנה: 2 כי יהוה עליון נורא מלך גדול על כל הארץ: 3 ידבר עמים תחתינו ולאמים תחת רגלינו: 4 יבחר לנו את נחלתנו את גאון יעקב אהב סלה: 5 עלה אלהים בתרועה יהוה בקול שופר: 6 זמרו אלהים זמרו זמרו למלכנו זמרו: 7 כי מלך כל הארץ אלהים זמרו משכיל: 8 מלך אלהים על גוים אלהים ישב על כסא קדשו: 9 נדיבי עמים נאספו עם אלהי אברהם כי לאלהים מגני ארץ מאד נעלה:

48

1 שיר מזמור לבני קרח גדול יהוה ומהלל מאד בעיר אלהינו הר קדשו: 2 יפה נוף משוש כל הארץ הר ציון

ורכתי צפון קרית מלך רב: ³ אלהים בארמנותיה נודע
 למשגב: ⁴ כי הנה המלכים נועדו עברו יחדו: ⁵ המה
 ראו כן תמהו נבהלו נחפזו: ⁶ רעדה אחזתם שם חיל
 כולדה: ⁷ ברוח קדים תשבר אניות תרשיש: ⁸ כאשר
 שמענו כן ראינו בעיר יהוה צבאות בעיר אלהינו אלהים
 יכוננה עד עולם סלה: ⁹ דמינו אלהים חסדך בקרב
 היכלך: ¹⁰ כשמך אלהים כן תהלתך על קצוי ארץ
 צדק מלאה ימינך: ¹¹ ישמח הר ציון תגלנה בנות יהודה
 למען משפטיך: ¹² סבו ציון והקיפוח ספרו מגדליה:
¹³ שיתו לבכם לחילה פסגו ארמנותיה למען תספרו
 לדור אחרון: ¹⁴ כי זה אלהים אלהינו עולם ועד הוא
 ינהגנו על מות:

49

¹ למנצח לבני קרח מזמור שמעו זאת כל העמים
 האזינו כל יושבי חלד: ² גם בני אדם גם בני איש יחד
 עשיר ואביון: ³ פי ידבר חכמות והגות לבי תבונות:
⁴ אטה למשל אזני אפתח בכנור חידתי: ⁵ למה אירא
 בימי רע עון עקבי יסובני: ⁶ הבטחים על חילם וברב
 עשרם יתהללו: ⁷ אח לא פדה יפדה איש לא יתן
 לאלהים כפרו: ⁸ ויקר פדיון נפשם וחדל לעולם: ⁹ ויחי
 עוד לנצח לא יראה השחת: ¹⁰ כי יראה חכמים ימותו
 יחד כסיל ובער יאבדו ועזבו לאחרים חילם: ¹¹ קרבם
 בתימו לעולם משכנתם לדר ודר קראו בשמותם עלי
 אדמות: ¹² ואדם ביקר בל ילין נמשל כבהמות נדמו:
¹³ זה דרכם כסל למו ואחריהם בפיהם ירצו סלה:

14 כצאן לשאול שתו מות ירעם וירדו בם ישרים לבקר וצירם לבלות שאול מזבל לו: 15 אך אלהים יפרה נפשי מיד שאול כי יקחני סלה: 16 אל תירא כי יעשר איש כי ירבה כבוד ביתו: 17 כי לא במותו יקח הכל לא ירד אחריו כבודו: 18 כי נפשו בחייו יברך ויודך כי תיטיב לך: 19 תבוא עד דור אבותיו עד נצח לא יראו אור: 20 אדם ביקר ולא יבין נמשל כבהמות נדמו:

50

1 מזמור לאסף אל אלהים יהוה דבר ויקרא ארץ ממזרח שמש עד מבאו: 2 מציון מכלל יפי אלהים הופיע: 3 יבא אלהינו ואל יחרש אש לפניו תאכל וסביביו נשערה מאד: 4 יקרא אל השמים מעל ואל הארץ לדין עמו: 5 אספו לי חסידי כרתי בריתי עלי זבח: 6 ויגידו שמים צדקו כי אלהים שפט הוא סלה: 7 שמעה עמי ואדברה ישראל ואעידה בך אלהים אלהיך אנכי: 8 לא על זבחיך אוכיחך ועולתיך לנגדי תמיד: 9 לא אקח מביתך פר ממכלאתיך עתודים: 10 כי לי כל חיתו יער בהמות בהררי אלף: 11 ידעתי כל עוף הרים וזיז שדי עמדי: 12 אם ארעב לא אמר לך כי לי תבל ומלאה: 13 האוכל בשר אבירים ודם עתודים אשתה: 14 זבח לאלהים תודה ושלים לעליון נדריך: 15 וקראני ביום צרה אחלצך ותכבדני: 16 ולרשע אמר אלהים מה לך לספר חקי ותשא בריתי עלי פיך: 17 ואתה שנאת מוסר ותשלך דברי אחרים: 18 אם ראית

גנב ותרץ עמו ועם מנאפים חלקך: ¹⁹ פיך שלחת ברעה
 ולשונך תצמיד מרמה: ²⁰ תשב באחיך תדבר בבן אמך
 תתן דפי: ²¹ אלה עשית והחרשתי דמית היות אהיה
 כמוך אוכיחך ואערכה לעיניך: ²² בינו נא זאת שכחי
 אלוה פן אטרף ואין מציל: ²³ זבח תודה יכבדני ושם
 דרך אראנו בישע אלהים:

51

¹ למנצח מזמור לדוד בבוא אליו נתן הנביא כאשר
 בא אל בת שבע חנני אלהים כחסדך כרב רחמין
 מחה פשעי: ² הרבה כבסני מעוני ומחטאתי טהרני:
³ כי פשעי אני אדע וחטאתי נגדי תמיד: ⁴ לך לבדך
 חטאתי והרע בעיניך עשיתי למען תצדק בדברך תזכה
 בשפטך: ⁵ הן בעוון חוללתי ובחטא יחמתני אמי: ⁶ הן
 אמת חפצת בטחות ובסתם חכמה תודיעני: ⁷ תחטאני
 באזוב ואטהר תכבסני ומשלג אלבין: ⁸ תשמיעני ששון
 ושמחה תגלנה עצמות דכית: ⁹ הסתר פניך מחטאי
 וכל עונתי מחה: ¹⁰ לב טהור ברא לי אלהים ורוח
 נכון חדש בקרבי: ¹¹ אל תשליכני מלפניך ורוח קדשך
 אל תקח ממני: ¹² השיבה לי ששון ישעך ורוח נדיבה
 תסמכני: ¹³ אלמדה פשעים דרכיך וחטאים אליך
 ישובו: ¹⁴ הצילני מדמים אלהים אלהי תשועתי תרנן
 לשוני צדקתך: ¹⁵ אדני שפתי תפתח ופי יגיד תהלתך:
¹⁶ כי לא תחפץ זבח ואתנה עולה לא תרצה: ¹⁷ זבחי
 אלהים רוח נשברה לב נשבר ונרכה אלהים לא תבזה:

18 היטיבה ברצונך את ציון תבנה חומות ירושלים: 19 אז תחפץ זבחי צדק עולה וכליל אז יעלו על מזבחך פרים:

52

1 למנצח משכיל לדוד בכוא דואג האדמי ויגד לשאול ויאמר לו בא דוד אל בית אחימלך מה תתהלל ברעה הגבור חסד אל כל היום: 2 הוות תחשב לשונך כתער מלטש עשה רמיה: 3 אהבת רע מטוב שקר מדבר צדק סלה: 4 אהבת כל דברי בלע לשון מרמה: 5 גם אל יתצך לנצח יחתך ויסחך מאהל ושרשך מארץ חיים סלה: 6 ויראו צדיקים וייראו ועליו ישחקו: 7 הנה הגבר לא ישים אלהים מעוזו ויבטח ברב עשרו יעז בהותו: 8 ואני כזית רענן בבית אלהים בטחתי בחסד אלהים עולם ועד: 9 אודך לעולם כי עשית ואקוה שמך כי טוב נגד חסידך:

53

1 למנצח על מחלת משכיל לדוד אמר נבל בלבו אין אלהים השחיתו והתעיבו עול אין עשה טוב: 2 אלהים משמים השקיף על בני אדם לראות היש משכיל דרש את אלהים: 3 כלו סג יחדו נאלחו אין עשה טוב אין גם אחד: 4 הלא ידעו פעלי און אכלי עמי אכלו לחם אלהים לא קראו: 5 שם פחדו פחד לא היה פחד כי אלהים פזר עצמות חנך הבשתה כי אלהים מאסם: 6 מי יתן מציון ישעות ישראל בשוב אלהים שבות עמו יגל יעקב ישמח ישראל:

54

1 לִמְנַצַּח בְּנִינַת מִשְׁכִּיל לְדוֹד בְּבוֹא הַזִּיפִים וַיֹּאמְרוּ
 לְשֹׁאֵל הַלֹּא דוֹד מִסְתַּתֵּר עִמָּנוּ אֱלֹהִים בְּשִׁמְךָ הוֹשִׁיעֵנִי
 וּבִגְבוּרַתְךָ תְּדִינֵנִי: 2 אֱלֹהִים שָׁמַע תְּפִלְתִּי הַאֲזִינָה לְאֹמְרֵי
 פִּי: 3 כִּי זָרוִים קָמוּ עָלַי וְעֵרִיצִים בִּקְשׁוּ נַפְשִׁי לֹא שָׁמוּ
 אֱלֹהִים לְגַדֵּם סֵלָה: 4 הִנֵּה אֱלֹהִים עֹזֵר לִי אֲדַנִּי בְּסִמְכִי
 נַפְשִׁי: 5 יָשׁוּב הִרְעָה לְשִׁרְרִי בְּאִמְתֶּךָ הַצְּמִיתָם: 6 בְּנִדְבָה
 אֲזַבְחָה לְךָ אֹודָה שִׁמְךָ יִהְיֶה כִּי טוֹב: 7 כִּי מִכֹּל צָרָה
 הֲצִילָנִי וּבְאִיבֵי רֵאתָה עֵינַי:

55

1 לִמְנַצַּח בְּנִינַת מִשְׁכִּיל לְדוֹד הַאֲזִינָה אֱלֹהִים תְּפִלְתִּי
 וְאֵל תִּתְעַלֵּם מִתְּחַנְתִּי: 2 הִקְשִׁיבָה לִי וְעֲנֵנִי אֲרִיד בְּשִׁיחִי
 וְאֶהִימָה: 3 מִקּוֹל אוֹיֵב מִפְּנֵי עֶקֶת רָשָׁע כִּי יִמִּיטוּ עָלַי אֹון
 וּבְאָף יִשְׁטַמוּנִי: 4 לְבִי יִחִיל בְּקִרְבִּי וְאִימֹות מוֹת נִפְלוּ
 עָלַי: 5 יִרְאֶה וְרָעַד יָבֵא בִּי וְתִכְסְּנִי פְלִצוֹת: 6 וַאֲמַר מִי יִתֵּן
 לִי אֶבֶר כִּיֹּונָה אֶעֱוֹפָה וְאֶשְׁכְּנָה: 7 הִנֵּה אֲרַחֵיק נִדְד אֶלֶיִן
 בְּמִדְבַר סֵלָה: 8 אֶחִישָׁה מִפִּלֵּט לִי מִרוּחַ סֵעָה מִסַּעַר:
 9 בִּלְעַ אֲדַנִּי פִּלְג לְשׁוֹנָם כִּי רֵאִיתִי חֲמַס וְרִיב בְּעִיר:
 10 יוֹמָם וּלְיַלְיָה יִסּוּבְבָה עַל חוֹמֹתֶיהָ וְאוֹן וְעַמֹּל בְּקִרְבָּה:
 11 הוֹוֹת בְּקִרְבָּה וְלֹא יִמִּישׁ מִרְחֶבָה תֶּךָ וּמִרְמָה: 12 כִּי
 לֹא אוֹיֵב יִחַרְפֵּנִי וְאִשָּׂא לֹא מִשְׁנָאִי עָלַי הַגְּדִיל וְאִסְתַּר
 מִמֶּנּוּ: 13 וְאַתָּה אֲנוּשׁ כְּעֵרְכִי אֶלּוּפִי וּמִיִּדְעִי: 14 אֲשֶׁר יִחַדּוּ
 נִמְתִּיק סוֹד בְּבֵית אֱלֹהִים נִהְלַךְ בְּרַגְשׁ: 15 יִשִּׁימֹות עָלֵימוּ
 יִרְדּוּ שֹׁאֵל חַיִּים כִּי רַעוֹת בְּמִגּוֹרָם בְּקִרְבָּם: 16 אֲנִי אֵל
 אֱלֹהִים אֶקְרָא וַיִּהְיֶה יוֹשִׁיעֵנִי: 17 עֵרֵב וּבִקֵּר וְצַהֲרִים
 אִשִּׁיחָה וְאֶהְמָה וַיִּשְׁמַע קוֹלִי: 18 פָּרָה בְּשִׁלּוֹם נַפְשִׁי מִקִּרְב

לי כי ברבים היו עמדוי: 19 ישמע אל ויענם וישב קדם סלה אשר אין חליפות למו ולא יראו אלהים: 20 שלח ידיו בשלמיו חלל בריתו: 21 חלקו מחמאת פיו וקרב לבו רכו דבריו משמן והמה פתחות: 22 השלך על יהוה יהבך והוא יכלכלך לא יתן לעולם מוט לצדיק: 23 ואתה אלהים תורדם לבאר שחת אנשי דמים ומרמה לא יחצו ימיהם ואני אבטח בך:

56

1 למנצח על יונת אלם רחקים לדוד מכתם באחז אתו פלשתים בגת חנני אלהים כי שאפני אנוש כל היום לחם ילחצני: 2 שאפו שוררי כל היום כי רבים לחמים לי מרום: 3 יום אירא אני אליך אבטח: 4 באלהים אהלל דברו באלהים בטחתי לא אירא מה יעשה בשר לי: 5 כל היום דברי יעצבו עלי כל מחשבתם לרע: 6 יגורו יצפינו המה עקבי ישמרו כאשר קוו נפשי: 7 על און פלט למו באף עמים הורד אלהים: 8 נדי ספרתה אתה שימה דמעתי בנאדך הלא בספרתך: 9 אז ישובו אויבי אחור ביום אקרא זה ידעתי כי אלהים לי: 10 באלהים אהלל דבר ביהוה אהלל דבר: 11 באלהים בטחתי לא אירא מה יעשה אדם לי: 12 עלי אלהים נדריך אשלם תודת לך: 13 כי הצלת נפשי ממות הלא רגלי מדחי להתהלך לפני אלהים באור החיים:

57

1 למנצח אל תשחת לדוד מכתם בברחו מפני שאול במערה חנני אלהים חנני כי בך חסיה נפשי ובצל כנפידך

אחסה עד יעבר הוות: ² אקרא לאלהים עליון לאל
 גמר עלי: ³ ישלח משמים ויושיעני חרף שאפי סלה
 ישלח אלהים חסדו ואמתו: ⁴ נפשי בתוך לבאם אשכבה
 להטים בני אדם שניהם חנית וחצים ולשונם חרב חדה:
⁵ רומה על השמים אלהים על כל הארץ כבודך: ⁶ רשת
 הכינו לפעמי כפף נפשי כרו לפני שיחה נפלו בתוכה
 סלה: ⁷ נכון לבי אלהים נכון לבי אשירה ואזמרה:
⁸ עורה כבודי עורה הנבל וכנור אעירה שחר: ⁹ אודך
 בעמים אדני אזמרך בל אמים: ¹⁰ כי גדל עד שמים
 חסדך ועד שחקים אמתך: ¹¹ רומה על שמים אלהים
 על כל הארץ כבודך:

58

¹ למנצח אל תשחת לדוד מכתם האמנם אלם צדק
 תדברון מישרים תשפטו בני אדם: ² אף בלב עולת
 תפעלון בארץ חמס ידיכם תפלסון: ³ זרו רשעים מרחם
 תעו מבטן דברי כזב: ⁴ חמת למו כדמות חמת נחש
 כמו פתן חרש יאטם אזנו: ⁵ אשר לא ישמע לקול
 מלחשים חובר חברים מחכם: ⁶ אלהים הרס שנימו
 בפימו מלתעות כפירים נתן יהוה: ⁷ ימאסו כמו מים
 יתהלכו למו ידרך חצו כמו יתמללו: ⁸ כמו שבלול תמס
 יהלך נפל אשת בל חזו שמש: ⁹ בטרם יבינו סירתכם
 אטד כמו חי כמו חרון ישערנו: ¹⁰ ישמח צדיק כי חזה
 נקם פעמיו ירחץ בדם הרשע: ¹¹ ויאמר אדם אך פרי
 לצדיק אך יש אלהים שפטים בארץ:

59

1 למנצח אל תשחת לדוד מכתם בשלח שאול וישמרו את הבית להמיתו הצילני מאיבי אלהי ממתקוממי תשגבני: 2 הצילני מפעלי און ומאנשי דמים הושיעני: 3 כי הנה ארבו לנפשי יגורו עלי עזים לא פשעי ולא חטאתי יהוה: 4 בלי עון ירוצון ויכוננו עורה לקראתי וראה: 5 ואתה יהוה אלהים צבאות אלהי ישראל הקיצה לפקד כל הגוים אל תחן כל בגדי און סלה: 6 ישבו לערב יהמו ככלב ויסובבו עיר: 7 הנה יביעון בפיהם חרבות בשפתותיהם כי מי שמע: 8 ואתה יהוה תשחק למו תלעג לכל גוים: 9 עזו אליך אשמרה כי אלהים משגבי: 10 אלהי חסדו יקדמני אלהים יראני בשררי: 11 אל תהרגם פן ישכחו עמי הניעמו בחילך והורידמו מגננו אדני: 12 חטאת פימו דבר שפתימו וילכדו בגאונם ומאלה ומכחש יספרו: 13 כלה בחמה כלה ואינמו וידעו כי אלהים משל ביעקב לאפסי הארץ סלה: 14 וישבו לערב יהמו ככלב ויסובבו עיר: 15 המה ינועון לאכל אם לא ישבעו וילינו: 16 ואני אשיר עזך וארנן לבקר חסדך כי היית משגב לי ומגוס ביום צר לי: 17 עזי אליך אזמרה כי אלהים משגבי אלהי חסדי:

60

1 למנצח על שושן עדות מכתם לדוד ללמד בהצותו את ארם נהרים ואת ארם צובה וישב יואב ויך את אדום בגיא מלח שנים עשר אלף אלהים זנחתנו פרצתנו אנפת תשובב לנו: 2 הרעשתה ארץ פצמתה רפה שבריה כי מטה: 3 הראיתה עמך קשה השקיתנו יין

תרעלה: 4 נתתה ליראיך נס להתנוסס מפני קשט
 סלה: 5 למען יחלצון ידידיך הושיעה ימינך ועננו:
 6 אלהים דבר בקדשו אעלזה אחלקה שכם ועמק סכות
 אמדד: 7 לי גלעד ולי מנשה ואפרים מעוז ראשי יהודה
 מחקקי: 8 מואב סיר רחצי על אדום אשליך נעלי עלי
 פלשת התרעעי: 9 מי יבלני עיר מצור מי נחני עד
 אדום: 10 הלא אתה אלהים זנחתנו ולא תצא אלהים
 בצבאותינו: 11 הבה לנו עזרת מצר ושוא תשועת אדם:
 12 באלהים נעשה חיל והוא יבוס צרינו:

61

1 למנצח על נגינת לרוד שמעה אלהים רנתי הקשיבה
 תפלתי: 2 מקצה הארץ אליך אקרא בעטף לבי בצור
 ירום ממני תנחני: 3 כי היית מחסה לי מגדל עז מפני
 אויב: 4 אגורה באהלך עולמים אחסה בסתר כנפיך
 סלה: 5 כי אתה אלהים שמעת לנדרי נתת ירשת יראי
 שמך: 6 ימים על ימי מלך תוסיף שנותיו כמו דר ודר:
 7 ישב עולם לפני אלהים חסד ואמת מן ינצרהו: 8 כן
 אזמרה שמך לעד לשלמי נדרי יום יום:

62

1 למנצח על ידותון מזמור לרוד אך אל אלהים
 דומיה נפשי ממנו ישועתי: 2 אך הוא צורי וישועתי
 משגבי לא אמוט רבה: 3 עד אנה תהותתו על איש
 תרצחו כלכם כקיר נטוי גדר הדחוייה: 4 אך משאתו
 יעצו להדיח ירצו כזב בפיו יברכו ובקרבתם יקללו
 סלה: 5 אך לאלהים דומי נפשי כי ממנו תקותי: 6 אך

הוא צורי וישועתי משגבי לא אמוט: 7 על אלהים ישעי וכבודי צור עזי מחסי באלהים: 8 בטחו בו בכל עת עם שפכו לפניו לבבכם אלהים מחסה לנו סלה: 9 אך הבל בני אדם כזב בני איש במאזנים לעלות המה מהבל יחד: 10 אל תבטחו בעשק ובגזל אל תהבלו חיל כי ינוב אל תשיתו לב: 11 אחת דבר אלהים שנים זו שמעתי כי עז לאלהים: 12 ולך אדני חסד כי אתה תשלם לאיש כמעשהו:

63

1 מזמור לדוד בהיותו במדבר יהודה אלהים אלי אתה אשחרך צמאה לך נפשי כמה לך בשרי בארץ ציה ועיף בלי מים: 2 כן בקדש חזיתיך לראות עזך וכבודך: 3 כי טוב חסרך מחיים שפתי ישבחונך: 4 כן אברכך בחיי בשמך אשא כפי: 5 כמו חלב ודשן תשבע נפשי ושפתי רננות יהלל פי: 6 אם זכרתיך על יצועי באשמרות אהגה בך: 7 כי היית עזרתה לי ובצל כנפיד ארנן: 8 דבקה נפשי אחרריך בי תמכה ימינך: 9 והמה לשואה יבקשו נפשי יבאו בתחתיות הארץ: 10 יגירהו על ידי חרב מנת שעלים יהיו: 11 והמלך ישמח באלהים יתהלל כל הנשבע בו כי יסכר פי דוברי שקר:

64

1 למנצח מזמור לדוד שמע אלהים קולי בשיחי מפחד אויב תצר חיי: 2 תסתירני מסוד מרעים מרגשת פעלי און: 3 אשר שגנו כחרב לשונם דרכו חצם דבר מר: 4 לירות במסתרים תם פתאם ירהו ולא ייראו: 5 יחזקו למו דבר רע יספרו לטמוון מוקשים אמרו מי

יראה למו: 6 יחפשו עולת תמנו חפש מחפש וקרב
 איש ולב עמק: 7 וירם אלהים חץ פתאום היו מכותם:
 8 ויכשילוהו עלימו לשונם יתנדרו כל ראה בם: 9 וייראו
 כל אדם ויגידו פעל אלהים ומעשהו השכילו: 10 ישמח
 צדיק ביהוה וחסה בו ויתהללו כל ישרי לב:

65

1 למנצח מזמור לדוד שיר לך דמיה תהלה אלהים
 בציון ולך ישלם נדר: 2 שמע תפלה עדיך כל בשר
 יבאו: 3 דברי עונת גברו מני פשעינו אתה תכפרם:
 4 אשרי תבחר ותקרב ישכן הצריך נשבעה בטוב
 ביתך קדש היכלך: 5 נוראות בצדק תעננו אלהי ישענו
 מבטח כל קצוי ארץ וים רחקים: 6 מכין הרים בכחו
 נאזר בנבורה: 7 משביח שאון ימים שאון גליהם והמון
 לאמים: 8 וייראו ישרי קצות מאותתיך מוצאי בקר וערב
 תרנין: 9 פקדת הארץ ותשקקה רבת תעשרנה פלג
 אלהים מלא מים תכין דגנם כי כן תכינה: 10 תלמיה רוח
 נחת גדודיה ברביבים תמגנה צמחה תברך: 11 עטרת
 שנת טובתך ומעגליך ירעפון דשן: 12 ירעפו נאות מדבר
 וגיל גבעות תחגרנה: 13 לבשו כרים הצאן ועמקים
 יעטפו בר יתרועעו אף ישירו:

66

1 למנצח שיר מזמור הריעו לאלהים כל הארץ:
 2 זמרו כבוד שמו שימו כבוד תהלתו: 3 אמרו לאלהים
 מה נורא מעשיך ברב עזך יכחשו לך איביך: 4 כל
 הארץ ישתחו לך ויזמרו לך יזמרו שמך סלה: 5 לכו

וראו מפעלות אלהים נורא עלילה על בני אדם: 6 הפך
 ים ליבשה בנהר יעברו בגלל שם נשמחה בו: 7 משל
 בגבורתו עולם עיניו בגוים תצפינה הסוררים אל ירימו
 למו סלה: 8 ברכו עמים אלהינו והשמיעו קול תהלתו:
 9 השם נפשנו בחיים ולא נתן למוט רגלנו: 10 כי בחנתנו
 אלהים צרפתנו כצרף כסף: 11 הבאתנו במצודה שמת
 מועקה במתנינו: 12 הרכבת אנוש לראשנו באנו באש
 ובמים ותוציאנו לרויה: 13 אבוא ביתך בעולות אשלם
 לך נדרי: 14 אשר פצו שפתי ודבר פי בצר לי: 15 עלות
 מחים אעלה לך עם קטרת אילים אעשה בקר עם
 עתודים סלה: 16 לכו שמעו ואספרה כל יראי אלהים
 אשר עשה לנפשי: 17 אליו פי קראתי ורומם תחת לשוני:
 18 און אם ראיתי בלבי לא ישמע אדני: 19 אכן שמע
 אלהים הקשיב בקול תפלתי: 20 ברוך אלהים אשר לא
 הסיר תפלתי וחסדו מאתי:

67

1 למנצח בנגינת מזמור שיר אלהים יחננו ויברכנו
 יאר פניו אתנו סלה: 2 לדעת בארץ דרכך בכל גוים
 ישועתך: 3 יודוך עמים אלהים יודוך עמים כלם:
 4 ישמחו וירננו לאמים כי תשפט עמים מישור ולאמים
 בארץ תנחם סלה: 5 יודוך עמים אלהים יודוך עמים
 כלם: 6 ארץ נתנה יבולה יברכנו אלהים אלהינו:
 7 יברכנו אלהים וייראו אתו כל אפסי ארץ:

68

1 למנצח לדוד מזמור שיר יקום אלהים יפוצו

אויביו וינוסו משנאיו מפניו: ² כהנדרף עשן תנדרף כהמס
 דונג מפני אש יאבדו רשעים מפני אלהים: ³ וצדיקים
 ישמחו יעלצו לפני אלהים וישישו בשמחה: ⁴ שירו
 לאלהים זמרו שמו סלו לרכב בערבות ביה שמו
 ועלזו לפניו: ⁵ אבי יתומים ודין אלמנות אלהים במעון
 קדשו: ⁶ אלהים מושיב יחידים ביתה מוציא אסירים
 בכושרות אך סוררים שכנו צחיחה: ⁷ אלהים בצאתך
 לפני עמך בצעדך בישימון סלה: ⁸ ארץ רעשה אף
 שמים נטפו מפני אלהים זה סיני מפני אלהים אלהי
 ישראל: ⁹ גשם נדבות תניף אלהים נחלתך ונלאה אתה
 כוננתה: ¹⁰ חיתך ישבו בה תכין בטובתך לעני אלהים:
¹¹ אדני יתן אמר המבשרות צבא רב: ¹² מלכי צבאות
 ידרון ידרון ונות בית תחלק שלל: ¹³ אם תשכבון
 בין שפתים כנפי יונה נחפה בכסף ואברותיה בירקרק
 חרוץ: ¹⁴ בפרש שדי מלכים בה תשלג בצלמון: ¹⁵ הר
 אלהים הר בשן הר גבננים הר בשן: ¹⁶ למה תרצדון
 הרים גבננים ההר חמד אלהים לשבתו אף יהוה ישכן
 לנצח: ¹⁷ רכב אלהים רבתים אלפי שנאן אדני במ סיני
 בקדש: ¹⁸ עלית למרום שבית שבי לקחת מתנות באדם
 ואף סוררים לשכן יה אלהים: ¹⁹ ברוך אדני יום יום
 יעמס לנו האל ישועתנו סלה: ²⁰ האל לנו אל למושעות
 וליהוה אדני למות תוצאות: ²¹ אך אלהים ימחץ ראש
 איביו קדקד שער מתהלך באשמיו: ²² אמר אדני מבשן
 אשיב אשיב ממצלות ים: ²³ למען תמחץ רגלך בדם
 לשון כלביך מאיבים מנהו: ²⁴ ראו הליכותיך אלהים

הליכות אלי מלכי בקדש: ²⁵ קדמו שרים אחר נגנים
 בתוך עלמות תופפות: ²⁶ במקהלות ברכו אלהים יהוה
 ממקור ישראל: ²⁷ שם בנימן צעיר רדם שרי יהודה
 רגמתם שרי זבלון שרי נפתלי: ²⁸ צוה אלהיך עזך
 עוזה אלהים זו פעלת לנו: ²⁹ מהיכלך על ירושלם לך
 יובילו מלכים שי: ³⁰ גער חית קנה עדת אבירים בעגלי
 עמים מתרפס ברצי כסף בזר עמים קרבות יחפצו:
³¹ יאתיו חשמנים מני מצרים כוש תריץ ידיו לאלהים:
³² ממלכות הארץ שירו לאלהים זמרו אדני סלה:
³³ לרכב בשמי שמי קדם הן יתן בקולו קול עז: ³⁴ תנו עז
 לאלהים על ישראל גאותו ועזו בשחקים: ³⁵ נורא אלהים
 ממקדשיך אל ישראל הוא נתן עז ותעצמות לעם ברוך
 אלהים:

69

¹ למנצח על שושנים לדוד הושיעני אלהים כי באו
 מים עד נפש: ² טבעתי ביון מצולה ואין מעמד באתי
 במעמקי מים ושבלת שטפתי: ³ יגעתי בקראי נחר
 גרוני כלו עיני מיחל לאלהי: ⁴ רבו משערות ראשי
 שנאי חנם עצמו מצמיתי איבי שקר אשר לא גזלתי
 אז אשיב: ⁵ אלהים אתה ידעת לאולתי ואשמותי ממך
 לא נכחדו: ⁶ אל יבשו בי קויך אדני יהוה צבאות אל
 יכלמו בי מבקשיך אלהי ישראל: ⁷ כי עליך נשאתי
 חרפה כסתה כלמה פני: ⁸ מוזר הייתי לאחי ונכרי
 לבני אמי: ⁹ כי קנאת ביתך אכלתני וחרפות חורפיך

נפלו עלי: 10 ואבכה בצום נפשי ותהי לחרפות לי:
 11 ואתנה לבושי שק ואהי להם למשל: 12 ישיחו בי ישבי
 שער ונגינות שותי שכר: 13 ואני תפלתי לך יהוה עת
 רצון אלהים ברב חסדך ענני באמת ישעך: 14 הצילני
 מטיט ואל אטבעה אנצלה משנאי וממעמקי מים: 15 אל
 תשטפני שבלת מים ואל תבלעני מצולה ואל תאטר
 עלי באר פיה: 16 ענני יהוה כי טוב חסדך כרב
 רחמוך פנה אלי: 17 ואל תסתר פניך מעבדך כי צר
 לי מהר ענני: 18 קרבה אל נפשי גאלה למען איבי
 פדני: 19 אתה ידעת חרפתי ובשתי וכלמתי נגדך כל
 צוררי: 20 חרפה שברה לבי ואנושה ואקוה לנוד ואין
 ולמנחמים ולא מצאתי: 21 ויתנו בברותי ראש ולצמאי
 ישקוני חמוץ: 22 יהי שלחנם לפנייהם לפח ולשלומים
 למוקש: 23 תחשכנה עיניהם מראות ומתניהם תמיד
 המעד: 24 שפך עליהם זעמך וחרון אפך ישיגם: 25 תהי
 טירתם נשמה באהליהם אל יהי ישב: 26 כי אתה אשר
 הכית רדפו ואל מכאוב חלליך יספרו: 27 תנה עון
 על עונם ואל יבאו בצדקתך: 28 ימחו מספר חיים ועם
 צדיקים אל יכתבו: 29 ואני עני וכואב ישועתך אלהים
 תשגבני: 30 אהללה שם אלהים בשיר ואגדלנו בתודה:
 31 ותיטב ליהוה משור פר מקרן מפריס: 32 ראו ענוים
 ישמחו דרשי אלהים ויחי לבבכם: 33 כי שמע אל
 אביונים יהוה ואת אסיריו לא בזה: 34 יהללוהו שמים
 וארץ ימים וכל רמש בם: 35 כי אלהים יושיע ציון ויבנה
 ערי יהודה וישבו שם וירשוה: 36 וזרע עבדיו ינחלוה
 ואהבי שמו ישכנו בה:

70

1 למנצח לדוד להזכיר אלהים להצילני יהוה
 לעזרתי חושה: 2 יבשו ויחפרו מבקשי נפשי יסגו אחור
 ויכלמו חפצי רעתי: 3 ישובו על עקב בשתם האמרים
 האח האח: 4 ישישו וישמחו בכך כל מבקשיך ויאמרו
 תמיד יגדל אלהים אהבי ישועתך: 5 ואני עני ואביון
 אלהים חושה לי עזרי ומפלטי אתה יהוה אל תאחר:

71

1 בכך יהוה חסיתי אל אבושה לעולם: 2 בצדקתך
 תצילני ותפלטני הטח אלי אונך והושיעני: 3 היה
 לי לצור מעון לבוא תמיד צוית להושיעני כי סלעי
 ומצודתי אתה: 4 אלהי פלטני מיד רשע מכף מעול
 וחומץ: 5 כי אתה תקותי אדני יהוה מבטחי מנעורי:
 6 עליך נסמכתי מבטן ממעי אמי אתה גוזי בכך תהלתי
 תמיד: 7 כמופת הייתי לרבים ואתה מחסי עז: 8 ימלא
 פי תהלתך כל היום תפארתך: 9 אל תשליכני לעת
 זקנה ככלות כחי אל תעזבני: 10 כי אמרו אויבי לי
 ושמרי נפשי נועצו יחדו: 11 לאמר אלהים עזבו רדפו
 ותפשוהו כי אין מציל: 12 אלהים אל תרחק ממני אלהי
 לעזרתי חישה: 13 יבשו יכלו שטני נפשי יעטו חרפה
 וכלמה מבקשי רעתי: 14 ואני תמיד איחל והוספתי על
 כל תהלתך: 15 פי יספר צדקתך כל היום תשועתך
 כי לא ידעתי ספרות: 16 אבוא בגברות אדני יהוה
 אזכיר צדקתך לברך: 17 אלהים למדתני מנעורי ועד
 הנה אניד נפלאותיך: 18 וגם עד זקנה ושיבה אלהים

אל תעזבני עד אניד זרועך לדור לכל יבוא גבורתך:
 19 וצדקתך אלהים עד מרום אשר עשית גדלות אלהים
 מי כמוך: 20 אשר הראיתנו צרות רבות ורעות תשוב
 תחיינו ומתהמות הארץ תשוב תעלני: 21 תרב גדלתי
 ותסב תנחמני: 22 גם אני אודך בכלי נבל אמתך אלהי
 אזמרה לך בכנור קדוש ישראל: 23 תרננה שפתי כי
 אזמרה לך ונפשי אשר פדית: 24 גם לשוני כל היום
 תהגה צדקתך כי בשו כי חפרו מבקשי רעתי:

72

1 לשלמה אלהים משפטיך למלך תן וצדקתך לבן
 מלך: 2 ידיו עמד בצדק וענייך במשפט: 3 ישאו הרים
 שלום לעם וגבעות בצדקה: 4 ישפט עניי עם יושע לבני
 אביון וידכא עושק: 5 ייראוך עם שמש ולפני ירח דור
 דורים: 6 ירד כמטר על גז כרביבים זרזיף ארץ: 7 יפרח
 בימיו צדיק ורב שלום עד בלי ירח: 8 וירד מים עד
 ים ומנחר עד אפסי ארץ: 9 לפניו יכרעו ציים ואיביו
 עפר ילחכו: 10 מלכי תרשיש ואיים מנחה ישיבו מלכי
 שבא וסבא אשכר יקריבו: 11 וישתחוו לו כל מלכים כל
 גוים יעבדוהו: 12 כי יציל אביון משוע ועני ואין עזר לו:
 13 יחס על דל ואביון ונפשות אביונים יושיע: 14 מתוך
 ומחמס יגאל נפשם וייקר דמם בעיניו: 15 ויחי ויתן לו
 מזהב שבא ויתפלל בעדו תמיד כל היום יברכנהו:
 16 יהי פסת בר בארץ בראש הרים ירעש כלבנון פרוי
 ויציצו מעיר כעשב הארץ: 17 יהי שמו לעולם לפני שמש

ניין שמו ויתברכו בו כל גוים יאשרוהו: 18 ברוך יהוה
אלהים אלהי ישראל עשה נפלאות לברו: 19 וברוך שם
כבודו לעולם וימלא כבודו את כל הארץ אמן ואמן:
20 כלו תפלות דוד בן ישי:

73

1 מזמור לאסף אך טוב לישראל אלהים לברי לבב:
2 ואני כמעט נטוי רגלי כאין שפכה אשרי: 3 כי קנאתי
בהוללים שלום רשעים אראה: 4 כי אין חרצבות
למותם ובריא אולם: 5 בעמל אנוש אינמו ועם אדם
לא יננעו: 6 לכן ענקתמו גאווה יעטף שית חמס למו:
7 יצא מחלב עינמו עברו משכיות לבב: 8 ימיקו וידברו
ברע עשק ממרום ידברו: 9 שתו בשמים פיהם ולשונם
תהלך בארץ: 10 לכן ישיב עמו הלם ומי מלא ימצו
למו: 11 ואמרו איכה ידע אל ויש דעה בעליון: 12 הנה
אלה רשעים ושלוו עולם השגו חיל: 13 אך ריק זכיתי
לבבי וארחץ בנקיון כפי: 14 ואהי נגוע כל היום ותוכחתי
לבקרים: 15 אם אמרתי אספרה כמו הנה דור בניך
בגדתי: 16 ואחשבה לדעת זאת עמל היא בעיני: 17 עד
אבוא אל מקדשי אל אבינה לאחרייתם: 18 אך בחלקות
תשית למו הפלתם למשואות: 19 איך היו לשמה כרגע
ספו תמו מן בלהות: 20 כחלום מהקיץ אדני בעיר צלמם
תבזה: 21 כי יתחמץ לבבי וכליותי אשתונן: 22 ואני בער
ולא אדע בהמות הייתי עמך: 23 ואני תמיד עמך אחזת
ביד ימיני: 24 בעצתך תנחני ואחר כבוד תקחני: 25 מי

לי בשמים ועמך לא חפצתי בארץ: 26 כלה שארי ולבבי צור לבבי וחלקי אלהים לעולם: 27 כי הנה רחקיך יאבדו הצמתה כל זונה ממך: 28 ואני קרבת אלהים לי טוב שתי באדני יהוה מחסי לספר כל מלאכותיך:

74

1 משכיל לאסף למה אלהים זנחת לנצח יעשן אפך בצאן מרעיתך: 2 זכר עדתך קניית קדם גאלת שבט נחלתך הר ציון זה שכנת בו: 3 הרימה פעמיך למשאות נצח כל הרע אויב בקדש: 4 שאגו צרריך בקרב מועדך שמו אותתם אתות: 5 יודע כמביא למעלה בסבך עץ קרדמות: 6 ועת פתוחיה יחד בכשיל וכילפת יהלמון: 7 שלחו באש מקדשך לארץ חללו משכן שמך: 8 אמרו בלבם נינם יחד שרפו כל מועדי אל בארץ: 9 אותתינו לא ראינו אין עוד נביא ולא אתנו ידע עד מה: 10 עד מתי אלהים יחרף צר ינאץ אויב שמך לנצח: 11 למה תשיב ירך וימינך מקרב חוקך כלה: 12 ואלהים מלכי מקדם פעל ישועות בקרב הארץ: 13 אתה פוררת בעזך ים שברת ראשי תנינים על המים: 14 אתה רצצת ראשי לויתן תתננו מאכל לעם לציים: 15 אתה בקעת מעין ונחל אתה הובשת נהרות איתן: 16 לך יום אף לך לילה אתה הכינות מאור ושמש: 17 אתה הצבת כל גבולות ארץ קיץ וחרף אתה יצרתם: 18 זכר זאת אויב חרף יהוה ועם נבל נאצו שמך: 19 אל תתן לחית נפש תורך חית ענייך אל תשכח לנצח: 20 הבט לברית כי מלאו

מחשכי ארץ נאות חמס: ²¹ אל ישב דך נכלם עני ואביון
 יהללו שמך: ²² קומה אלהים ריבה ריבך זכר חרפתך
 מני נבל כל היום: ²³ אל תשכח קול צרריך שאון קמיד
 עלה תמיד:

75

¹ למנצח אל תשחת מזמור לאסף שיר הודינו לך
 אלהים הודינו וקרוב שמך ספרו נפלאותיך: ² כי אקח
 מועד אני מישרים אשפט: ³ נמנים ארץ וכל ישביה
 אנכי תכנתי עמודיה סלה: ⁴ אמרתי להוללים אל תהללו
 ולרשעים אל תרימו קרן: ⁵ אל תרימו למרום קרנכם
 תדברו בצואר עתק: ⁶ כי לא ממוצא וממערב ולא
 ממדבר הרים: ⁷ כי אלהים שפט זה ישפיל וזה ירים:
⁸ כי כוס ביד יהוה ויין חמר מלא מסך ויגר מזה
 אך שמריה ימצו ישתו כל רשעי ארץ: ⁹ ואני אגיד
 לעלם אזמרה לאלהי יעקב: ¹⁰ וכל קרני רשעים אנדע
 תרוממנה קרנות צדיק:

76

¹ למנצח בנגינת מזמור לאסף שיר נודע ביהודה
 אלהים בישראל גדול שמו: ² ויהי בשלם סכו ומעונתו
 בציון: ³ שמה שבר רשפי קשת מגן וחרב ומלחמה סלה:
⁴ נאור אתה אדיר מהררי טרף: ⁵ אשתוללו אבירי לב
 נמו שנתם ולא מצאו כל אנשי חיל ידיהם: ⁶ מגערתך
 אלהי יעקב נרדם ורכב וסוס: ⁷ אתה נורא אתה ומי
 יעמד לפניך מאז אפך: ⁸ משמים השמעת דין ארץ יראה

ושקטה: 9 בקום למשפט אלהים להושיע כל ענוי ארץ
 סלה: 10 כי חמת אדם תודך שארית חמת תחגר: 11 נדרו
 ושלמו ליהוה אלהיכם כל סביביו יובילו שי למורא:
 12 יבצר רוח נגידים נורא למלכי ארץ:

77

1 למנצח על ידיתון לאסף מזמור קולי אל אלהים
 ואצעקה קולי אל אלהים והאזין אלי: 2 ביום צרתי
 אדני דרשתי ידי לילה נגרה ולא תפוג מאנה הנחם
 נפשי: 3 אזכרה אלהים ואהמיה אשיחה ותתעטף רוחי
 סלה: 4 אחזת שמרות עיני נפעמתי ולא אדבר: 5 חשבתי
 ימים מקדם שנות עולמים: 6 אזכרה נגינתי בלילה עם
 לבבי אשיחה ויחפש רוחי: 7 הלעולמים יזנח אדני ולא
 יסוף לרצות עוד: 8 האפס לנצח חסדו גמר אמר לדר
 ודר: 9 השכח חנות אל אם קפץ באף רחמיו סלה:
 10 ואמר חלותי היא שנות ימין עליון: 11 אזכיר מעללי
 יה כי אזכרה מקדם פלאך: 12 והגיתי בכל פעלך
 ובעלילותיך אשיחה: 13 אלהים בקדש דרכך מי אל
 גדול כאלהים: 14 אתה האל עשה פלא הודעת בעמים
 עזך: 15 גאלת בזרוע עמך בני יעקב ויוסף סלה: 16 ראוך
 מים אלהים ראוך מים יחילו אף ירגזו תהמות: 17 זרמו
 מים עבות קול נתנו שחקים אף חצצריך יתהלכו: 18 קול
 רעמך בגלגל האירו ברקים תבל רגזה ותרעש הארץ:
 19 בים דרכך ושביליך במים רבים ועקבותיך לא נדעו:
 20 נחית כצאן עמך ביד משה ואהרן:

78

1 משכיל לאסף האזינה עמי תורתִי הטו אזנכם לאמרי
 פי: 2 אפתחה במשל פי אביעה חידות מני קדם: 3 אשר
 שמענו ונדעם ואבותינו ספרו לנו: 4 לא נכחד מבניהם
 לדור אחרון מספרים תהלות יהוה ועוזו ונפלאותיו
 אשר עשה: 5 ויקם עדות ביעקב ותורה שם בישראל
 אשר צוה את אבותינו להודיעם לבניהם: 6 למען ידעו
 דור אחרון בנים יולדו יקמו ויספרו לבניהם: 7 וישימו
 באלהים כסלם ולא ישכחו מעללי אל ומצותיו ינצרו:
 8 ולא יהיו כאבותם דור סורר ומרה דור לא הכין
 לבו ולא נאמנה את אל רוחו: 9 בני אפרים נושקי
 רומי קשת הפכו ביום קרב: 10 לא שמרו ברית אלהים
 ובתורתו מאנו ללכת: 11 וישכחו עלילותיו ונפלאותיו
 אשר הראם: 12 נגד אבותם עשה פלא בארץ מצרים
 שדה צען: 13 בקע ים ויעבירם ויצב מים כמו נד:
 14 וינחם בענן יומם וכל הלילה באור אש: 15 יבקע צרים
 במדבר וישק כתהמות רבה: 16 ויוצא נוזלים מסלע
 ויורד כנהרות מים: 17 ויוסיפו עוד לחטא לו למרות
 עליון בציה: 18 וינסו אל בלבבם לשאל אכל לנפשם:
 19 וידברו באלהים אמרו היוכל אל לערך שלחן
 במדבר: 20 הן הכה צור ויזובו מים ונחלים ישטפו
 הגם לחם יוכל תת אם יכין שאר לעמו: 21 לכן שמע
 יהוה ויתעבר ואש נשקה ביעקב וגם אף עלה בישראל:
 22 כי לא האמינו באלהים ולא בטחו בישועתו: 23 ויצו
 שחקים ממעל ודלתי שמים פתח: 24 וימטר עליהם

מן לאכל ודגן שמים נתן למו: 25 לחם אבירים אכל
 איש צידה שלח להם לשבע: 26 יסע קדים בשמים
 וינהג בעזו תימן: 27 וימטר עליהם כעפר שאר וכחול
 ימים עוף כנף: 28 ויפל בקרב מחנהו סביב למשכנתיו:
 29 ויאכלו וישבעו מאד ותאותם יבא להם: 30 לא זרו
 מתאותם עוד אכלם בפיהם: 31 ואף אלהים עלה בהם
 ויהרג במשמניהם ובחורי ישראל הכריע: 32 בכל זאת
 חטאו עוד ולא האמינו בנפלאותיו: 33 ויכל בהבל ימיהם
 ושנותם בבהלה: 34 אם הרגם ודרשוהו ושבו ושחרו אל:
 35 ויזכרו כי אלהים צורם ואל עליון גאלם: 36 ויפתוהו
 בפיהם ובלשונם יכזבו לו: 37 ולבם לא נכון עמו ולא
 נאמנו בכריתו: 38 והוא רחום יכפר עון ולא ישחית
 והרבה להשיב אפו ולא יעיר כל חמתו: 39 ויזכר
 כי בשר המה רוח הולך ולא ישוב: 40 כמה ימרוהו
 במדבר יעציבוהו בישימון: 41 וישבו וינסו אל וקדוש
 ישראל התוו: 42 לא זכרו את ידו יום אשר פדם מני
 צר: 43 אשר שם במצרים אתותיו ומופתיו בשדה צען:
 44 ויהפך לדם יאריהם ונזליהם בל ישתיון: 45 ישלח
 בהם ערב ויאכלם וצפרדע ותשחיתם: 46 ויתן לחסיל
 יבולם ויגיעם לארבה: 47 יהרג בברד גפנם ושקמותם
 בחנמל: 48 ויסגר לברד בעירם ומקניהם לרשפים:
 49 ישלח בם חרון אפו עברה וזעם וצרה משלחת מלאכי
 רעים: 50 יפלס נתיב לאפו לא חשך ממות נפשם וחיתם
 לדבר הסגיר: 51 ויך כל בכור במצרים ראשית אונים
 באהלי חם: 52 ויסע כצאן עמו וינהגם כעדר במדבר:
 53 וינחם לבטח ולא פחדו ואת אויביהם כסה הים:

54 ויביאם אל גבול קדשו הר זה קנתה ימינו: 55 ויגרש מפניהם גוים ויפילם בחבל נחלה וישכן באהליהם שבטי ישראל: 56 וינסו וימרו את אלהים עליון ועדותיו לא שמרו: 57 ויסגו ויבגדו כאבותם נהפכו כקשת רמיה: 58 וכעיסוהו בבמותם ובפסיליהם יקניאוהו: 59 שמע אלהים ויתעבר וימאס מאד בישראל: 60 ויטש משכן שלו אהל שכן באדם: 61 ויתן לשבי עזו ותפארתו ביד צר: 62 ויסגר לחרב עמו ובנחלתו התעבר: 63 בחוריו אכלה אש ובתולתיו לא הוללו: 64 כהניו בחרב נפלו ואלמנתיו לא תבכינה: 65 ויקץ כישן אדני כגבור מתרונן מיון: 66 ויך צריו אחור חרפת עולם נתן למו: 67 וימאס באהל יוסף ובשבט אפרים לא בחר: 68 ויבחר את שבט יהודה את הר ציון אשר אהב: 69 ויבן כמו רמים מקדשו כארץ יסדה לעולם: 70 ויבחר ברוד עברו ויקחהו ממכלאת צאן: 71 מאחר עלות הביאו לרעות ביעקב עמו ובישראל נחלתו: 72 וירעם כתם לבבו ובתבונות כפיו ינחם:

79

1 מזמור לאסף אלהים באו גוים בנחלתך טמאו את היכל קדשך שמו את ירושלם לעיים: 2 נתנו את נבלת עבדיך מאכל לעוף השמים בשר חסידיך לחיתו ארץ: 3 שפכו דמם כמים סביבות ירושלם ואין קובר: 4 היינו חרפה לשכנינו לעג וקלס לסביבותינו: 5 עד מה יהוה תאנף לנצח תבער כמו אש קנאתך: 6 שפך חמתך אל הגוים אשר לא ידעוך ועל ממלכות אשר בשמך לא

קראו: ⁷ כי אכל את יעקב ואת נוהו השמו: ⁸ אל תזכר לנו עונת ראשנים מהר יקדמונו רחמיך כי דלונו מאד: ⁹ עזרנו אלהי ישענו על דבר כבוד שמך והצילנו וכפר על חטאתינו למען שמך: ¹⁰ למה יאמרו הגוים איה אלהיהם יודע בגיים לעינינו נקמת דם עבדיך השפוך: ¹¹ תבוא לפניך אנקת אסיר כגדל זרועך הותר בני תמותה: ¹² והשב לשכנינו שבעתים אל חיקם חרפתם אשר חרפוך אדני: ¹³ ואנחנו עמך וצאן מרעיתך נודה לך לעולם לדר ודר נספר תהלתך:

80

¹ למנצח אל ששנים עדות לאסף מזמור רעה ישראל האזינה נהג כצאן יוסף ישב הכרובים הופיעה: ² לפני אפרים ובנימן ומנשה עוררה את גבורתך ולכה לישעתה לנו: ³ אלהים השיבנו והאר פניך ונושעה: ⁴ יהוה אלהים צבאות עד מתי עשנת בתפלת עמך: ⁵ האכלתם לחם דמעה ותשקמו בדמעות שלישי: ⁶ תשימנו מרון לשכנינו ואיבינו ילענו למו: ⁷ אלהים צבאות השיבנו והאר פניך ונושעה: ⁸ גפן ממצרים תסיע תגרש גוים ותטעה: ⁹ פנית לפנייה ותשרש שרשיה ותמלא ארץ: ¹⁰ כסו הרים צלה וענפיה ארזי אל: ¹¹ תשלח קצירה עד ים ואל נהר יונקותיה: ¹² למה פרצת גדריה וארוה כל עברי דרך: ¹³ יכרסמנה חזיר מיער וזיו שדי ירענה: ¹⁴ אלהים צבאות שוב נא הבט משמים וראה ופקד גפן זאת: ¹⁵ וכנה אשר נטעה ימינך ועל בן אמצתה לך: ¹⁶ שרפה באש כסוחה מגערת פניך יאבדו: ¹⁷ תהי

ידך על איש ימינך על בן אדם אמצת לך: 18 ולא נסוג ממך תחינו ובשמך נקרא: 19 יהוה אלהים צבאות השיבנו האר פניך ונושעה:

81

1 למנצח על הגתית לאסף הרנינו לאלהים עוזנו הריעו לאלהי יעקב: 2 שאו זמרה ותנו תף כנור נעים עם נבל: 3 תקעו בחדש שופר בכסה ליום חגנו: 4 כי חק לישראל הוא משפט לאלהי יעקב: 5 עדות ביהוסף שמו בצאתו על ארץ מצרים שפת לא ידעתי אשמע: 6 הסירותי מסבל שכמו כפיו מדוד תעברנה: 7 בצרה קראת ואחלצך אענך בסתר רעם אבחנך על מי מריבה סלה: 8 שמע עמי ואעידה בך ישראל אם תשמע לי: 9 לא יהיה בך אל זר ולא תשתחוה לאל נכר: 10 אנכי יהוה אלהיך המעלך מארץ מצרים הרחב פיך ואמלאהו: 11 ולא שמע עמי לקולי וישראל לא אבה לי: 12 ואשלחן בשרירות לבם ילכו במועצותיהם: 13 לו עמי שמע לי ישראל בדרכי יהלכו: 14 כמעט אויביהם אכניע ועל צריהם אשיב ידי: 15 משנאי יהוה יכחשו לו ויהי עתם לעולם: 16 ויאכילהו מחלב חטה ומצור דבש אשביעך:

82

1 מזמור לאסף אלהים נצב בעדת אל בקרב אלהים ישפט: 2 עד מתי תשפטו עול לפני רשעים תשאו סלה: 3 שפטו דל ויתום עני ורש הצדיקן: 4 פלטו דל ואביון מיד רשעים הצילו: 5 לא ידעו ולא יבינו בחשכה

יתהלכו ימוטו כל מוסדי ארץ: ⁶ אני אמרתי אלהים אתם
ובני עליון כלכם: ⁷ אכן כאדם תמותון וכאחד השרים
תפלו: ⁸ קומה אלהים שפטה הארץ כי אתה תנחל בכל
הגוים:

83

¹ שיר מזמור לאסף אלהים אל דמי לך אל תחרש
ואל תשקט אל: ² כי הנה אויביך יהמיון ומשנאיך נשאו
ראש: ³ על עמך יערימו סוד ויתיעצו על צפוניך: ⁴ אמרו
לכו ונכחידם מגוי ולא יזכר שם ישראל עוד: ⁵ כי נועצו
לב יחדו עליך ברית יכרתו: ⁶ אהלי אדום וישמעאלים
מואב והגרים: ⁷ גבל ועמון ועמלק פלשת עם ישבי צור:
⁸ גם אשור נלוה עמם היו זרוע לבני לוט סלה: ⁹ עשה
להם כמדון כסיסרא כיבין בנחל קישון: ¹⁰ נשמדו בעין
דאר היו דמן לאדמה: ¹¹ שיתמו נדיבמו כערב וכזאב
וכזבח וכצלמנע כל נסיכמו: ¹² אשר אמרו נירשה לנו
את נאות אלהים: ¹³ אלהי שיתמו כגלגל כקש לפני רוח:
¹⁴ כאש תבער יער וכלהבה תלהט הרים: ¹⁵ כן תרדפם
בסערך ובסופתך תבהלם: ¹⁶ מלא פניהם קלון ויבקשו
שמך יהוה: ¹⁷ יבשו ויבהלו עדי עד ויחפרו ויאבדו:
¹⁸ וידעו כי אתה שמך יהוה לבדך עליון על כל הארץ:

84

¹ למנצח על הגתית לבני קרח מזמור מה ידידות
משכנותיך יהוה צבאות: ² נכספה וגם כלתה נפשי
לחצרות יהוה לבי ובשרי ירננו אל אל חי: ³ גם צפור
מצאה בית ודרור קן לה אשר שתה אפרחיה את

מזבחותיך יהוה צבאות מלכי ואלהי: 4 אשרי יושבי ביתך עוד יהללוך סלה: 5 אשרי אדם עוז לו בך מסלות בלבבם: 6 עברי בעמק הבכא מעין ישיתוהו גם ברכות יעטה מורה: 7 ילכו מחיל אל חיל יראה אל אלהים בציון: 8 יהוה אלהים צבאות שמעה תפלתי האזינה אלהי יעקב סלה: 9 מגננו ראה אלהים והבט פני משיחך: 10 כי טוב יום בחצריך מאלף בחרתי הסתופף בבית אלהי מדור באהלי רשע: 11 כי שמש ומגן יהוה אלהים חן וכבוד יתן יהוה לא ימנע טוב להלכים בתמים: 12 יהוה צבאות אשרי אדם בטח בך:

85

1 למנצח לבני קרח מזמור רצית יהוה ארצך שבת שבות יעקב: 2 נשאת עון עמך כסית כל חטאתם סלה: 3 אספת כל עברתך השיבות מחרון אפך: 4 שובנו אלהי ישענו והפר כעסך עמנו: 5 הלעולם תאנף בנו תמשך אפך לדר ודר: 6 הלא אתה תשוב תחינו ועמך ישמחו בך: 7 הראנו יהוה חסדך וישעך תתן לנו: 8 אשמעה מה ידבר האל יהוה כי ידבר שלום אל עמו ואל חסידיו ואל ישובו לכסלה: 9 אך קרוב ליראיו ישעו לשכן כבוד בארצנו: 10 חסד ואמת נפגשו צדק ושלום נשקו: 11 אמת מארץ תצמח וצדק משמים נשקף: 12 גם יהוה יתן הטוב וארצנו תתן יכולה: 13 צדק לפניו יהלך וישם לדרך פעמיו:

86

1 תפלה לדוד הטה יהוה אזנך ענני כי עני ואביון

אני: 2 שמרה נפשי כי חסיד אני הושע עבדך אתה
אלהי הבוטח אליך: 3 חנני אדני כי אליך אקרא כל
היום: 4 שמח נפש עבדך כי אליך אדני נפשי אשא:
5 כי אתה אדני טוב וסלח ורב חסד לכל קראיך:
6 האזינה יהוה תפלתי והקשיבה בקול תחנונותי: 7 ביום
צרתי אקראך כי תענני: 8 אין כמוך באלהים אדני ואין
כמעשיך: 9 כל גוים אשר עשית יבואו וישתחוו לפניך
אדני ויכבדו לשמך: 10 כי גדול אתה ועשה נפלאות אתה
אלהים לבדך: 11 הורני יהוה דרכך אהלך באמתך יחד
לבבי ליראה שמך: 12 אודך אדני אלהי בכל לבבי
ואכבדה שמך לעולם: 13 כי חסדך גדול עלי והצלת
נפשי משאול תחתיה: 14 אלהים זדים קמו עלי ועדת
עריצים בקשו נפשי ולא שמוך לנגדם: 15 ואתה אדני
אל רחום וחנון ארך אפים ורב חסד ואמת: 16 פנה אלי
וחנני תנה עזך לעבדך והושיעה לבן אמתך: 17 עשה
עמי אות לטובה ויראו שנאי ויבשו כי אתה יהוה עזרתני
ונחמתני:

87

1 לבני קרח מזמור שיר יסודתו בהררי קדש: 2 אהב
יהוה שערי ציון מכל משכנות יעקב: 3 נכבדות מדבר
בך עיר האלהים סלה: 4 אזכיר רהב ובבל לידעי הנה
פלשת וצור עם כוש זה ילד שם: 5 ולציון יאמר איש
ואיש ילד בה והוא יכוננה עליון: 6 יהוה יספר בכתוב
עמים זה ילד שם סלה: 7 ושרים כחללים כל מעיני בך:

88

1 שיר מזמור לבני קרח למנצח על מחלת לענות משכיל להימן האזרחי יהוה אלהי ישועתי יום צעקתי בלילה נגדך: 2 תבוא לפניך תפלתי הטה אזנך לרנתי: 3 כי שבעה ברעות נפשי וחיי לשאול הגיעו: 4 נחשבתי עם יורדי בור הייתי כגבר אין איל: 5 במתים חפשי כמו חללים שכבי קבר אשר לא זכרתם עוד והמה מידך נגזרו: 6 שני בבור תחתיות במחשכים במצללות: 7 עלי סמכה חמתך וכל משבריך ענית סלה: 8 הרחקת מידעי ממני שני תועבות למו כלא ולא אצא: 9 עיני דאבה מני עני קראתיך יהוה בכל יום שטחתי אליך כפי: 10 הלמתים תעשה פלא אם רפאים יקומו יודוך סלה: 11 היספר בקבר חסדך אמונתך באבדון: 12 היודע בחשך פלאך וצדקתך בארץ נשיה: 13 ואני אליך יהוה שועתי ובבקר תפלתי תקדמך: 14 למה יהוה תזנח נפשי תסתיר פניך ממני: 15 עני אני וגוע מגער נשאתי אמיד אפונה: 16 עלי עברו חרוניך בעותיך צמתותני: 17 סבוני כמים כל היום הקיפו עלי יחד: 18 הרחקת ממני אהב ורע מידעי מחשך:

89

1 משכיל לאיתן האזרחי חסדי יהוה עולם אשירה לדר ודר אודיע אמונתך בפי: 2 כי אמרתי עולם חסד יבנה שמים תכן אמונתך בהם: 3 כרתי ברית לבחירי נשבעתי לדוד עבדי: 4 עד עולם אכין זרעך ובניתי לדר ודור כסאך סלה: 5 ויודו שמים פלאך יהוה אף אמונתך

בקהל קדשים: ⁶ כי מי בשחק יערך ליהוה ידמה ליהוה
 בבני אלים: ⁷ אל נערץ בסוד קדשים רבה ונורא על
 כל סביביו: ⁸ יהוה אלהי צבאות מי כמוך חסין יה
 ואמונתך סביבותיך: ⁹ אתה מושל בגאות הים בשוא גליו
 אתה תשבחם: ¹⁰ אתה דכאת כחלל רהב בזרוע עזך
 פזרת אויביך: ¹¹ לך שמים אף לך ארץ תבל ומלאה
 אתה יסדתם: ¹² צפון וימין אתה בראתם תבור וחרמון
 בשמך ירננו: ¹³ לך זרוע עם גבורה תעז ירך תרום
 ימינך: ¹⁴ צדק ומשפט מכון כסאך חסד ואמת יקדמו
 פניך: ¹⁵ אשרי העם יודעי תרועה יהוה באור פניך
 יהלכון: ¹⁶ בשמך יגילון כל היום ובצדקתך ירומו:
¹⁷ כי תפארת עזמו אתה וברצנך תרים קרננו: ¹⁸ כי
 ליהוה מגננו ולקדוש ישראל מלכנו: ¹⁹ אז דברת בחזון
 לחסידריך ותאמר שויתי עזר על גבור הרימותי בחור
 מעם: ²⁰ מצאתי דוד עבדי בשמן קדשי משחתיו: ²¹ אשר
 ידי תכון עמו אף זרועי תאמצנו: ²² לא ישא אויב בו ובן
 עולה לא יעננו: ²³ וכתותי מפניו צריו ומשנאיו אנוף:
²⁴ ואמונתו וחסדי עמו ובשמי תרום קרנו: ²⁵ ושמתו
 בים ידו ובנהרות ימינו: ²⁶ הוא יקראני אבי אתה אלי
 וצור ישועתי: ²⁷ אף אני בכור אתנהו עליון למלכי ארץ:
²⁸ לעולם אשמור לו חסדי ובריתי נאמנת לו: ²⁹ ושמתו
 לעד זרעו וכסאן כימי שמים: ³⁰ אם יעזבו בניו תורתו
 ובמשפטי לא ילכון: ³¹ אם חקתי יחללו ומצותי לא
 ישמרו: ³² ופקדתי בשבת פשעם ובנגעים עונם: ³³ וחסדי
 לא אפיר מעמו ולא אשקר באמונתו: ³⁴ לא אחלל בריתי
 ומוצא שפתי לא אשנה: ³⁵ אחת נשבעתי בקדשי אם

לדוד אכזב: 36 זרעו לעולם יהיה וכסאו כשמש ננדי:
 37 כירח יכון עולם ועד בשחק נאמן סלה: 38 ואתה זנחת
 ותמאס התעברת עם משיחך: 39 נארתה ברית עבדך
 חללת לארץ נזרו: 40 פרצת כל גדרתיו שמת מבצריו
 מחתה: 41 שסהו כל עברי דרך היה חרפה לשכניו:
 42 הרימות ימין צריו השמחת כל אויביו: 43 אף תשיב
 צור חרבו ולא הקימתו במלחמה: 44 השבת מטהרו
 וכסאו לארץ מגרתה: 45 הקצרת ימי עלומיו העטית
 עליו בושח סלה: 46 עד מה יהוה תסתר לנצח תבער
 כמו אש חמתך: 47 זכר אני מה חלד על מה שוא בראת
 כל בני אדם: 48 מי גבר יחיה ולא יראה מות ימלט
 נפשו מיד שאול סלה: 49 איה חסדיך הראשנים אדני
 נשבעת לדוד באמונתך: 50 זכר אדני חרפת עבדיך
 שאתי בחיקי כל רבים עמים: 51 אשר חרפו אויביך יהוה
 אשר חרפו עקבות משיחך: 52 ברוך יהוה לעולם אמן
 ואמן:

90

1 תפלה למשה איש האלהים אדני מעון אתה היית
 לנו בדר ודר: 2 בטרם הרים ילדו ותחולל ארץ ותבל
 ומעולם עד עולם אתה אל: 3 תשב אנוש עד דכא ותאמר
 שובו בני אדם: 4 כי אלף שנים בעיניך כיום אתמול
 כי יעבר ואשמורה בלילה: 5 זרמתם שנה יהיו בבקר
 כחציר יחלף: 6 בבקר יציץ וחלף לערב ימולל ויבש:
 7 כי כלינו באפך ובחמתך נבהלנו: 8 שת עונתינו לנגדך
 עלמנו למאור פניך: 9 כי כל ימינו פנו בעברתך כלינו

שנינו כמו הגה: 10 ימי שנותינו בהם שבעים שנה ואם
 בגבורת שמונים שנה ורהבם עמל ואון כי גז חיש ונעפה:
 11 מי יודע עז אפך וכיראתך עברתך: 12 למנות ימינו כן
 הודע ונבא לבב חכמה: 13 שובה יהוה עד מתי והנחם
 על עבדיך: 14 שבענו בבקר חסדך ונרננה ונשמחה בכל
 ימינו: 15 שמחנו כימות עניתנו שנות ראינו רעה: 16 יראה
 אל עבדיך פעלך והדרך על בניהם: 17 ויהי נעם אדני
 אלהינו עלינו ומעשה ידינו כוננה עלינו ומעשה ידינו
 כוננהו:

91

1 ישב בסתר עליון בצל שדי יתלונן: 2 אמר ליהוה
 מחסי ומצודתי אלהי אבטח בו: 3 כי הוא יצילך מפח
 יקוש מדבר הוות: 4 באברתו יסך לך ותחת כנפיו תחסה
 צנה וסחרה אמתו: 5 לא תירא מפחד לילה מחץ יעוף
 יומם: 6 מדבר באפל יהלך מקטב ישוד צהרים: 7 יפל
 מצדך אלף ורובה מימינך אליך לא יגש: 8 רק בעיניך
 תביט ושלמת רשעים תראה: 9 כי אתה יהוה מחסי
 עליון שמת מעונך: 10 לא תאנה אליך רעה ונגע לא
 יקרב באהלך: 11 כי מלאכיו יצוה לך לשמרך בכל
 דרכיך: 12 על כפים ישאונך פן תגף באבן רגלך: 13 על
 שחל ופתן תדרך תרמס כפיר ותנין: 14 כי בי חשק
 ואפלטוהו אשגבהו כי ידע שמי: 15 יקראני ואענהו עמו
 אנכי בצרה אחלצהו ואכבדהו: 16 ארך ימים אשביעהו
 ואראהו בישועתי:

92

1 מזמור שיר ליום השבת טוב להדות ליהוה ולזמר

לשמך עליון: 2 להגיד בבקר חסדך ואמונתך בלילות:
 3 עלי עשור ועלי נבל עלי הגיון בכנור: 4 כי שמחתני
 יהוה בפעלך במעשי ידיך ארנן: 5 מה גדלו מעשיך
 יהוה מאד עמקו מחשבתך: 6 איש בער לא ידע וכסיל
 לא יבין את זאת: 7 בפרח רשעים כמו עשב ויציצו כל
 פעלי און להשמדם עדי עד: 8 ואתה מרום לעלם יהוה:
 9 כי הנה איביך יהוה כי הנה איביך יאבדו יתפרדו
 כל פעלי און: 10 ותרם כראים קרני בלתי בשמן רענן:
 11 ותבט עיני בשורי בקמים עלי מרעים תשמענה אזני:
 12 צדיק כתמר יפרח כארז בלבנון ישגה: 13 שתולים
 בבית יהוה בחצרות אלהינו יפריחו: 14 עוד ינובון
 בשיבה דשנים ורעננים יהיו: 15 להגיד כי ישר יהוה
 צורי ולא עלתה בו:

93

1 יהוה מלך גאות לבש לבש יהוה עז התאזר אף
 תכון תבל בל תמוט: 2 נכון כסאך מאז מעולם אתה:
 3 נשאו נהרות יהוה נשאו נהרות קולם ישאו נהרות
 דכים: 4 מקלות מים רבים אדירים משברי ים אדיר
 במרום יהוה: 5 עדתיך נאמנו מאד לביתך נאווה קדש
 יהוה לארך ימים:

94

1 אל נקמות יהוה אל נקמות הופיע: 2 הנשא שפט
 הארץ השב גמול על גאים: 3 עד מתי רשעים יהוה עד
 מתי רשעים יעלזו: 4 יביעו ידברו עתק ותאמרו כל פעלי

און: 5 עמך יהוה ידכאו ונחלתך יענו: 6 אלמנה וגר יהרגו
 ויתומים ירצחו: 7 ויאמרו לא יראה יה ולא יבין אלהי
 יעקב: 8 בינו בערים בעם וכסילים מתי תשכילו: 9 הנטע
 און הלא ישמע אם יצר עין הלא יביט: 10 היסר גוים
 הלא יוכיח המלמד אדם דעת: 11 יהוה ידע מחשבות
 אדם כי המה הבל: 12 אשרי הגבר אשר תיסרנו יה
 ומתורתך תלמדנו: 13 להשקיט לו מימי רע עד יכרה
 לרשע שחת: 14 כי לא יטש יהוה עמו ונחלתו לא יעזב:
 15 כי עד צדק ישוב משפט ואחריו כל ישרי לב: 16 מי
 יקום לי עם מרעים מי יתיצב לי עם פעלי און: 17 לולי
 יהוה עזרתה לי כמעט שכנה דומה נפשי: 18 אם אמרתי
 מטה רגלי חסדך יהוה יסעדני: 19 ברב שרעפי בקרבי
 תנחומיך ישעשעו נפשי: 20 היחברך כסא הוות יצר עמל
 עלי חק: 21 יגודו על נפש צדיק ודם נקי ירשיעו: 22 ויהי
 יהוה לי למשגב ואלהי לצור מחסי: 23 וישב עליהם את
 אונם וברעתם יצמיתם יצמיתם יהוה אלהינו:

95

1 לכו נרננה ליהוה נריעה לצור ישענו: 2 נקדמה
 פנינו בתודה בזמרות נריע לו: 3 כי אל גדול יהוה
 ומלך גדול על כל אלהים: 4 אשר בידו מחקרי ארץ
 ותועפות הרים לו: 5 אשר לו הים והוא עשהו ויבשת
 ידיו יצרו: 6 באו נשתחוו ונכרעה נברכה לפני יהוה
 עשנו: 7 כי הוא אלהינו ואנחנו עם מרעיתו וצאן ידו
 היום אם בקלו תשמעו: 8 אל תקשו לבבכם כמריבה
 כיום מסה במדבר: 9 אשר נסוני אבותיכם בחנוני גם
 ראו פעלי: 10 ארבעים שנה אקוט בדור ואמר עם תעי

לבב הם והם לא ידעו דרכי: 11 אשר נשבעתי באפי אם יבאון אל מנוחתתי:

96

1 שירו ליהוה שיר חדש שירו ליהוה כל הארץ:
 2 שירו ליהוה ברכו שמו בשרו מיום ליום ישועתו:
 3 ספרו בגוים כבודו בכל העמים נפלאותיו: 4 כי גדול יהוה ומהלל מאד נורא הוא על כל אלהים: 5 כי כל אלהי העמים אלילים ויהוה שמים עשה: 6 הוד והדר לפניו עז ותפארת במקדשו: 7 הבו ליהוה משפחות עמים הבו ליהוה כבוד ועז: 8 הבו ליהוה כבוד שמו שאו מנחה ובאו לחצרותיו: 9 השתחוו ליהוה בהדרת קדש חילו מפניו כל הארץ: 10 אמרו בגוים יהוה מלך אף תכון תבל בל תמוט ידין עמים במישרים: 11 ישמחו השמים ותגל הארץ ירעם הים ומלאו: 12 יעלז שדי וכל אשר בו אז ירננו כל עצי יער: 13 לפני יהוה כי בא כי בא לשפט הארץ ישפט תבל בצדק ועמים באמונתו:

97

1 יהוה מלך תגל הארץ ישמחו איים רבים: 2 ענו וערפל סביביו צדק ומשפט מכון כסאו: 3 אש לפניו תלך ותלהט סביב צריו: 4 האירו ברקיו תבל ראתה ותחל הארץ: 5 הרים כדונג נמסו מלפני יהוה מלפני אדון כל הארץ: 6 הגידו השמים צדקו וראו כל העמים כבודו: 7 יבשו כל עבדי פסל המתהללים באלילים השתחוו לו כל אלהים: 8 שמעה ותשמח ציון ותגלגלה בנות יהודה למען משפטיך יהוה: 9 כי אתה יהוה עליון

על כל הארץ מאד נעלית על כל אלהים: ¹⁰ אהבי יהוה שנאו רע שמר נפשות חסידיו מיד רשעים יצילם: ¹¹ אור זרע לצדיק ולישרי לב שמחה: ¹² שמחו צדיקים ביהוה והודו לזכר קדשו:

98

¹ מזמור שירו ליהוה שיר חדש כי נפלאות עשה הושיעה לו ימינו וזרוע קדשו: ² הודיע יהוה ישועתו לעיני הגוים גלה צדקתו: ³ זכר חסדו ואמונתו לבית ישראל ראו כל אפסי ארץ את ישועת אלהינו: ⁴ הריעו ליהוה כל הארץ פצחו ורננו וזמרו: ⁵ זמרו ליהוה בכנור בכנור וקול זמרה: ⁶ בחצצרות וקול שופר הריעו לפני המלך יהוה: ⁷ ירעם הים ומלאו תבל וישבי בה: ⁸ נהרות ימחאו כף יחד הרים ירננו: ⁹ לפני יהוה כי בא לשפט הארץ ישפט תבל בצדק ועמים במישרים:

99

¹ יהוה מלך ירגזו עמים ישב כרובים תנוט הארץ: ² יהוה בציון גדול ורם הוא על כל העמים: ³ יודו שמך גדול ונורא קדוש הוא: ⁴ ועז מלך משפט אהב אתה כוננת מישרים משפט וצדקה ביעקב אתה עשית: ⁵ רוממו יהוה אלהינו והשתחוו להדם רגליו קדוש הוא: ⁶ משה ואהרן בכהניו ושמואל בקראי שמו קראים אל יהוה והוא יענם: ⁷ בעמוד ענן ידבר אליהם שמרו עדתיו וחק נתן למו: ⁸ יהוה אלהינו אתה עניתם אל נשא היית

להם ונקם על עלילותם: ⁹ רוממו יהוה אלהינו והשתחונו
להר קדשו כי קדוש יהוה אלהינו:

100

¹ מזמור לתודה הריעו ליהוה כל הארץ: ² עבדו את
יהוה בשמחה באו לפניו ברננה: ³ דעו כי יהוה הוא
אלהים הוא עשנו ולא אנחנו עמו וצאן מרעיתו: ⁴ באו
שעריו בתודה חצרתיו בתהלה הודו לו ברכו שמו: ⁵ כי
טוב יהוה לעולם חסדו ועד דר ודר אמונתו:

101

¹ לדוד מזמור חסד ומשפט אשירה לך יהוה אזמרה:
² אשכילה בדרך תמים מתי תבוא אלי אתהלך בתם
לבבי בקרב ביתי: ³ לא אשית לנגד עיני דבר בליעל
עשה סטים שנאתי לא ידבק בי: ⁴ לבב עקש יסור ממני
רע לא אדע: ⁵ מלושני בסתר רעהו אותו אצמית גבה
עינים ורחב לבב אתו לא אוכל: ⁶ עיני בנאמני ארץ
לשבת עמדי הלך בדרך תמים הוא ישרתני: ⁷ לא ישב
בקרב ביתי עשה רמיה דבר שקרים לא יכון לנגד עיני:
⁸ לבקרים אצמית כל רשעי ארץ להכרית מעיר יהוה
כל פעלי און:

102

¹ תפלה לעני כי יעטרף ולפני יהוה ישפך שיחו יהוה
שמעה תפלתי ושועתי אליך תבוא: ² אל תסתר פניך
ממני ביום צר לי הטה אלי אזנך ביום אקרא מהר ענני:
³ כי כלו בעשן ימי ועצמותי כמו קד נחרו: ⁴ הוכה

כעשב ויבש לבי כי שכחתי מאכל לחמי: ⁵ מקול אנחתי
 דבקה עצמי לבשרי: ⁶ דמותי לקאת מדבר הייתי ככוס
 חרבות: ⁷ שקדתי ואהיה כצפור בודד על גג: ⁸ כל
 היום חרפוני אויבי מהוללי בי נשבעו: ⁹ כי אפר כלחם
 אכלתי ושקוי בבכי מסכתי: ¹⁰ מפני זעמך וקצפך כי
 נשאתני ותשליכני: ¹¹ ימי כצל נטוי ואני כעשב איבש:
¹² ואתה יהוה לעולם תשב וזכרך לדר ודר: ¹³ אתה
 תקום תרחם ציון כי עת לחננה כי בא מועד: ¹⁴ כי
 רצו עבדיך את אבניה ואת עפרה יחננו: ¹⁵ וייראו גוים
 את שם יהוה וכל מלכי הארץ את כבודך: ¹⁶ כי בנה
 יהוה ציון נראה בכבודו: ¹⁷ פנה אל תפלת הערער ולא
 בזה את תפלתם: ¹⁸ תכתב זאת לדור אחרון ועם נברא
 יהלל יה: ¹⁹ כי השקיף ממרום קדשו יהוה משמים אל
 ארץ הביט: ²⁰ לשמע אנקת אסיר לפתח בני תמותה:
²¹ לספר בציון שם יהוה ותהלתו בירושלם: ²² בהקבץ
 עמים יחדו וממלכות לעבד את יהוה: ²³ ענה בדרך כחו
 קצר ימי: ²⁴ אמר אלי אל תעלני בחצי ימי בדור דורים
 שנותיך: ²⁵ לפני הארץ יסדת ומעשה ידיך שמים:
²⁶ המה יאבדו ואתה תעמד וכלם כבגד יבלו כלבוש
 תחליפם ויחלפו: ²⁷ ואתה הוא ושנותיך לא יתמו: ²⁸ בני
 עבדיך ישכנו וזרעם לפניך יכון:

103

1 לדוד ברכי נפשי את יהוה וכל קרבי את שם
 קדשו: 2 ברכי נפשי את יהוה ואל תשכחי כל גמוליו:

3 הסלח לכל עונכי הרפא לכל תחלאיכי: 4 הנואל משחת חייכי המעטרכי חסד ורחמים: 5 המשביע בטוב עדיך תתחדש כנשר נעורייכי: 6 עשה צדקות יהוה ומשפטים לכל עשוקים: 7 יודיע דרכיו למשה לבני ישראל עלילותיו: 8 רחום וחנון יהוה ארך אפים ורב חסד: 9 לא לנצח יריב ולא לעולם יטור: 10 לא כחטאינו עשה לנו ולא כעונתינו גמל עלינו: 11 כי כגבה שמים על הארץ גבר חסדו על יראיו: 12 כרחק מזרח ממערב הרחיק ממנו את פשעינו: 13 כרחם אב על בנים רחם יהוה על יראיו: 14 כי הוא ידע יצרנו זכור כי עפר אנחנו: 15 אנוש כחציר ימיו כציץ השדה כן יציץ: 16 כי רוח עברה בו ואיננו ולא יכירנו עוד מקומו: 17 וחסד יהוה מעולם ועד עולם על יראיו וצדקתו לבני בנים: 18 לשמרי בריתו ולזכרי פקדיו לעשותם: 19 יהוה בשמים הכין כסאו ומלכותו בכל משלה: 20 ברכו יהוה מלאכיו גברי כח עשי דברו לשמע בקול דברו: 21 ברכו יהוה כל צבאיו משרתיו עשי רצונו: 22 ברכו יהוה כל מעשיו בכל מקומות ממשלתו ברכי נפשי את יהוה:

104

1 ברכי נפשי את יהוה יהוה אלהי גדלת מאד הוד והדר לבשת: 2 עטה אור כשלמה נוטה שמים כיריעה: 3 המקרה במים עליותיו השם עבים רכובו המהלך על כנפי רוח: 4 עשה מלאכיו רוחות משרתיו אש להט: 5 יסד ארץ על מכוניה בל תמוט עולם ועד: 6 תהום כלבוש כסיתו על הרים יעמדו מים: 7 מן גערתך ינוסון מן קול רעמך יחפזון: 8 יעלו הרים ירדו בקעות אל

מקום זה יסדת להם: ⁹ גבול שמת בל יעברון בל ישובון
לכסות הארץ: ¹⁰ המשלח מעינים בנחלים בין הרים
יהלכון: ¹¹ ישקו כל חיתו שדי ישברו פראים צמאם:
¹² עליהם עוף השמים ישכון מבין עפאים יתנו קול:
¹³ משקה הרים מעליותיו מפרי מעשיך תשבע הארץ:
¹⁴ מצמיח חציר לבהמה ועשב לעבדת האדם להוציא
לחם מן הארץ: ¹⁵ ויין ישמח לבב אנוש להצהיל פנים
משמן ולחם לבב אנוש יסעד: ¹⁶ ישבעו עצי יהוה ארזי
לבנון אשר נטע: ¹⁷ אשר שם צפרים יקננו חסידה
ברושים ביתה: ¹⁸ הרים הגבהים ליעלים סלעים מחסה
לשפנים: ¹⁹ עשה ירח למועדים שמש ידע מבואו:
²⁰ תשת חשך ויהי לילה בו תרמש כל חיתו יער:
²¹ הכפירים שאגים לטרף ולבקש מאל אכלם: ²² תזרח
השמש יאספון ואל מעונתם ירבצון: ²³ יצא אדם לפעלו
ולעבדתו עדי ערב: ²⁴ מה רבו מעשיך יהוה כלם
בחכמה עשית מלאה הארץ קנינך: ²⁵ זה הים גדול
ורחב ידיים שם רמש ואין מספר חיות קטנות עם גדלות:
²⁶ שם אניות יהלכון לויתן זה יצרת לשחק בו: ²⁷ כלם
אליך ישברון לתת אכלם בעתו: ²⁸ תתן להם ילקטון
תפתח ירך ישבעון טוב: ²⁹ תסתיר פניך יבהלון תסף
רוחם יגועון ואל עפרם ישובון: ³⁰ תשלח רוחך יבראון
ותחדש פני אדמה: ³¹ יהי כבוד יהוה לעולם ישמח יהוה
במעשיו: ³² המביט לארץ ותרעד יגע בהרים ויעשנו:
³³ אשירה ליהוה בחיי אומרה לאלהי בעודי: ³⁴ יערב
עליו שיחי אנכי אשמח ביהוה: ³⁵ יתמו חטאים מן הארץ

ורשעים עוד אינם ברכי נפשי את יהוה הללו יה:

105

1 הודו ליהוה קראו בשמו הודיעו בעמים עלילותיו:
 2 שירו לו זמרו לו שיחו בכל נפלאותיו: 3 התהללו בשם קדשו ישמח לב מבקשי יהוה: 4 דרשו יהוה ועזו בקשו פניו תמיד: 5 זכרו נפלאותיו אשר עשה מפתיו ומשפטי פיו: 6 זרע אברהם עבדו בני יעקב בחיריו: 7 הוא יהוה אלהינו בכל הארץ משפטיו: 8 זכר לעולם בריתו דבר צוה לאלף דור: 9 אשר כרת את אברהם ושבעתו לישחק: 10 ויעמידה ליעקב לחק לישראל ברית עולם: 11 לאמר לך אתן את ארץ כנען חבל נחלתכם: 12 בהיותם מתי מספר כמעט וגרים בה: 13 ויתהלכו מגוי אל גוי מממלכה אל עם אחר: 14 לא הניח אדם לעשקם ויוכח עליהם מלכים: 15 אל תגעו במשיחי ולנביאי אל תרעו: 16 ויקרא רעב על הארץ כל מטה לחם שבר: 17 שלח לפניהם איש לעבד נמכר יוסף: 18 ענו בכבל רגליו ברזל באה נפשו: 19 עד עת בא דברו אמרת יהוה צרפתהו: 20 שלח מלך ויתירהו משל עמים ויפתחהו: 21 שמו אדון לביתו ומשל בכל קנינו: 22 לאסר שריו בנפשו וזקניו יחכם: 23 ויבא ישראל מצרים ויעקב גר בארץ חם: 24 ויפר את עמו מאד ויעצמהו מצריו: 25 הפך לבם לשנא עמו להתנכל בעבדיו: 26 שלח משה עבדו אהרן אשר בחר בו: 27 שמו במ דברי אתותיו ומפתים בארץ חם: 28 שלח חשך ויחשך ולא מרו את דבריו: 29 הפך את מימיהם

לדם וימת את דגתם: ³⁰ שרץ ארצם צפרדעים בחדרי מלכיהם: ³¹ אמר ויבא ערב כנים בכל גבולם: ³² נתן גשמיהם ברד אש להבות בארצם: ³³ ויך גפנם ותאנתם וישבר עץ גבולם: ³⁴ אמר ויבא ארבה וילק ואין מספר: ³⁵ ויאכל כל עשב בארצם ויאכל פרי אדמתם: ³⁶ ויך כל בכור בארצם ראשית לכל אונם: ³⁷ ויוציאם בכסף וזהב ואין בשבטיו כושל: ³⁸ שמח מצרים בצאתם כי נפל פחדם עליהם: ³⁹ פרש ענן למסך ואש להאיר לילה: ⁴⁰ שאל ויבא שלו ולחם שמים ישביעם: ⁴¹ פתח צור ויזובו מים הלכו בציות נהר: ⁴² כי זכר את דבר קדשו את אברהם עבדו: ⁴³ ויוצא עמו בששון ברנה את בחיריו: ⁴⁴ ויתן להם ארצות גוים ועמל לאמים יירשו: ⁴⁵ בעבור ישמרו חקיו ותורתיו ינצרו הללו יה:

106

¹ הללויה הודו ליהוה כי טוב כי לעולם חסדו:
² מי ימלל גבורות יהוה ישמיע כל תהלתו: ³ אשרי שמרי משפט עשה צדקה בכל עת: ⁴ זכרני יהוה ברצון עמך פקדני בישועתך: ⁵ לראות בטובת בחיריך לשמח בשמחת גויך להתהלל עם נחלתך: ⁶ חטאנו עם אבותינו העוינו הרשענו: ⁷ אבותינו במצרים לא השכילו נפלאותיך לא זכרו את רב חסדיך וימרו על ים בים סוף: ⁸ ויושיעם למען שמו להודיע את גבורתו: ⁹ ויגער בים סוף ויחרב ויוליכם בתהמות כמדבר: ¹⁰ ויושיעם מיד שונא ויגאלם מיד אויב: ¹¹ ויכסו מים צריהם אחד מהם לא נותר: ¹² ויאמינו בדבריו ישירו

תהלתו: 13 מהרו שכחו מעשיו לא חכו לעצתו: 14 ויתאוו
תאוה במדבר וינסו אל בישימון: 15 ויתן להם שאלתם
וישלח רזון בנפשם: 16 ויקנאו למשה במחנה לאהרן
קדוש יהוה: 17 תפתח ארץ ותבלע דתן ותכס על עדת
אבירם: 18 ותבער אש בעדתם להבה תלהט רשעים:
19 יעשו עגל בחרב וישתחוו למסכה: 20 וימירו את
כבודם בתבנית שור אכל עשב: 21 שכחו אל מושיעם
עשה גדלות במצרים: 22 נפלאות בארץ חם נוראות
על ים סוף: 23 ויאמר להשמידם לולי משה בחירו
עמד בפרץ לפניו להשיב חמתו מהשחית: 24 וימאסו
בארץ חמדה לא האמינו לדברו: 25 וירגנו באהליהם
לא שמעו בקול יהוה: 26 וישא ידו להם להפיל אותם
במדבר: 27 ולהפיל זרעם בגוים ולזרותם בארצות:
28 ויצמדו לבעל פעור ויאכלו זבחי מתים: 29 ויכעיסו
במעלליהם ותפרץ בם מגפה: 30 ויעמד פינחס ויפלל
ותעצר המגפה: 31 ותחשב לו לצדקה לדר ודר עד
עולם: 32 ויקציפו על מי מריבה וירע למשה בעבורם:
33 כי המרו את רוחו ויבטא בשפתיו: 34 לא השמידו את
העמים אשר אמר יהוה להם: 35 ויתערבו בגוים וילמדו
מעשיהם: 36 ויעבדו את עצביהם ויהיו להם למוקש:
37 ויזבחו את בניהם ואת בנותיהם לשדים: 38 וישפכו דם
נקי דם בניהם ובנותיהם אשר זבחו לעצבי כנען ותחנף
הארץ בדמים: 39 ויטמאו במעשיהם ויזנו במעלליהם:
40 ויחר אף יהוה בעמו ויתעב את נחלתו: 41 ויתנם
ביד גוים וימשלו בהם שנאיהם: 42 וילחצום אויביהם
ויכנעו תחת ידם: 43 פעמים רבות יצילם והמה ימרו

בעצתם וימכו בעונם: 44 וירא בצר להם בשמעו את רנתם: 45 ויזכר להם בריתו וינחם כרב חסדו: 46 ויתן אותם לרחמים לפני כל שוביהם: 47 הושיענו יהוה אלהינו וקבצנו מן הגוים להדות לשם קדשך להשתבח בתהלתך: 48 ברוך יהוה אלהי ישראל מן העולם ועד העולם ואמר כל העם אמן הללו יה:

107

1 הרו ליהוה כי טוב כי לעולם חסדו: 2 יאמרו גאולי יהוה אשר גאלם מיד צר: 3 ומארצות קבצם ממזרח וממערב מצפון ומים: 4 תעו במדבר בשימון דרך עיר מושב לא מצאו: 5 רעבים גם צמאים נפשם בהם תתעטף: 6 ויצעקו אל יהוה בצר להם ממצוקותיהם יצילים: 7 ויודריכם בדרך ישרה ללכת אל עיר מושב: 8 יודו ליהוה חסדו ונפלאותיו לבני אדם: 9 כי השביע נפש שקקה ונפש רעבה מלא טוב: 10 ישבי חשך וצלמות אסירי עני וברזל: 11 כי המרו אמרי אל ועצת עליון נאצו: 12 ויכנע בעמל לבם כשלו ואין עזר: 13 ויזעקו אל יהוה בצר להם ממצוקותיהם יושיעם: 14 יוציאם מחשך וצלמות ומוסרותיהם ינתק: 15 יודו ליהוה חסדו ונפלאותיו לבני אדם: 16 כי שבר דלתות נחשת ובריחי ברזל גדע: 17 אולים מדרך פשעם ומעונותיהם יתענו: 18 כל אכל תתעב נפשם ויגיעו עד שערי מות: 19 ויזעקו אל יהוה בצר להם ממצוקותיהם יושיעם: 20 ישלח דברו וירפאם וימלט משחיתותם: 21 יודו ליהוה חסדו ונפלאותיו לבני אדם: 22 ויזבחו זבחי תודה ויספרו מעשיו ברנה: 23 יורדי הים באניות עשי מלאכה במים

רבים: 24 המה ראו מעשי יהוה ונפלאותיו במצולה:
 25 ויאמר ויעמד רוח סערה ותרומם גליו: 26 יעלו
 שמים ירדו תהומות נפשם ברעה תתמונג: 27 יחוגו וינעו
 כשכור וכל חכמתם תתבלע: 28 ויצעקו אל יהוה בצר
 להם וממצוקתיהם יוציאים: 29 יקם סערה לדממה ויחשו
 גליהם: 30 וישמחו כי ישתקו וינחם אל מחוז חפצם:
 31 יודו ליהוה חסדו ונפלאותיו לבני אדם: 32 וירממוהו
 בקהל עם ובמושב זקנים יהללוהו: 33 ישם נהרות
 למדבר ומצאי מים לצמאון: 34 ארץ פרי למלחה מרעת
 ישבי בה: 35 ישם מדבר לאגם מים וארץ ציה למצאי
 מים: 36 ויושב שם רעבים ויכוננו עיר מושב: 37 ויזרעו
 שדות ויטעו כרמים ויעשו פרי תבואה: 38 ויברכם וירבו
 מאד ובהמתם לא ימעט: 39 וימעטו וישחו מעצר רעה
 ויגון: 40 שפך בוז על נדיבים ויתעם בתהו לא דרך:
 41 וישגב אביון מעוני וישם כצאן משפחות: 42 יראו
 ישרים וישמחו וכל עולה קפצה פיה: 43 מי חכם וישמר
 אלה ויתבוננו חסדי יהוה:

108

1 שיר מזמור לדוד נכון לבי אלהים אשירה ואזמרה
 אף כבודי: 2 עורה הנבל וכנור אעירה שחר: 3 אודך
 בעמים יהוה ואזמרך בל אמים: 4 כי גדול מעל שמים
 חסדך ועד שחקים אמתך: 5 רומה על שמים אלהים
 ועל כל הארץ כבודך: 6 למען יחלצון ידידיך הושיעה
 ימינך וענני: 7 אלהים דבר בקדשו אעלזה אחלקה
 שכם ועמק סכות אמדד: 8 לי גלעד לי מגשה ואפרים
 מעוז ראשי יהודה מחקקי: 9 מואב סיר רחצי על אדום

אשליך נעלי עלי פלשת אתרועע: 10 מי יבלני עיר
 מבצר מי נחני עד אדום: 11 הלא אלהים זנחתנו ולא
 תצא אלהים בצבאתינו: 12 הבה לנו עזרת מצר ושוא
 תשועת אדם: 13 באלהים נעשה חיל והוא יבוס צרינו:

109

1 למנצח לדוד מזמור אלהי תהלתי אל תחרש:
 2 כי פי רשע ופי מרמה עלי פתחו דברו אתי לשון
 שקר: 3 ודברי שנאה סבבוני וילחמוני חנם: 4 תחת
 אהבתי ישטנוני ואני תפלה: 5 וישימו עלי רעה תחת
 טובה ושנאה תחת אהבתי: 6 הפקר עליו רשע ושטן
 יעמד על ימינו: 7 בהשפטו יצא רשע ותפלתו תהיה
 לחטאה: 8 יהיו ימיו מעטים פקדתו יקח אחר: 9 יהיו בניו
 יתומים ואשתו אלמנה: 10 ונוע ונועו בניו ושאלו ודרשו
 מחרבותיהם: 11 ינקש נושה לכל אשר לו ויבזו זרים
 יגיעו: 12 אל יהי לו משך חסד ואל יהי חונן ליתומיו:
 13 יהי אחריתו להכרית בדור אחר ימח שמו: 14 יזכר
 עון אבתיו אל יהוה וחסאת אמו אל תמוח: 15 יהיו נגד
 יהוה תמיד ויכרת מארץ זכרם: 16 יען אשר לא זכר
 עשות חסד וירדף איש עני ואביון ונכאה לבב למוותת:
 17 ויאהב קללה ותבואהו ולא חפץ בברכה ותרחק
 ממנו: 18 וילבש קללה כמדו ותבא כמים בקרבו וכשמן
 בעצמותיו: 19 תהי לו כבגד יעטה ולמזח תמיד יחגרה:
 20 זאת פעלת שטני מאת יהוה והדברים רע על נפשי:
 21 ואתה יהוה אדני עשה אתי למען שמך כי טוב חסדך
 הצילני: 22 כי עני ואביון אנכי ולבי חלל בקרבי: 23 כצל
 כנשותו נהלכתי ננערתי כארבה: 24 ברכי כשלו מצום

ובשרי כחש משמן: 25 ואני הייתי חרפה להם יראוני
 יניעון ראשם: 26 עזרני יהוה אלהי הושיעני כחסדך:
 27 וידעו כי ירך זאת אתה יהוה עשיתה: 28 יקללו המה
 ואתה תברך קמו ויבשו ועבדך ישמח: 29 ילבשו שוטני
 כלמה ויעטו כמעיל בשתם: 30 אודה יהוה מאד בפי
 ובתוך רבים אהללנו: 31 כי יעמד לימין אביון להושיע
 משפטי נפשו:

110

1 לרוד מזמור נאם יהוה לאדני שב לימיני עד אשית
 איביך הדם לרגליך: 2 מטה עזך ישלח יהוה מציון רדה
 בקרב איביך: 3 עמך נדבת ביום חילך בהדרי קדש
 מרחם משחר לך טל ילדתיך: 4 נשבע יהוה ולא ינחם
 אתה כהן לעולם על דברתי מלכי צדק: 5 אדני על
 ימינך מחץ ביום אפו מלכים: 6 ידין בגוים מלא גויות
 מחץ ראש על ארץ רבה: 7 מנחל בדרך ישתה על כן
 ירים ראש:

111

1 הללו יה אודה יהוה בכל לבב ישרים ועדה:
 2 גדלים מעשי יהוה דרושים לכל חפציהם: 3 הוד והדר
 פעלו וצדקתו עמדת לעד: 4 זכר עשה לנפלאותיו חנון
 ורחום יהוה: 5 טרף נתן ליראיו יזכר לעולם בריתו:
 6 כח מעשיו הגיד לעמו לתת להם נחלת גוים: 7 מעשי
 ידיו אמת ומשפט נאמנים כל פקודיו: 8 סמוכים לעד
 לעולם עשויים באמת וישר: 9 פדות שלח לעמו צוה
 לעולם בריתו קדוש ונורא שמו: 10 ראשית חכמה יראת
 יהוה שכל טוב לכל עשיהם תהלתו עמדת לעד:

112

1 הללו יה אשרי איש ירא את יהוה במצותיו חפץ
 מאד: 2 גבור בארץ יהיה זרעו דור ישרים יברך: 3 הון
 ועשר בביתו וצדקתו עמדת לעד: 4 זרח בחשך אור
 לישרים חנון ורחום וצדיק: 5 טוב איש חנון ומלוה
 וכלכל דבריו במשפט: 6 כי לעולם לא ימוט לזכר
 עולם יהיה צדיק: 7 משמועה רעה לא יירא נכון לבו
 בטח ביהוה: 8 סמוך לבו לא יירא עד אשר יראה
 בצריו: 9 פזר נתן לאביונים צדקתו עמדת לעד קרנו
 תרום בכבוד: 10 רשע יראה וכעס שניו יחרק ונמס תאות
 רשעים תאבד:

113

1 הללו יה הללו עבדי יהוה הללו את שם יהוה: 2 יהי
 שם יהוה מברך מעתה ועד עולם: 3 ממזרח שמש עד
 מבואו מהלל שם יהוה: 4 רם על כל גוים יהוה על
 השמים כבודו: 5 מי כיהוה אלהינו המגביהי לשבת:
 6 המשפילי לראות בשמים ובארץ: 7 מקימי מעפר דל
 מאשפת ירים אביון: 8 להושיבי עם נדיבים עם נדיבי
 עמו: 9 מושיבי עקרת הבית אם הבנים שמחה הללו יה:

114

1 בצאת ישראל ממצרים בית יעקב מעם לעז: 2 היתה
 יהודה לקדשו ישראל ממשלותיו: 3 הים ראה וינס
 הירדן יסב לאחור: 4 ההרים רקדו כאילים גבעות
 כבני צאן: 5 מה לך הים כי תנוס הירדן תסב לאחור:
 6 ההרים תרקדו כאילים גבעות כבני צאן: 7 מלפני אדון

חולי ארץ מלפני אלוה יעקב: 8 ההפכי הצור אנם מים
חלמיש למעינו מים:

115

1 לא לנו יהוה לא לנו כי לשמך תן כבוד על
חסדך על אמתך: 2 למה יאמרו הגוים איה נא אלהיהם:
3 ואלהינו בשמים כל אשר חפץ עשה: 4 עצביהם כסף
וזהב מעשה ידי אדם: 5 פה להם ולא ידברו עינים
להם ולא יראו: 6 אזנים להם ולא ישמעו אף להם ולא
יריחונו: 7 ידיהם ולא ימישונו רגליהם ולא יהלכו לא
יהנו בגרונם: 8 כמוהם יהיו עשיהם כל אשר בטח בהם:
9 ישראל בטח ביהוה עזרם ומגנם הוא: 10 בית אהרן
בטחו ביהוה עזרם ומגנם הוא: 11 יראי יהוה בטחו
ביהוה עזרם ומגנם הוא: 12 יהוה זכרנו יברך יברך
את בית ישראל יברך את בית אהרן: 13 יברך יראי
יהוה הקטנים עם הגדלים: 14 יסף יהוה עליכם עליכם
ועל בניכם: 15 ברוכים אתם ליהוה עשה שמים וארץ:
16 השמים שמים ליהוה והארץ נתן לבני אדם: 17 לא
המתים יהללו יה ולא כל ירדי רומה: 18 ואנחנו נברך
יה מעתה ועד עולם הללו יה:

116

1 אהבתי כי ישמע יהוה את קולי תחנוני: 2 כי הטח
אזנו לי ובימי אקרא: 3 אפפוני חבלי מות ומצרי שאול
מצאוני צרה ויגון אמצא: 4 ובשם יהוה אקרא אנה יהוה
מלטה נפשי: 5 חנון יהוה וצדיק ואלהינו מרחם: 6 שמר
פתאים יהוה דלותי ולי יהושיע: 7 שובי נפשי למנוחיכי

כי יהוה גמל עליכי: 8 כי חלצת נפשי ממות את עיני מן דמעה את רגלי מדחי: 9 אתהלך לפני יהוה בארצות החיים: 10 האמנתי כי אדבר אני עניתי מאד: 11 אני אמרתי בחפזי כל האדם כזב: 12 מה אשיב ליהוה כל תגמולוהי עלי: 13 כוס ישועות אשא ובשם יהוה אקרא: 14 נדרי ליהוה אשלם נגדה נא לכל עמו: 15 יקר בעיני יהוה המותה לחסידיו: 16 אנה יהוה כי אני עבדך אני עבדך בן אמתך פתחת למוסרי: 17 לך אזבח זבח תודה ובשם יהוה אקרא: 18 נדרי ליהוה אשלם נגדה נא לכל עמו: 19 בחצרות בית יהוה בתוככי ירושלם הללו יה:

117

1 הללו את יהוה כל גוים שבחוהו כל האמים: 2 כי גבר עלינו חסדו ואמת יהוה לעולם הללו יה:

118

1 הודו ליהוה כי טוב כי לעולם חסדו: 2 יאמר נא ישראל כי לעולם חסדו: 3 יאמרו נא בית אהרן כי לעולם חסדו: 4 יאמרו נא יראי יהוה כי לעולם חסדו: 5 מן המצר קראתי יה ענני במרחב יה: 6 יהוה לי לא אירא מה יעשה לי אדם: 7 יהוה לי בעזרי ואני אראה בשנאי: 8 טוב לחסות ביהוה מבטח באדם: 9 טוב לחסות ביהוה מבטח בנדיבים: 10 כל גוים סבבוני בשם יהוה כי אמילם: 11 סבוני גם סבבוני בשם יהוה כי אמילם: 12 סבוני כדבורים דעכו כאש קוצים בשם יהוה כי אמילם: 13 דחה דחיתני לנפל ויהוה עזרני: 14 עזי וזמרת יה ויהי לי לישועה: 15 קול רנה וישועה באהלי צדיקים ימין יהוה עשה חיל: 16 ימין יהוה רוממה ימין

יהוה עשה חיל: 17 לא אמות כי אחיה ואספר מעשי יה: 18 יסר יסרני יה ולמות לא נתנני: 19 פתחו לי שערי צדק אבא במ אודה יה: 20 זה השער ליהוה צדיקים יבאו בו: 21 אודך כי עניתני ותהי לי לישועה: 22 אבן מאסו הבונים היתה לראש פנה: 23 מאת יהוה היתה זאת היא נפלאות בעינינו: 24 זה היום עשה יהוה נגילה ונשמחה בו: 25 אנא יהוה הושיעה נא אנא יהוה הצליחה נא: 26 ברוך הבא בשם יהוה ברכנוכם מבית יהוה: 27 אל יהוה ויאר לנו אסרו חג בעבתים עד קרנות המזבח: 28 אלי אתה ואודך אלהי ארוממך: 29 הודו ליהוה כי טוב כי לעולם חסדו:

119

1 אשרי תמימי דרך התלכים בתורת יהוה: 2 אשרי נצרי עדתיו בכל לב ידרשוהו: 3 אף לא פעלו עולה בדרכיו הלכו: 4 אתה צויתתה פקדיך לשמר מאד: 5 אחלי יכנו דרכי לשמר חקיך: 6 אז לא אבוש בהביטי אל כל מצותיך: 7 אודך בישר לבב בלמדי משפטי צדקך: 8 את חקיך אשמר אל תעזבני עד מאד: 9 במה יזכה נער את ארחו לשמר כדברך: 10 בכל לבי דרשתיך אל תשגני ממצותיך: 11 בלבי צפנתי אמרתך למען לא אחטא לך: 12 ברוך אתה יהוה למדני חקיך: 13 בשפתי ספרתי כל משפטי פיך: 14 בדרך עדותיך ששתי כעל כל הון: 15 בפקדיך אישיחה ואביטה ארחתיך: 16 בחקתיך אשתעשע לא אשכח דברך: 17 גמל על עברך אחיה ואשמרה דברך:

18 גל עיני ואביטה נפלאות מתורתך: 19 גר אנכי בארץ
 אל תסתר ממני מצותיך: 20 גרסה נפשי לתאבה אל
 משפטיך בכל עת: 21 גערת זדים ארורים השנים
 ממצותיך: 22 גל מעלי חרפה ובוז כי עדתיך נצרתני:
 23 גם ישבו שרים בי נדברו עבדך ישיח בחקיך: 24 גם
 עדתיך שעשעי אנשי עצתי: 25 דבקה לעפר נפשי חינו
 כדברך: 26 דרכי ספרתי ותענני למדני חקיך: 27 דרך
 פקודיך הבינני ואשיחה בנפלאותיך: 28 דלפה נפשי
 מתונה קימני כדברך: 29 דרך שקר הסר ממני ותורתך
 חנני: 30 דרך אמונה בחרתי משפטיך שויתי: 31 דבקתי
 בעדותיך יהוה אל תבישני: 32 דרך מצותיך ארוץ
 כי תרחיב לבי: 33 הורני יהוה דרך חקיך ואצרנה
 עקב: 34 הבינני ואצרה תורתך ואשמרנה בכל לב:
 35 הדריכני בנתיב מצותיך כי בו חפצתי: 36 הט לבי
 אל עדותיך ואל אל בצע: 37 העבר עיני מראות שוא
 בדרכך חינו: 38 הקם לעבדך אמרתך אשר ליראתך:
 39 העבר חרפתי אשר יגרתני כי משפטיך טובים: 40 הנה
 תאבתי לפקדיך בצדקתך חינו: 41 ויבאני חסדך יהוה
 תשועתך כאמרתך: 42 ואענה חרפי דבר כי בטחתני
 בדברך: 43 ואל תצל מפי דבר אמת עד מאד כי
 למשפטך יחלתי: 44 ואשמרה תורתך תמיד לעולם ועד:
 45 ואתהלכה ברחבה כי פקדיך דרשתי: 46 ואדברה
 בעדתיך נגד מלכים ולא אבוש: 47 ואשתעשע במצותיך
 אשר אהבתי: 48 ואשא כפי אל מצותיך אשר אהבתי
 ואשיחה בחקיך: 49 זכר דבר לעבדך על אשר יחלתני:

50 זאת נחמתי בעניי כי אמרתך חיתני: 51 זדים הליצני
 עד מאד מתורתך לא נשיתי: 52 זכרתי משפטיך מעולם
 יהוה ואתנחם: 53 זלעפה אחזתני מרשעים עזבי תורתך:
 54 זמרות היו לי חקיך בבית מגורי: 55 זכרתי בלילה
 שמך יהוה ואשמרה תורתך: 56 זאת היתה לי כי פקדיך
 נצרתני: 57 חלקי יהוה אמרתי לשמר דבריך: 58 חליתי
 פניך בכל לב חנני כאמרתך: 59 חשבתי דרכי ואשיבה
 רגלי אל עדתיך: 60 חשתי ולא התמהמהתי לשמר
 מצותיך: 61 חבלי רשעים עודני תורתך לא שכחתי:
 62 חצות לילה אקום להודות לך על משפטי צדקך:
 63 חבר אני לכל אשר יראוך ולשמרי פקודיך: 64 חסדך
 יהוה מלאה הארץ חקיך למדני: 65 טוב עשית עם
 עבדך יהוה כדברך: 66 טוב טעם ודעת למדני כי
 במצותיך האמנתי: 67 טרם אענה אני שגג ועתה אמרתך
 שמרתי: 68 טוב אתה ומטיב למדני חקיך: 69 טפלו
 עלי שקר זדים אני בכל לב אצר פקודיך: 70 טפש
 כחלב לבם אני תורתך שעשעתי: 71 טוב לי כי עניתני
 למען אלמד חקיך: 72 טוב לי תורת פיך מאלפי זהב
 וכסף: 73 יריך עשוני ויכוננוני הבינני ואלמדה מצותיך:
 74 יראיך יראוני וישמחו כי לדברך יחלתי: 75 ידעתי
 יהוה כי צדק משפטיך ואמונה עניתני: 76 יהי נא חסדך
 לנחמני כאמרתך לעבדך: 77 יבאוני רחמיך ואחיה
 כי תורתך שעשעי: 78 יבשו זדים כי שקר עותוני אני
 אשיח בפקודיך: 79 ישובו לי יראיך וידעו עדתיך:

80 יהי לבי תמים בחקיך למען לא אבוש: 81 כלתה
 לתשועתך נפשי לדברך יחלתי: 82 כלו עיני לאמרתך
 לאמר מתי תנחמני: 83 כי הייתי כנאד בקיטור חקיך
 לא שכחתי: 84 כמה ימי עבדך מתי תעשה ברדפי
 משפט: 85 כרו לי זדים שיחות אשר לא כתורתך:
 86 כל מצותיך אמונה שקר רדפוני עזרני: 87 כמעט
 כלוני בארץ ואני לא עזבתי פקודיך: 88 כחסדך חניני
 ואשמרה עדות פיך: 89 לעולם יהוה דברך נצב בשמים:
 90 לדר ודר אמונתך כוננת ארץ ותעמד: 91 למשפטיך
 עמדו היום כי הכל עבדיך: 92 לולי תורתך שעשעי
 אז אברתי בעניי: 93 לעולם לא אשכח פקודיך כי בם
 חייתני: 94 לך אני הושיעני כי פקודיך דרשתי: 95 לי קוו
 רשעים לאבדני עדתיך אתבונן: 96 לכל תכלה ראיתי
 קץ רחבה מצותך מאד: 97 מה אהבתי תורתך כל היום
 היא שיחתי: 98 מאיבי תחכמני מצותך כי לעולם היא
 לי: 99 מכל מלמדי השכלתי כי עדותיך שיחה לי:
 100 מזקנים אתבונן כי פקודיך נצרתי: 101 מכל ארח
 רע כלאתי רגלי למען אשמר דברך: 102 ממשפטיך לא
 סרתי כי אתה הורתני: 103 מה נמלצו לחכי אמרתך
 מדבש לפי: 104 מפקודיך אתבונן על כן שנאתי כל ארח
 שקר: 105 נר לרגלי דברך ואור לנתיבתי: 106 נשבעתי
 ואקימה לשמר משפטי צדקך: 107 נעניתי עד מאד יהוה
 חניני כדברך: 108 נדבות פי רצה נא יהוה ומשפטיך
 למדני: 109 נפשי בכפי תמיד ותורתך לא שכחתי:

110 נתנו רשעים פח לי ומפקודיך לא תעיתי: 111 נחלתי
 עדותיך לעולם כי ששון לבי המה: 112 נטיתי לבי
 לעשות חקיך לעולם עקב: 113 סעפים שנאתי ותורתך
 אהבתי: 114 סתרי ומגני אתה לדברך יחלתי: 115 סורו
 ממני מרעים ואצרה מצות אלהי: 116 סמכני כאמרתך
 ואחיה ואל תבישני משברי: 117 סעדני ואושעה ואשעה
 בחקיך תמיד: 118 סלית כל שונים מחקיך כי שקר
 תרמיתם: 119 סגים השבת כל רשעי ארץ לכן אהבתי
 עדתיך: 120 סמה מפחדך בשרי וממשפטיך יראתי:
 121 עשיתי משפט וצדק בל תניחני לעשקי: 122 ערב
 עבדך לטוב אל יעשקני זדים: 123 עיני כלו לישועתך
 ולאמרת צדקך: 124 עשה עם עבדך כחסדך וחקיך
 למדני: 125 עבדך אני הבינני ואדעה עדתיך: 126 עת
 לעשות ליהוה הפרו תורתך: 127 על כן אהבתי מצותיך
 מזהב ומפז: 128 על כן כל פקודי כל ישרתי כל ארח
 שקר שנאתי: 129 פלאות עדותיך על כן נצרתם נפשי:
 130 פתח דבריך יאיר מבין פתיים: 131 פי פערתי
 ואשאפה כי למצותיך יאבתי: 132 פנה אלי וחנני כמשפט
 לאהבי שמך: 133 פעמי הכן באמרתך ואל תשלט
 בי כל און: 134 פדני מעשק אדם ואשמרה פקודיך:
 135 פניך האר בעבדך ולמדני את חקיך: 136 פלגי מים
 ירדו עיני על לא שמרו תורתך: 137 צדיק אתה יהוה
 וישר משפטיך: 138 צוית צדק עדתיך ואמונה מאד:
 139 צמתתני קנאתי כי שכחו דבריך צרי: 140 צרופה
 אמרתך מאד ועבדך אהבה: 141 צעיר אנכי ונבזה

פקדיך לא שכחתי: 142 צדקתך צדק לעולם ותורתך
אמת: 143 צר ומצוק מצאוני מצותיך שעשעי: 144 צדק
עדותיך לעולם הבינני ואחיה: 145 קראתי בכל לב
ענני יהוה חקיך אצרה: 146 קראתיך הושיעני ואשמרה
עדתיך: 147 קדמתי בנשף ואשועה לדבריך יחלתי:
148 קדמו עיני אשמרות לשיח באמרתך: 149 קולי שמעה
כחסדך יהוה כמשפטך חיני: 150 קרבו רדפי זמה
מתורתך רחקו: 151 קרוב אתה יהוה וכל מצותיך אמת:
152 קדם ידעתי מעדתיך כי לעולם יסדתם: 153 ראה
עניי וחלצני כי תורתך לא שכחתי: 154 ריבה ריבי
וגאלני לאמרתך חיני: 155 רחוק מרשעים ישועה כי
חקיך לא דרשו: 156 רחמוך רבים יהוה כמשפטך חיני:
157 רבים רדפי וצרי מעדותיך לא נשיתי: 158 ראיתי
בגדים ואתקוטטה אשר אמרתך לא שמרו: 159 ראה
כי פקודיך אהבתי יהוה כחסדך חיני: 160 ראש דברך
אמת ולעולם כל משפט צדקך: 161 שרים רדפוני חנם
ומדבריך פחד לבי: 162 שש אנכי על אמרתך כמוצא
שלל רב: 163 שקר שנאתי ואתעבה תורתך אהבתי:
164 שבע ביום הללתיך על משפטי צדקך: 165 שלום רב
לאהבי תורתך ואין למו מכשול: 166 שברתי לישועתך
יהוה ומצותיך עשיתי: 167 שמרה נפשי עדתיך ואהבם
מאד: 168 שמרתי פקודיך ועדתיך כי כל דרכי נגדך:
169 תקרב רנתי לפניך יהוה כדברך הבינני: 170 תבוא
תחנתי לפניך כאמרתך הצילני: 171 תבענה שפתי
תהלה כי תלמדני חקיך: 172 תען לשוני אמרתך כי כל

מצותיך צדק: 173 תהי ירך לעזרני כי פקודיך בחרתי:
 174 תאבתי לישועתך יהוה ותורתך שעשעי: 175 תחי
 נפשי ותהללך ומשפטך יעזרני: 176 תעיתי כשה אבד
 בקש עבדך כי מצותיך לא שכחתי:

120

1 שיר המעלות אל יהוה בצרתה לי קראתי ויענני:
 2 יהוה הצילה נפשי משפת שקר מלשון רמיה: 3 מה יתן
 לך ומה יסיף לך לשון רמיה: 4 חצי גבור שנונים עם
 גחלי רתמים: 5 אויה לי כי גרתי משך שכנתי עם אהלי
 קדר: 6 רבת שכנה לה נפשי עם שונא שלום: 7 אני שלום
 וכי אדבר המה למלחמה:

121

1 שיר למעלות אשא עיני אל ההרים מאין יבא עזרי:
 2 עזרי מעם יהוה עשה שמים וארץ: 3 אל יתן למוט
 רגלך אל ינום שמרך: 4 הנה לא ינום ולא יישן שומר
 ישראל: 5 יהוה שמרך יהוה צלך על יד ימינך: 6 יומם
 השמש לא יכבה וירח בלילה: 7 יהוה ישמרך מכל רע
 ישמר את נפשך: 8 יהוה ישמר צאתך ובואך מעתה ועד
 עולם:

122

1 שיר המעלות לדוד שמחתי באמרים לי בית יהוה
 נלך: 2 עמדות היו רגלינו בשעריך ירושלם: 3 ירושלם
 הבנויה כעיר שחברה לה יחדו: 4 ששם עלו שבטים
 שבטי יה עדות לישראל להדות לשם יהוה: 5 כי
 שמה ישבו כסאות למשפט כסאות לבית דויד: 6 שאלו

שלום ירושלם ישליו אהביך: 7 יהי שלום בחילך שלוח
 בארמנותיך: 8 למען אחי ורעי אדברה נא שלום בך:
 9 למען בית יהוה אלהינו אבקשה טוב לך:

123

1 שיר המעלות אליך נשאתי את עיני הישבי בשמים:
 2 הנה כעיני עבדים אל יד אדוניהם כעיני שפחה אל
 יד גברתה כן עינינו אל יהוה אלהינו עד שיחננו: 3 חננו
 יהוה חננו כי רב שבענו בוז: 4 רבת שבעה לה נפשנו
 הלעג השאננים הבוז לגאיונים:

124

1 שיר המעלות לדוד לולי יהוה שהיה לנו יאמר נא
 ישראל: 2 לולי יהוה שהיה לנו בקום עלינו אדם: 3 אזי
 חיים בלעונו בחרות אפם בנו: 4 אזי המים שטפנו נחלה
 עבר על נפשנו: 5 אזי עבר על נפשנו המים הזידונים:
 6 ברוך יהוה שלא נתננו טרף לשניהם: 7 נפשנו כצפור
 נמלטה מפח יוקשים הפח נשבר ואנחנו נמלטנו: 8 עזרנו
 בשם יהוה עשה שמים וארץ:

125

1 שיר המעלות הבטחים ביהוה כהר ציון לא ימוט
 לעולם ישב: 2 ירושלם הרים סביב לה ויהוה סביב
 לעמו מעתה ועד עולם: 3 כי לא ינוח שבט הרשע על
 גורל הצדיקים למען לא ישלחו הצדיקים בעולתה
 ידיהם: 4 היטיבה יהוה לטובים ולישרים בלבנותם:
 5 והמטים עקלקלותם יוליכם יהוה את פעלי האון שלום
 על ישראל:

126

1 שיר המעלות בשוב יהוה את שיבת ציון היינו כחלמים: 2 אז ימלא שחוק פינו ולשונו רנה אז יאמרו בגוים הגדיל יהוה לעשות עם אלה: 3 הגדיל יהוה לעשות עמנו היינו שמחים: 4 שובה יהוה את שבותנו כאפיקים בנגב: 5 הזרעים בדמעה ברנה יקצרו: 6 הלוך ילך ובכה נשא משך הזרע בא יבוא ברנה נשא אלמתיו:

127

1 שיר המעלות לשלמה אם יהוה לא יבנה בית שוא עמלו בוניו בו אם יהוה לא ישמר עיר שוא שקד שומר: 2 שוא לכם משכימי קום מאחרי שבת אכלי לחם העצבים כן יתן לידידו שנא: 3 הנה נחלת יהוה בנים שכר פרי הבטן: 4 כחצים ביד גבור כן בני הנעורים: 5 אשרי הגבר אשר מלא את אשפתו מהם לא יבשו כי ידברו את אויבים בשער:

128

1 שיר המעלות אשרי כל ירא יהוה ההלך בדרכיו: 2 יגיע כפיך כי תאכל אשריך וטוב לך: 3 אשתך כגפן פריה בירכתי ביתך בנוך כשתלי זיתים סביב לשלחנך: 4 הנה כי כן יברך גבר ירא יהוה: 5 יברכך יהוה מציון וראה בטוב ירושלם כל ימי חיך: 6 וראה בנים לבנוך שלום על ישראל:

129

1 שיר המעלות רבת צררוני מנעורי יאמר נא ישראל: 2 רבת צררוני מנעורי גם לא יכלו לי: 3 על גבי חרשו

חרשים האריכו למענותם: 4 יהוה צדיק קצץ עבות רשעים: 5 יבשו ויסגו אחור כל שנאי ציון: 6 יהיו כחציר גנות שקדמת שלף יבש: 7 שלא מלא כפו קוצר וחצנו מעמר: 8 ולא אמרו העברים ברכת יהוה אליכם ברכנו אתכם בשם יהוה:

130

1 שיר המעלות ממעמקים קראתיך יהוה: 2 אדני שמעה בקולי תהינה אזניך קשבות לקול תחנוני: 3 אם עונות תשמר יה אדני מי יעמד: 4 כי עמך הסליחה למען תורא: 5 קויתי יהוה קותה נפשי ולדברו הוחלתי: 6 נפשי לאדני משמרים לבקר שמרים לבקר: 7 יחל ישראל אל יהוה כי עם יהוה החסד והרבה עמו פדות: 8 והוא יפדה את ישראל מכל עונתיו:

131

1 שיר המעלות לדוד יהוה לא גבה לבי ולא רמו עיני ולא הלכתי בגדלות ובנפלאות ממני: 2 אם לא שויתי ודומתי נפשי כגמל עלי אמו כגמל עלי נפשי: 3 יחל ישראל אל יהוה מעתה ועד עולם:

132

1 שיר המעלות זכור יהוה לדוד את כל ענותו: 2 אשר נשבע ליהוה נדר לאביר יעקב: 3 אם אבא באהל ביתי אם אעלה על ערש יצועי: 4 אם אתן שנת לעיני לעפעפי תנומה: 5 עד אמצא מקום ליהוה משכנות לאביר יעקב: 6 הנה שמענוה באפרתה מצאנוה בשדי יער: 7 נבואה למשכנותיו נשתחווה להדם רגליו: 8 קומה

יהוה למנוחתך אתה וארון עזך: ⁹ כהניך ילבשו צדק
 וחסידיך ירננו: ¹⁰ בעבור דוד עבדך אל תשב פני
 משיחך: ¹¹ נשבע יהוה לדוד אמת לא ישוב ממנה מפרי
 בטנך אשית לכסא לך: ¹² אם ישמרו בניך בריתי ועדתי
 זו אלמדם גם בניהם עדי עד ישבו לכסא לך: ¹³ כי בחר
 יהוה בציון אוה למושב לו: ¹⁴ זאת מנוחתי עדי עד פה
 אשב כי אותיה: ¹⁵ צידה ברך אברך אביוניה אשביע
 לחם: ¹⁶ וכהניה אלביש ישע וחסידיה רנן ירננו: ¹⁷ שם
 אצמיח קרן לדוד ערכתי נר למשיחי: ¹⁸ אויביו אלביש
 בשת ועליו יציץ נזרו:

133

¹ שיר המעלות לדוד הנה מה טוב ומה נעים שבת
 אחים גם יחד: ² כשמן הטוב על הראש ירד על הזקן
 זקן אהרן שירד על פי מדותיו: ³ כטל חרמון שירד
 על הררי ציון כי שם צוה יהוה את הברכה חיים עד
 העולם:

134

¹ שיר המעלות הנה ברכו את יהוה כל עבדי יהוה
 העמדים בבית יהוה בלילות: ² שאו ידכם קדש וברכו
 את יהוה: ³ יברכך יהוה מציון עשה שמים וארץ:

135

¹ הללו יה הללו את שם יהוה הללו עבדי יהוה:
² שעמדים בבית יהוה בחצרות בית אלהינו: ³ הללו
 יה כי טוב יהוה זמרו לשמו כי נעים: ⁴ כי יעקב
 בחר לו יה ישראל לסגלתו: ⁵ כי אני ידעתי כי גדול

יהוה ואדנינו מכל אלהים: 6 כל אשר חפץ יהוה עשה בשמים ובארץ בימים וכל תהומות: 7 מעלה נשאים מקצה הארץ ברקים למטר עשה מוצא רוח מאוצרותיו: 8 שהכה בכורי מצרים מאדם עד בהמה: 9 שלח אתות ומפתים בתוככי מצרים בפרעה ובכל עבדיו: 10 שהכה גוים רבים והרג מלכים עצומים: 11 לסיחון מלך האמרי ולעוג מלך הבשן ולכל ממלכות כנען: 12 ונתן ארצם נחלה נחלה לישראל עמו: 13 יהוה שמך לעולם יהוה זכרך לדר ודר: 14 כי ידין יהוה עמו ועל עבדיו יתנחם: 15 עצבי הגוים כסף וזהב מעשה ידי אדם: 16 פה להם ולא ידברו עינים להם ולא יראו: 17 אזנים להם ולא יאזינו אף אין יש רוח בפיהם: 18 כמוהם יהיו עשיהם כל אשר בטח בהם: 19 בית ישראל ברכו את יהוה בית אהרן ברכו את יהוה: 20 בית הלוי ברכו את יהוה יראי יהוה ברכו את יהוה: 21 ברוך יהוה מציון שכן ירושלם הללו יה:

136

1 הודו ליהוה כי טוב כי לעולם חסדו: 2 הודו לאלהי האלהים כי לעולם חסדו: 3 הודו לאדני האדנים כי לעולם חסדו: 4 לעשה נפלאות גדלות לבדו כי לעולם חסדו: 5 לעשה השמים בתבונה כי לעולם חסדו: 6 לרקע הארץ על המים כי לעולם חסדו: 7 לעשה אורים גדלים כי לעולם חסדו: 8 את השמש לממשלת ביום כי לעולם חסדו: 9 את הירח וכוכבים לממשלות בלילה כי לעולם חסדו: 10 למכה מצרים בבכוריהם כי לעולם חסדו: 11 ויוצא ישראל מתוכם כי לעולם חסדו: 12 ביד חזקה ובזרוע נטויה כי לעולם חסדו:

13 לגזר ים סוף לגזרים כי לעולם חסדו: 14 והעביר
 ישראל בתוכו כי לעולם חסדו: 15 ונער פרעה וחילו
 בים סוף כי לעולם חסדו: 16 למוליך עמו במדבר כי
 לעולם חסדו: 17 למכה מלכים גדלים כי לעולם חסדו:
 18 ויהרג מלכים אדירים כי לעולם חסדו: 19 לסיחון
 מלך האמרי כי לעולם חסדו: 20 ולעוג מלך הבשן כי
 לעולם חסדו: 21 ונתן ארצם לנחלה כי לעולם חסדו:
 22 נחלה לישראל עבדו כי לעולם חסדו: 23 שבשפלנו
 זכר לנו כי לעולם חסדו: 24 ויפרקנו מצרינו כי לעולם
 חסדו: 25 נתן לחם לכל בשר כי לעולם חסדו: 26 הודו
 לאל השמים כי לעולם חסדו:

137

1 על נהרות בבל שם ישבנו גם בכינו בזכרנו את ציון:
 2 על ערבים בתוכה תלינו כנרותינו: 3 כי שם שאלונו
 שובינו דברי שיר ותוללינו שמחה שירו לנו משיר ציון:
 4 איך נשיר את שיר יהוה על ארמת נכר: 5 אם אשכחך
 ירושלם תשכח ימיני: 6 תדבק לשוני לחכי אם לא
 אזכרכי אם לא אעלה את ירושלם על ראש שמחתי:
 7 זכר יהוה לבני אדום את יום ירושלם האמרים ערו
 ערו עד היסוד בה: 8 בת בבל השדודה אשרי שישלם
 לך את גמולך שגמלת לנו: 9 אשרי שיאחז ונפץ את
 עלליך אל הסלע:

138

1 לדוד אודך בכל לבי נגד אלהים אזמרך:
 2 אשתחווה אל היכל קדשך ואודה את שמך על חסדך

ועל אמתך כי הגדלת על כל שמך אמרתך: ³ ביום קראתי ותענני תרהבני בנפשי עז: ⁴ יודוך יהוה כל מלכי ארץ כי שמעו אמרי פיך: ⁵ וישירו בדרכי יהוה כי גדול כבוד יהוה: ⁶ כי רם יהוה ושפל יראה וגבה ממרחק יידע: ⁷ אם אלך בקרב צרה תחיני על אף איבי תשלח ידך ותושיעני ימינך: ⁸ יהוה יגמר בעדי יהוה חסדך לעולם מעשי ידיך אל תרף:

139

¹ למנצח לדוד מזמור יהוה חקרתני ותדע: ² אתה ידעת שבתי וקומי בנתה לרעי מרחוק: ³ ארחי ורבעי זרית וכל דרכי הסכנתה: ⁴ כי אין מלה בלשוני הן יהוה ידעת כלה: ⁵ אחור וקדם צרתני ותשת עלי כפכה: ⁶ פלאיה דעת ממני נשגבה לא אוכל לה: ⁷ אנה אלך מרוחך ואנה מפניך אברח: ⁸ אם אסק שמים שם אתה ואציעה שאול הנך: ⁹ אשא כנפי שחר אשכנה באחרית ים: ¹⁰ גם שם ידך תנחני ותאחזני ימינך: ¹¹ ואמר אך חשך יושפני ולילה אור בעדני: ¹² גם חשך לא יחשיך ממך ולילה כיום יאיר כחשיכה כאורה: ¹³ כי אתה קנית כליתי תסכני בבטן אמי: ¹⁴ אודך על כי נוראות נפליתי נפלאים מעשיך ונפשי ידעת מאד: ¹⁵ לא נכחד עצמי ממך אשר עשיתי בסתר רקמתי בתחתיות ארץ: ¹⁶ גלמי ראו עיניך ועל ספרך כלם יכתבו ימים יצרו ולא אחד בהם: ¹⁷ ולי מה יקרו רעיק אל מה עצמו ראשיהם: ¹⁸ אספרם מחול ירבון הקיצתי ועודי עמך:

19 אם תקטל אלוה רשע ואנשי דמים סורו מני: 20 אשר
יאמרך למזמה נשא לשוא עריך: 21 הלוא משנאיך יהוה
אשנא ובתקומיך אתקוטט: 22 תכלית שנאה שנאתים
לאויבים היו לי: 23 חקרני אל ודע לבבי בחנני ודע
שרעפי: 24 וראה אם דרך עצב בי ונחני בדרך עולם:

140

1 למנצח מזמור לדוד חלצני יהוה מאדם רע מאיש
חמסים תנצרני: 2 אשר חשבו רעות בלב כל יום יגורו
מלחמות: 3 שננו לשונם כמו נחש חמת עכשוב תחת
שפתימו סלה: 4 שמרני יהוה מידי רשע מאיש חמסים
תנצרני אשר חשבו לדחות פעמי: 5 טמנו גאים פח לי
וחבלים פרשו רשת ליד מעגל מקשים שתו לי סלה:
6 אמרתי ליהוה אלי אתה האזינה יהוה קול תחנוני:
7 יהוה אדני עז ישועתי סכתה לראשי ביום נשק: 8 אל
תתן יהוה מאויי רשע זממו אל תפק ירומו סלה: 9 ראש
מסבי עמל שפתימו יכסומו: 10 ימיטו עליהם גחלים
באש יפלם במהמרות בל יקומו: 11 איש לשון בל יכון
בארץ איש חמס רע יצודנו למדחפת: 12 ידעת כי יעשה
יהוה דין עני משפט אבינים: 13 אך צדיקים יודו לשמך
ישבו ישרים את פניך:

141

1 מזמור לדוד יהוה קראתיך חושה לי האזינה קולי
בקראי לך: 2 תכון תפלתי קטרת לפניך משאת כפי
מנחת ערב: 3 שיתה יהוה שמרה לפי נצרה על דל
שפתי: 4 אל תט לבי לדבר רע להתעולל עללות ברשע

את אישים פעלי און ובל אלחם במנעמיהם: ⁵ יהלמני צדיק חסד ויוכיחני שמן ראש אל יני ראשי כי עוד ותפלתי ברעותיהם: ⁶ נשמטו בידי סלע שפטיהם ושמעו אמרי כי נעמו: ⁷ כמו פלח ובקע בארץ נפזרו עצמינו לפי שאול: ⁸ כי אליך יהוה אדני עיני בכה חסיתי אל תער נפשי: ⁹ שמרני מידי פח יקשו לי ומקשות פעלי און: ¹⁰ יפלו במכמריו רשעים יחד אנכי עד אעבור:

142

¹ משכיל לדוד בהיותו במערה תפלה קולי אל יהוה אזעק קולי אל יהוה אתחנן: ² אשפך לפניו שיחי צרתי לפניו אניד: ³ בהתעטף עלי רוחי ואתה ידעת נתיבתי בארץ זו אהלך טמנו פח לי: ⁴ הביט ימין וראה ואין לי מכיר אבד מנוס ממני אין דורש לנפשי: ⁵ זעקתי אליך יהוה אמרתי אתה מחסי חלקי בארץ החיים: ⁶ הקשיבה אל רנתי כי דלותי מאד הצילני מרדפי כי אמצו ממני: ⁷ הוציאה ממסגר נפשי להודות את שמך בי יכתרו צדיקים כי תגמל עלי:

143

¹ מזמור לדוד יהוה שמע תפלתי האזינה אל תחנוני באמנתך ענני בצדקתך: ² ואל תבוא במשפט את עבדך כי לא יצדק לפניך כל חי: ³ כי רדף אויב נפשי דכא לארץ חיתי הושיבני במחשכים כמתי עולם: ⁴ ותתעטף עלי רוחי בתוכי ישתומם לבי: ⁵ זכרתי ימים מקדם הניתי בכל פעלך במעשה יריך אשוחח: ⁶ פרשתי ידי

אליך נפשי כארץ עיפה לך סלה: 7 מהר ענני יהוה
 כלתה רוחי אל תסתר פניך ממני ונמשלתי עם ירדי
 בור: 8 השמיעני בבקר חסדך כי בך בטחתי הודיעני
 דרך זו אלך כי אליך נשאתי נפשי: 9 הצילני מאיבי יהוה
 אליך כסתי: 10 למדני לעשות רצונך כי אתה אלוהי
 רוחך טובה תנחני בארץ מישור: 11 למען שמך יהוה
 תחניני בצדקתך תוציא מצרה נפשי: 12 ובחסדך תצמיח
 איבי והאבדת כל צררי נפשי כי אני עבדך:

144

1 לדוד ברוך יהוה צורי המלמד ידי לקרב אצבעותי
 למלחמה: 2 חסדי ומצודתי משגבי ומפלטי לי מגני ובו
 חסיתי הרודד עמי תחתי: 3 יהוה מה אדם ותדעהו בן
 אנוש ותחשבהו: 4 אדם להבל דמה ימיו כצל עובר:
 5 יהוה הט שמוך ותרד גע בהרים ויעשנו: 6 ברוך
 ברק ותפיצם שלח הציף ותהמם: 7 שלח ידיך ממרום
 פצני והצילני ממים רבים מיד בני נכר: 8 אשר פיהם
 דבר שוא וימינם ימין שקר: 9 אלהים שיר חדש אשירה
 לך בנבל עשור אזמרה לך: 10 הנותן תשועה למלכים
 הפוצה את דוד עבדו מחרב רעה: 11 פצני והצילני מיד
 בני נכר אשר פיהם דבר שוא וימינם ימין שקר: 12 אשר
 בנינו כנטעים מגדלים בנעוריהם בנותינו כזוית מחטבות
 תבנית היכל: 13 מזוינו מלאים מפיקים מזן אל זן צאוננו
 מאליפות מרבבות בחוצותינו: 14 אלופינו מסבלים אין
 פרץ ואין יוצאת ואין צוחה ברחבתינו: 15 אשרי העם
 שככה לו אשרי העם שיהוה אלהיו:

145

1 תהלה לדוד ארוממך אלוהי המלך ואברכה שמך לעולם ועד: 2 בכל יום אברכך ואהללה שמך לעולם ועד: 3 גדול יהוה ומהלל מאד ולגדלתו אין חקר: 4 דור לדור ישבח מעשיך וגבורתיך יגידו: 5 הדר כבוד הודך ודברי נפלאותיך אשיחה: 6 ועוזו נוראתיך יאמרו וגדולתיך אספרנה: 7 זכר רב טובך יביעו וצדקתך ירננו: 8 חנון ורחום יהוה ארך אפים וגדל חסד: 9 טוב יהוה לכל ורחמיו על כל מעשיו: 10 יודך יהוה כל מעשיך וחסידיך יברכוכה: 11 כבוד מלכותך יאמרו וגבורתך ידברו: 12 להודיע לבני האדם גבורתו וכבוד הדר מלכותו: 13 מלכותך מלכות כל עלמים וממשלתך בכל דור ודור: 14 סומך יהוה לכל הנפלים וזוקף לכל הכפופים: 15 עיני כל אליך ישברו ואתה נותן להם את אכלם בעתו: 16 פותח את ידך ומשביע לכל חי רצון: 17 צדיק יהוה בכל דרכיו וחסיד בכל מעשיו: 18 קרוב יהוה לכל קראיו לכל אשר יקראהו באמת: 19 רצון יראיו יעשה ואת שועתם ישמע ויושיעם: 20 שומר יהוה את כל אהביו ואת כל הרשעים ישמיד: 21 תהלת יהוה ידבר פי ויברך כל בשר שם קדשו לעולם ועד:

146

1 הללו יה הללי נפשי את יהוה: 2 אהללה יהוה בחיי אזמרה לאלהי בעודי: 3 אל תבטחו בנדיבים בבן אדם שאין לו תשועה: 4 תצא רוחו ישב לאדמתו ביום ההוא אבדו עשתנתיו: 5 אשרי שאל יעקב בעזרו שברו על

יהוה אלהיו: ⁶ עשה שמים וארץ את הים ואת כל אשר
 בם השמר אמת לעולם: ⁷ עשה משפט לעשוקים נתן
 לחם לרעבים יהוה מתיר אסורים: ⁸ יהוה פקח עורים
 יהוה זקף כפופים יהוה אהב צדיקים: ⁹ יהוה שמר את
 גרים יתום ואלמנה יעודד ודרך רשעים יעות: ¹⁰ ימלך
 יהוה לעולם אלהיך ציון לדר ודר הללו יה:

147

¹ הללו יה כי טוב זמרה אלהינו כי נעים נאווה
 תהלה: ² בונה ירושלם יהוה נדחי ישראל יכנס: ³ הרפא
 לשבורי לב ומחבש לעצבותם: ⁴ מונה מספך לכוכבים
 לכלם שמות יקרא: ⁵ גדול אדונינו ורב כח לתבונתו אין
 מספר: ⁶ מעודד ענוים יהוה משפיל רשעים עדי ארץ:
⁷ ענו ליהוה בתודה זמרו לאלהינו בכנור: ⁸ המכסה
 שמים בעבים המכין לארץ מטר המצמיח הרים חציר:
⁹ נותן לבהמה לחמה לבני ערב אשר יקראו: ¹⁰ לא
 בגבורת הסוס יחפץ לא בשוקי האיש ירצה: ¹¹ רוצה
 יהוה את יראיו את המיחלים לחסדו: ¹² שבחי ירושלם
 את יהוה הללי אלהיך ציון: ¹³ כי חזק בריחי שעריך
 ברך בניך בקרבך: ¹⁴ השם גבולך שלום חלב חטים
 ישביעך: ¹⁵ השלח אמרתו ארץ עד מהרה ירוץ דברו:
¹⁶ הנתן שלג כצמר כפור כאפר יפזר: ¹⁷ משליך קרחו
 כפתים לפני קרתו מי יעמד: ¹⁸ ישלח דברו וימסם ישב
 רוחו יזלו מים: ¹⁹ מגיד דברו ליעקב חקיו ומשפטיו
 לישראל: ²⁰ לא עשה כן לכל גוי ומשפטים בל ידעום
 הללו יה:

148

1 הללו יה הללו את יהוה מן השמים הללוהו במרומים: 2 הללוהו כל מלאכיו הללוהו כל צבאו: 3 הללוהו שמש וירח הללוהו כל כוכבי אור: 4 הללוהו שמי השמים והמים אשר מעל השמים: 5 יהללו את שם יהוה כי הוא צוה ונבראו: 6 ויעמידם לעד לעולם חק נתן ולא יעבור: 7 הללו את יהוה מן הארץ תנינים וכל תהמות: 8 אש וברד שלג וקיטור רוח סערה עשה דברו: 9 החרים וכל גבעות עץ פרי וכל ארזים: 10 החיה וכל בהמה רמש וצפור כנף: 11 מלכי ארץ וכל לאמים שרים וכל שפטי ארץ: 12 בחורים וגם בתולות זקנים עם נערים: 13 יהללו את שם יהוה כי נשגב שמו לבדו הודו על ארץ ושמים: 14 וירם קרן לעמו תהלה לכל חסידיו לבני ישראל עם קרבו הללו יה:

149

1 הללו יה שירו ליהוה שיר חדש תהלתו בקהל חסידים: 2 ישמח ישראל בעשיו בני ציון יגילו במלכם: 3 יהללו שמו במחול בתף וכנור יזמרו לו: 4 כי רוצה יהוה בעמו יפאר עגוים בישועה: 5 יעלזו חסידים בכבוד ירננו על משכבותם: 6 רוממות אל בגרונם וחרב פיפיות בידם: 7 לעשות נקמה בגוים תוכחת בל אמים: 8 לאסר מלכיהם בזקים ונכבדיהם בכבלי ברזל: 9 לעשות בהם משפט כתוב הדר הוא לכל חסידיו הללו יה:

150

1 הללו יה הללו אל בקדשו הללוהו ברקיע עזו:

2 הללוהו בגבורתיו הללוהו כרב גדלו: 3 הללוהו
בתקע שופר הללוהו בנבל וכנור: 4 הללוהו בתוף
ומחול הללוהו במנים ועוגב: 5 הללוהו בצלצלי שמע
הללוהו בצלצלי תרועה: 6 כל הנשמה תהלל יה הללו
יה:

civ

מודרני עברי ד תנ

The Holy Bible in Modern Hebrew

Public Domain

Language: עברית (Hebrew)

Translation by: Franz Delitzsch (1813–1890)

2022-06-14

PDF generated using Haiola and XeLaTeX on 21 Feb 2024 from source files dated 31 Aug 2023

53d9715c-3509-54f2-9e87-2cb0afdfb800